



© T.C. Kültür ve Turizm Bakanlığı Kütüphaneler ve
Yayımlar Genel Müdürlüğü

Eser Adı: Sa'id Giray Dîvâni
Müellifi: Sa'id Giray
Hazırlayan: Saadet Karaköse
Yayın Yılı: 2017
ISBN: 978-975-17-3636-9
Ana Yayın Numarası: 3373
Kültür Eserleri Dizisi-513

Adres: Anafartalar Mahallesi, Cumhuriyet Caddesi,
No: 4, B-Blok, 06030 Ulus/ANKARA
Telefon: 00 90 312 3099001
Faks: 00 90 312 3098998
e-posta: yaphaz@kulturturizm.gov.tr

www.kulturturizm.gov.tr
<http://ekitap.kulturturizm.gov.tr>

SA'İD GİRAY DİVANI

Hazırlayan

Dr. Saadet KARAKÖSE

**Ankara
2017**

KISALTMALAR

a.g.e. :Adı geçen eser
Ank. :Ankara
Dk. :Der-kenar
DTCF :Dil ve Tarih-Coğrafya Fakültesi
G. :Gazel
Haz. :Hazırlayan
İst :İstanbul
K. :Kaside
Kıt. :Kıt'a
Ktp :Kütüphanesi
Mes. :Mesnevî
Mus. :Musamat
R. :Rübâi
Tar. :Tarih
Yay. Yayını

I. HAYATI

Sâid mahasıyla divan tertip eden şairin hayatı hakkında hiçbir kaynakta tafsilatlı bilgiye rastlanmamaktadır. Saîd Giray isimli bir Kırım Hanı veya veliahdına da rastlanmamıştır. Şâirin İstanbul'da yaşadığı devir ve Divandaki hayatına dâir manzumeler, Said mahasının, 18. yüzyılda kalgay olarak İstanbul'da bulunan III. Saâdet Giray'ın oğlu veya torunu IV. Saâdet Giray'a ait olma ihtimâlini güçlendirmektedir. Zira, divanın birçok yerinde “Hacı Selim-zâde” ibaresi geçmektedir. Kırım tarihinde Haci Selim'in altı oğlundan sadece III. Saadet Giray' ismi eserde geçmektedir. II. Saâdet Giray'ın ölüm târihi, Divanın tertibinden yaklaşık otuz yıl kadar öncesine rastlamaktadır. İkinci ihtimal de, III. Saadet Giray'ın oğlu ve sadece kalgay olarak kalmış, hanlığa nasb olunmamış, Said isminde bir Kırım hanedanı mevcut. Fakat gerek sanat alanında, sesini duyurma konusundaki başarısızlığı ve gerekse hanlık yapmadığı için önemsiz görülp kaynaklarda yer verilmemiş olabilir. 18. yüzyılın ikinci yarısından sonra, hanedan mensuplarının çöküğü yüzünden olsa gerek ikinci, üçüncü derecedeki kimseler pek yer almamaktadır. Said Giray bu dönemlerde yaşamış olabilir. Divandan anlaşıldığına göre de, son derece münzevî ve sefil bir hayat yaşamıştır. Kimsenin, kendisinin farkında olmadığını da çok sık ifade etmektedir. Gerçekte Saîd Giray isimli biri mevcutsa, şairin Divânına yansittığı hayatı da kaynaklarda yer almayacak şekilde önemsiz görülmesi fikrini desteklemektedir. Yalnız, şâirin verdiği isimler, kullandığı açık kimlik, onun III. Saadet Giray neslinden olduğu yönündedir. Adı Divanda önemle zikr edildiği, hayatı hakkında malumat bulunduğu için, kendisine en yakın han olan III. Saâdet Giray'ın hayatına kısaca yer vermeyi uygun bulduk. Bundaki amacımız, bir Kırım hanedanını tanımak süretille, hayatı hakkında bilgi bulunmayan şâirin kişiliğini teşhis edebilmektir.

III. Saadet Giray, Haci Selim Giray'ın altı oğlundan dördüncüsüdür. Ağabeyi Devlet Giray'ın hanlığı zamanında iki defa kalgay olarak İstanbul'da bulunmuş, sonra azledilerek Yanbolu yakınlarındaki Sirâceli karyesinde ikâmet etmeye iken 1129/1713 tarihinde Devlet Giray'ın infisâlı üzerine Kırım Hanlığına nasb olunmuştur. Aynı yıl askerîyle Bucak'ta Tatarlarla buluşup Osmanlı'ya karşı bağımsızlık mücadelesi için sözleşmişken, muhtemel bir Rus saldırısının haber alınması üzerine Sadrazam İbrâhim Paşa maiyyetinde Edirne'ye gelmiş ve sadakat sözü verdikten sonra tekrar Kırım'a dönmüştür. Oğlu Sâlih Giray'ı Çerkesler üzerine göndermiş; 1137/1721 yılında azledilerek yerine kardeşi Mengli Giray nasbolunmuştur.¹ Kendisi yine Siraceli Karyesine yerleşmiştir. 1144/1728 yılında orada, yaşı yetmişé yakın olduğu halde vefat etmiştir. Kerem ve sehâvet sâhibi olarak bilinen han, av sporuna da meraklıdır.²

Devlet Giray'ın hanlığı sırasında(1117/1701), Saâdet Giray , Kalgay; ağabeyi Gâzi Giray Nûreddin sultan mevkiinde bulunuyordu. Karlofça

¹ Abdülkadir Özcan (hzl.) (1989). *Şakâ'ik-i Nu'maniye ve Zeyilleri*. C. IV. İstanbul: Çağrı Yay. 715.

² Şemseddin Sami. *Kamusü'l-âlâm*. C. IV. 2564.

antlaşmasına göre, Bucak'ı işgal etmiş olan Nogay Tatarlarının, eski yerleri olan Öz suyu karşısındaki Kırım topraklarına yerleştirilmesi gerekiyordu. Bu iş için Gâzi Giray görevlendirilmişti. Ancak, daha önce Hacı Selim Giray'ın ikinci veliahtı Kalgay Şahbaz Giray'ın âsî Çerkeslere esir düşüp katledilmesinden sonra kalgaylık makamına üçüncü veliaht olarak kendisinin değil de Saâdet Giray'ın atanmasına kızmıştı. Bu yüzden Gâzi Giray, bu görevi ertelemek suretiyle muhalefet etmekle kalmamış, Nogaylarla birleşerek ağabeyi Devlet Giray'a isyan etmişti. Osmanlı'nın müdahalesiyle Edirne'ye getirtilen Gazi Giray, Rodos'a sürgüne gönderildi. Nogaylar kendi yurtlarına yerleştirildi. Bu sırada Vezir-i azam Daltaban Mustafa Paşa, kendisine nüfuz sağlamak amacıyla Devlet Giray'a Tatarlarla birleşip Ruslara karşı taarruza geçmeyi teşvik eden bir mektup gönderdi. Mektuptan cesaret alan Devlet Giray, bu taarruza Saâdet Giray'ı gönderdi. Saâdet Giray, mukavim bir orduyla Bucak'a gelip Tatarlarla birlikte kışladı. Amacı baharda taarruza geçmektı. Rusya'dan gelen haberler üzerine Sadr-azam Râmi Mehmed Paşa, hükümeti durumdan haberdar etti. Daltaban Mustafa Paşa azl ve katl edildi ve Saâdet Giray Kırım'a çağrıldı. Ancak, Saâdet Giray hana ve Osmanlıya itaat etmemesi sözü verdiği için geri dönmedi. Sözünü geçiremeyen Devlet Giray azledilip, yerine babası Hacı Selim Giray dördüncü defa tahta getirildi. Devlet Giray da adamlarını toplayıp Saâdet Giray'a katıldı. Osmanlı cihetinde Daltaban Mustafa Paşa'nın katli ve üzerlerine bir orduyla gelindiği haberlerini alınca Çerkesistan'a kaçıp sığındılar. Bilahire, anlaşma sağlanmış, Sadr-azam İbrâhim Paşa'nın maiyyetinde Edirne'ye gelmiş ve bağlılık sözü vermiştir. 1716 yılında hanlığı tayinine kadar Yanbolu'da ikâmet etmiştir.³

“Giray”, Cengiz Han’ın küçük oğullarından Cuci Han’ın küçük oğlu Togay Temur Sülâlesinden gelen han ailesine verilen unvanıdır. Kırım hanlığı, sonradan üç kola ayrılmış olan Altın Orda Devletinin bir koludur. Tas Timur Oğullarının Kırım’daki kurdukları devlet, Kerey Kabilesince yönetiliyordu. Zamanla bu kabile ismi Kırım Devletinin resmî han unvanı olarak yerleştii. Nemeth Gyula’ya göre Giray ismi Kerey’den gelmektedir. Kerey, Türkçe’de “en kuvvetli, dev” anlamındaki “ker” köküne küçültme eki –ey getirilerek oluşturulmuş bir kelimedir. Kerey>kirey>giray şeklini almıştır.⁴

Kırım Hanlığı 1454 yılında Hacı Giray tarafından kurulmuş ve Osmanlı Devletiyle iyi münasebetlerde bulunulmuştur. Osmanlı, zaman zaman taht mücâdelesi yüzünden çıkan iç karışıklıklara müdahale edip yattırmıştır. Mengli Giray zamanında başkent, Kırkyir’den Bahçesaray'a taşınmış ve Osmanlı hâkimiyeti resmen kabul edilmiştir(1475). Osmanlı, hakem devlet olarak, hanedan ailesinde kan dökülmesini önleyecek bir sistem geliştirmiştir: Osmanlı tarafından tain edilen han, Giray unvanını alırken, veliahdı Kalgay, ikinci veliahd (hanın kardeş olabiliyor) Nûreddin unvanıyla anılıyordu. Kalgay ve Nûreddinler, emniyet gereği İstanbul’da ikâmet ediyor, aynı zamanda tedrisat görüyorlardı. Kânûnî devrinde, Saâdet Giray’dan itibaren han kardeşlerinden birinin, devletin itaat ve bağlılığını sağlamak için, tedbir kabilinden, rehine olarak İstanbul’da ikâmeti, mecburiyet haline getirildi. Han, İstanbul’dan Giray olarak tain edilip berat

³ İ. Hakkı Uzunçarşılı, *Osmanlı Tarihi*, C. IV. 11-130.

⁴ “Giray”. *İslam Ansiklopedisi*. C. IV. 783-789.

aldıktan sonra, hayatı tehlikede olan diğer aile fertleri İstanbul'a geliyorlardı. İstanbul'da İslimiye, Yanbolu, Tekirdağ ve Çatalca gibi yerlerde çiftliklere yerleştiriliyor ve kendilerine salyâne, has ve zeamet tahsis ediliyordu.⁵

Kâmusü'l-âlam'da verilen bilgiye göre Saâdet Giray, 1713 tarihinde hanlığa nasbolunmuştur. Oysa Uzunçarşılı'ya göre 1713 tarihi Saâdet Giray'ın kalgaylığa seçildiği tarihtir. Hanlığa tayini üç yıl sonrasında 1716 tarihine tekâbul etmektedir. Ölüm tarihi de 1728'dan daha sonra olmalıdır. Saâdet Giray, han olarak Kırım'a döndükten sonra, yerine Saîd Giray rehine olarak İstanbul'a gelmiş olabilir. 1774 Küçük Kaynarca antlaşmasıyla, Kırım'ın bağımsızlığını elde edip Osmanlı'dan ayrılması üzerine Kırım'a dönmüş olması ihtimâlinden dolayı, kaynaklarda ona yer verilmemiş olabilir. Kırım, bağımsızlığını kazandıktan sonra Rusya ile ilişkilerini geliştirmiş ve Osmanlı'ya karşı olumsuz siyâset gütmüş olduğu için, siyâsî bir sebeple kaynaklara alımmamış olması da muhtemeldir.⁶ Fakat, Saîd Giray'ın yüzyıl ortalarında İstanbul'da olduğu eserinden anlaşılmaktadır. Divanda Sultan III. Osman'a yazılmış bir methiye mevcuttur. III. Ahmed, I. Mahmud ve III. Osman' (ö. 1757)ın saltanatı yıllarında yaşamış olmalıdır. Çagırgan Sarayının nakş edilmesine şâirin düşüğü tarih (1167/1751)dir. Oğlu Halîm Giray'ın, kardeşi Mengli Giray yerine Sultan III. Osman tarafından Kırım hanlığına getirildiğini (1169/1753)⁷ görmüş ve eserinde memnuniyetini de ifade etmiştir:

Sa‘âdet Hân-zâde ol Halîm Sultân-ı ‘Âlî-şân
Kîlup bir ‘âli- devlet-hâne içün himmet-i vâlâ / Tar.2.

Gazel şeklindeki methiye, Sultan III. Osman'ın ziyafete davetini konu almaktadır. Bu ziyâfet, padişahın cülûsu münasebetiyle verilmiş de olabilir ve şâirin Sultan III. Osman devrinde yaşadığı göstermektedir.

Sad şükür lutf idüp hazret-i Sultân ‘Osmân
Eyleyince o veliyyü'n-ni‘ami hân-ı cedîd /G.33.

Saîd Giray, Saâdet Giray gibi Yanbolu'da, kalgay olarak kaldığı süre içerisinde, divânını tertip etmiştir. Bûstan ve Gülistan şâiri Sâdi'yi kendisine örnek aldığı için, hem ustâsının ismi hem de adıyla aynı kökten gelen Saîd mahlasını tercih etmiştir. Divânın adı “Saîd Giray Dîvâni” olarak geçmesine rağmen, hiçbir kaynakta aynı isimde bir şaire rastlanmamaktadır. Saîd Giray mahlasının IV. Saâdet Giray'a ait olduğu ihtimâli, şâirin eser içerisinde adını yer yer açık kimliği olarak kullanmasından anlaşılmaktadır. Ancak IV. Saâdet Giray'ın hayatına kaynaklarda yer verilmediği gibi, şâir olarak da bahsi geçmemekte ve herhangi bir manzumesine de yer verilmemektedir.

İsterem hazret-i Hakdan ki Sa‘âdet Giray
Ola tâli‘ bu safâ-hânedede her demde şehâ /K.3

⁵ Halil İnalçık (1996). “Giray”. İslam Ansiklopedisi. C. XIV. İstanbul: TDV Yay. XIV. 76-78.

⁶ Doğustan Günümüze Büyük İslam Tarihi. C. XXI. 162-193.

⁷ Şemseddin Sami. Kamusü'l-âlâm. C. III. 1978.

Çağırğan Sarayının inşâ ve nakş edilişini konu alan kasidede şair, bu sarayda sultanat sürdürmiş olmayı dilemekte ve özellikle kimliğini açık olarak kullanmaktadır. Ayrıca birçok yerde de Selîm neslinden geldiği ,Saâdet Giray'ın oğlu ve sultan olduğu belirtilmektedir.

Beni eyle belâgat içre kelîm
Zübde-i nesl-i pâk âl-i Selîm/ Mes. 4-80

Tab‘ıdur kân-ı şecâ‘at o sehâvet-pîşe
Âb-ı rûy-ı şeref âl-i Selîm olsa sezâ K.3-16

Bizüz ol şâ‘ir-i mâhir Sa‘îdâ nola çarh içre
Sa‘âdet Hân-zâde ibn-i el-hâc Selîm olsak / G 97.

Şâir, Rum elinde çok zor günler geçirmiş ve kendini âdetâ mahpus gibi hissetmiştir. Rûm'u kâfirlikle itham edecek kadar yadigar. "Rûm-ı şûm, kâfir Rûm terkiplerini kullanmaktan kaçınmaz. Çok fazla maddî sıkıntı çektiğini, ilme sanata değer verilmediğini, ekâbirin cimriliğini dile getirir. Bir taraftan sîla özlemiyle yanarken, diğer taraftan kendini garip ve degersiz hisseder. Kendini yabancı hisseder ve yabancı muamelesi görmekten yakınır. Şairin terkib-i bendi tamamen İstanbul'daki yaşıtlısını ve duygularını dile getirir.

Çekdi ‘arûsi dûnuñ ey çarh sîneye
Taht-ı safâda bir süri nâ-ehl nâ-be-kâr
İkbâl eyle ehl-i dile ey felek yeter
Hod-bîn hod-furûşları eyle zâr zâr
İtdüñ Sa‘îde zillet-i genc mûlk-i Rûmî taht
Ey taht-ı suhan reşk ile ol sen de laht laht / Terkib1/I

Her çaresiz kimsenin yaptığı gibi Saîd de içinde bulunduğu durumdan felegi sorumlu tutmaktadır. Aksine dönen talihi yüzünden, liyakatsız kimselere sunulan mutluluğun kendisinden esirgendiğini düşünerek haksız muameleye maruz kaldığını ifade etmekte ve felege beddua etmektedir. Bütün bu aksiliklerin sebebi şaire göre İstanbul'da oluşudur. Sultanlığı tanımama bile, şair olarak, yüksek bir seviyede tutulması gerektiğini, fakat, gerçekte sultanlığı gibi şâirlığının de itibar görmediğinden dolayı felege çatar.

Yâ Rab ne şûre- zâr olup gam-zidâ-yı Rûm
Elde girye vü gam bitirür nâ-sezâ-yı Rûm
İkbâli kalbe gelse hemân lâ-yafnâ olur
Ehvel bakar meger ki görenler safâ-yı Rûm
‘Ilm ehli nâ-bedîd ü ma‘ârifê nâ-şenîd
A‘yâni hep pelîd budur mâcerâ-yı Rûm
Îşbu ‘aceb ki sâlik-i merde Hüdâ ‘adîm
Her kûçede nişeste iken evliyâ-yı Rûm
Bir sîm-ten de yok ki göñül kâm ala biraz

‘Ankâ-yı kûh-ı Kâf gibi meh-likâ-yı Rûm
Gördükce âdemi dem –i inkârdan gelür
Bî-gâne tarz olur reviş-âşinâ-yı Rûm
Bir dem halâs eylese lutfiyla Hak bizi
Tenden degül ki cânuma geçdi cefâ-yı Rûm
Yâ Rab halâs eyle beni Rûm-ı şûmdan
Ya’ni ‘azâb-ı sûziş-i nâr-ı gumûmda / Terkib 1/II

Şâire göre İstanbul, kimsenin kimseyle ilgilenmediği, tanıdıkların birbirini görmezden geldiği, insanlık namına hiçbir değerin bulunmadığı bir yerdir. İlim adamı diye geçinenler, ilmi uzaktan yakından tanıtmamış kimselerdir. En büyük sıkıntısı yalnızlıktır. Hatta o kadar ki, güzelleri bile Kaf’ın Ankâsı gibi erişilmezdir.

Zann itme Rûm mesken-i cây-ı makar bize
Her dem güzâr-ı ‘ömr gazab-ı sakar bize
İkbâl ile dil oldı hemân taht-ı ye’s-i şâh
Geldi hediyye zer-ger-i gamdan kemer bize
İtdüm hakîkat ile nazar gördüm ehl-i Rûm
Tündî-i saht-ı Rûm ile ‘aynı bakar bize
Gam gûsesinde yâd-ı leb-i dil-berân ile
Vişn’âb-ı keyf çekmege hûn-ı ciger bize
İtdüm harem-i kâfir –i gamdan güzîr için
Rûm içre hasb-ı hâlüm iden mukarrer bize
Bir dem murâdum üzre dönüp çarh-ı tîz-rev
Olsa zemîn –i mûlk-i Kırım’a sefer bize
Mihmân-ı keyf-i dilde o demde konuk olup
Virmezdi hüzn-i kalb-i gubâr keder bize
Yâ Rab halâs eyle bu Rûm ilinden meded
Başumdan aşdı geçer gam itdi cezr ü med /Terkib 1/III

Sâid, zaman zaman içinde bulunduğu karamsarlıktan umut dünyâsına kaçar ve kendi kendine teselli vermeğe çalışır. İstanbul’dâ yaşayan diğer azınlıklarla, gayri müslimlerle bir tutulmağa ve onlarla aynı muameleye maruz kalmağa içerler. Acılar içinde yaşadığını, ancak bu acıların bir gün sona ereceğini düşünür ve sabr etmesi gerektiğini kendine telkin eder. Kırım’a dönmeyi hayal eder, hayalının gerçekleşmesi için Allah’a yalvarır.

.....

Gör Rûm-ı şûmü dil-berinüñ hîc edâsı yok
Gül nâ-keşide bülbülinüñ de nevâsı yok
Bir yirde böyle dil-bere ne mâcerâ ola
Hayretle hûn-ı ‘âşik içün Kerbelâ ola /Terkib 1/IV

Şâir, o kadar kendisini yalnız ve garip hissetmektedir ki Rum’un gülünü açmaz, bülbülinü ötmez görür. Típkı “Levin tutmuş goncaları açılmış / Güllerí var

bizim güle benzemez⁸ kabilinden bir duyguya, açılmayan gönlüne gülün bülbülün tesir edemeyeceğini dile getirir. Zirâ, Kerbelâ'ya dönmüş yüreği kan ağlarken dışarıdan etkilenmesi söz konusu değildir.

Sâid, derdiyle gece-gündüz öylesine hem-haldir ki, münacaat kasidesinde hayal mi rüya mı olduğu belli olmayan bir olay yer alır. Bir gün, yine ağlarken bir yaşlı zat peydâ olur, hâlini sorar. O da, kıskandığı Osmanlı ile kendi durumunu karşılaştırıp, liyakatsız kimselere devlet bağışlandığı halde kendisinin zillet içinde yaşadığını, bu duruma dayanamadığını söyler. Yaşılı zat, ona sabretmesi, sorgulamaması gerektiğini söyler ve sonunun hayır olacağını müjdeler. Destânî karakter gösteren bu olay gerçekten, hânin ruh halini ve hislerinin yoğunluğunu yansıtmaktadır.

İdbâr tutdu yüz bu Sa‘âdet ocagina
Anlar şarâb-ı devletile mest her biri

Didüm ki vaz‘-ı dehr geçüpdür derûnuma
İtdüm sihâm-ı ta‘ne nişân çarh-ı kec-revi

Didi ki geldi hayr Sa‘âdet ocagina
Zînhâr itme hikmet-i Hakdan şikâyeti /Ter.I-VI

Diğer taraftan realiteyi de inkar edemez. Gerçekte, gurbette en kötü şartlar altında yaşadığını, sultanatın sadece hayal olduğunu düşünür. Fakat, bunu dile getirmekten de çekinmez. Umutsuzluk içinde, sitem yolu bir üslupla kabullenmeye çalışır durumunu.

Gedâ-yı zillet-i gurbet bizüz Sa‘îd ammâ
Hayâl-i devlet ile gâh pâdişâlanuruz / G.72.

Bütün dualarında (bazen gazeller içinde de dua bölümune yer verilmiş) Rum ilinden ayrılmak ve kendi tahtında hükümrان olmayı dileyen Said Han, bir taraftan felegi suçlarken, diğer taraftan felekten istimdad eyler. Hâliyle, içinde bulunduğu halde ölüp gitmekten korkar. Münzevî bir hayat yaşamaktayken, belki de saltanat umudu, bütün zamanını dolduran yalnızlık duygusuyla beslenmiştir.

Künc-i ferâgat içre zelîl itme Rûmda
Taht-ı Selîm vârisi kıl sen şehâ bizi

Kâm-ı ‘arûs-ı tahti bize nâm-zâd idüp

⁸ Karacaoğlan, M. Fuad Köprülü (1962). *Türk Saz Şâirleri*. C. I-V. Ankara: Millî Kültür Yay. 345.

Mahtûbe –i şerîfîye irgür Hûdâ bizi / Ter. 1-VII

‘Aks-i kâmum üzredür hep gerdiş-i çarh ey Sa‘îd
Nola bir kez devlet-i Cengîz göstersün saña / G.4.

“Garib” redifli gazeli de, şâirin ruh hâlini aks ettiren oldukça güzel bir örnektir. Kendi hâletini tabiata yansımış olarak görür veya tabiattaki garipliklerde kendini bulur. Gültün, sümbülün, bülbülün yalnızlığını kendi içinde bulur. Şâhlığını, bu yalnızlıkla birleştirerek söz sahasında şah olduğuna inanmak ister. Fakat, yine de garip olarak ölüp gitme korkusu, kaçamadığı bir gerçek olarak zâhir olur.

Bâg-ı ‘âlemde kalur mecbûl-i bî-fer gül garîb
Nagme-sâz-ı tab‘-ı ‘uşşâk olmasa bülbül garîb

Hayl-i ezhâr içre zanbak kâm-rân-ı ser-fîrâz
Gömgök itmiş derd-i ‘aşk ile tenin sünbul garîb

Şehr-i gülzâr-ı vücûd içre terennüm-sâzdur
Nâle vü feryâd ile mânend-i bülbül dil garîb

...

Lâl olup terk-i cihân itdi Sa‘îdâ ‘ibret al
Şâh-i iklîm-i suhanken tâlib-i âmil garîb / G.14.

Her şâir gibi Said de kıymetinin bilinmediğinden şikayetçidir. Bundan Rum'u sorumlu tutar. Zirâ, şiirde Muhteşem kadar hünerli de olsa, kendisine yapılan “vahşi” muamelesi, melekesine yerleşmiştir. Her hâl ü kârda gariplik duyusundan, yaban alinganlığından kurtulabilmiş değildir. En kötü muamelenin, Tatar olduğu için kendisine yapıldığını zanneder.

Muhteşem olsañ eger Rûmda yine vahşisin
Çünkü nâzımsın eger şî‘rûne virseñ sûret / G.21.

Tâtâr zan mı itdi rakîbi o mâh Türk
İt gibi dûr-bâşı suhanla padaklıdı / G.165.

Saïd Giray, İstanbul'da bulunduğu süre içerisinde geçim sıkıntısı çekmiştir. Sık sık, ekâbirin kerem sahibi olmadıklarını, hatta selamını almadan önce ceplerini kontrol ettiklerini dile getirir. İlim ve irfana rağbet edilmediğini, insanların paraya hümet ettiklerini ifade eder. Borç içinde yaşadığı, borçlarını veremediğini ve borç bile bulmadığını anlatır. Divanda “karz” redifli iki gazel bulunmaktadır.

İtme ey dil ser ü sâmânuñ içün matlab-ı karz
Ger Aristo ise bî-hûş olur sâhib-i karz / G.84

Rûm içre Sa‘îdâ seni terk itmedi aslâ

Belli ki, borç almayı şâh olarak kendine yediremiyor. Borç veren veya vermeyenlerin davranışları da son derece başarılı bir şekilde gözlenip tasvir edilmiştir. Borç talep edildiğinde, Aristo bile olsa aklı başından giderse, bu borçtan kurtulamayanın sığınacağı bir his veya çıkabileceği bir çıkış imkânı ne olabilir ki, âh etmekten başka...

KAYNAKÇA

- Abdulkadiroğlu, Abdülkerim (1985). *İsmâîl Belîg, Nuhbetü'-Âsâr li Zeyli Zübdetü'l-Eş'âr*. Ankara: Gazi Üniversitesi.
- Ahmed Cevdet Paşa (1307). *Kırım ve Kafkas Tarihçesi*. İstanbul.
- Bölge Ağızlarında Atasözleri ve Deyimler* (1996). C. I-II. Ankara: TDK Yay.
- Bursali Mehmed Tâhir Efendi (1972). *Osmanlı Müellifleri*. C. III. İstanbul: Meral Yay.
- Doğuştan Günümüze Büyüyük İslam Tarihi* (1993). C. XI. İstanbul: Çağ Yay.
- Hâlim Giray Sultan (1328). *Gülbüñ-i Hânân (Kırım Tarihi)*. İstanbul: Necm-i İstiklal Mat. 154-157.
- İlgürel, Mütceba (Hzl.) (1994). *Ahmed Vâsîf Efendi, Mehâsinü'l-Asâr ve Hakâ'ikü'l-Ahbâr*. Ankara: TTK Yay.
- İnalcık, Halil (1996). "Giray". *İslam Ansiklopedisi*. C. XIV. İstanbul: TDV Yay. 783-789.
- İstanbul Kütüphaneleri Türkçe Yazma Divanlar Kataloğu* (1967). C. II. İstanbul: MEB Yay.
- Kurat, Akdes Nimet (1940). *Topkapı Müzesi Arşivinde Altınordu, Kırım ve Türkistan Hanlarına Ait Yarlık ve Bitikler*. İstanbul: Bürhaneddin Mat.
- Kurnaz, Cemal ve Mustafa Tatçı (Hzl.) (2001). *Tuhfe-i Nâîlî*. Ankara: Bizim Büro Yay.
- Mehmed Süreyyâ (1311). *Sicill-i Osmâni*. C. III. İstanbul.
- Meydan Laorousse*. C. X. 788.
- Özcan, Abdulkadir (Hzl.) (1989). *Şakâ'ik-i Nu'mâniye ve Zeyilleri*. C. IV. İstanbul: Çağrı Yay.
- Sâfâyi Tezkiresi*. Süleymaniye Ktb. Esad Efendi. No:2549.
- Serdaroğlu, Ahmet (1966). *Mevzuat-i Aliyyü'l-Kârî Tercümesi*. Ankara.
- Şemseddin Sami (1996). *Kamusü'l-âlâm*. C. IV. Ankara: Kâşgar Neşriyat.
- Tanyu, Hikmet (Hzl.) (1976) *Ziya Gökalp, Kızılelma*. Ankara: Kültür Bak. Yay.
- Uzunçarşılı, İl Hakkı (1982). *Osmanlı Tarihi*. C. IV. Ankara: TTK Yay.

METİN

1b.

1.Zâde-i kilk-i suhan-gûyem olan bu divân
Nûsha-i ma‘rifet-i tab‘uma oldu ‘unvân

2.Her sözüm cevher-i dükkânçe-i ‘akl-ı evvel
Gam degül tab’-ı hasûda nola olursa girân

I İn-mesnevî der-tevhîd-i Bârî

... / .-.- / ...

1.Hamd ol Allaha kim odur ma‘bûd
Hâlik u Kâdir ü Hûdâ-yı Vedûd

2.Vâhid-i *lem-yelid ve lem yûled*⁹
Kasrdur Kayyum ü Hayy İläh Ebed

3.Nakş-bend-i sahîfe-i ezelî
Sîrr-ı kudret nüvis-i lem-yezelî

4.Dest-i dârende-i fakîr ü garîb
Vâhib-i lutf-ı cân-ı vasl-ı Habîb

5.Tesliyet- bahş-ı ‘aşk-ı nevha- gûzâr
Merhem-i zahm-ı her dil-i bîmâr

6.Dâd-dâr-ı mu’în-ı her mazlûm
Mebde’-i münse’ât-ı bahr-i ‘ulûm

7.‘Ârif-i genc-i kalb-i sîrr-ı hikem
Mûcid-i her sürûr u hüzn ü elem

8.Hem semî’ ü ‘alîm ü hem kahhâr
Hem hakîm ü rahîm ü hem settâr

9.Sâni’-i dûzah u behîst-i vûfûr
Hâkim-i ‘adl-kâr-ı yevm-i nûşûr

10.Fâtır-ı hâk-ı âb u bâd u hevâ
Rabb-i mahlûk-ı arz u ‘arş u semâ

2a.

11.Sâhib-ı ‘arş-ı kürsi levh ü kalem
Vâcibü’z-zât-ı kâr-gâh-ı kadem

⁹ “Doğurmadı, O doğrulmadı da.” Kur'an 112/ 3.

- 12.Subh u şâm hayâl-i her- ‘âbid
 ‘Aşk-bahşende sâlih ü zâhid
- 13.Sebeb-i âh-i şu‘le-pâş-ı Halîl
 Bâ’is-i zâri-i Habîb ü Celîl
- 14.Bu nûh-eflâk-i hayme-i gerdûn
 Levha-i kudretinde “*Kün fe-yekûn*”¹⁰
- 15.‘Arş-ı kûrsî¹¹ sipihr-i bukalemûn
 Nûsha-i hikmetinde nokta-i nûn
- 16.Gör ki mûlk –i cihân içinde bedî‘
 Pûr idüp ‘ayn-ı hikmetinde cemî‘
- 17.Zîrümüzde basît ‘arz itmiş
 Fevkümüzde semâyı farz itmiş
- 18.Bî-‘imâd itmiş âsumânî bend
 Rahmet-i Bâri hem-çü ebri semend
- 19.Reg-i zîr ü zemîn her âb-ı revân
 Donanır ‘arz her cibâl-i girân
- 20.Sanma oldı ‘uyûn zemîn üzre
 Akıdur çeşmini enîn üzre
- 21.Bulmaga kurb-ı Hakka cây-ı güzâr
 Zâr zâr aglayup akar enhâr
- 22.Ger hacer ü şecer ger âb ile hâk
 Bahr ü ber içre hem dü-âb-ı simâk
- 23.İtdiler meskenetle hep subhda
 Getürür ‘abdi işbu sı̄ vecde
- 24.Gözüñ aç sen hey âdem oglanı
 Saña kalmaz bu mesken-i fânî
- 25.Seni yokdan var itdi dil-i sübhân
 Bir avuç hâke virdi lutf ile cân

¹⁰ “Ol (der) hemen olur.” Kur’ân 2/ 117.

¹¹ “Yüce arş, taht, sedir.” Kur’ân 9/ 129.

26.Hazretine ‘ibâdet eyleyesin
Vahdet-i “lâ-şerîke leh”¹² diyesin

27.Sen ise olduñ ey dil-i mahzûn
Nefs-i emmârenüñ elinde zebûn

28.Her kaçan eyleseñ kiyâm u vuzû
Gelür ol demde yâre câm u sebû

29.Durup el baglasañ namâza hemân
Tâ seründe hevâ-yı seyr ü çemân

30.Eyledükce rükû’ a niyyet sen
Meyl-i dil sûy-i yâr-i sîmîn-ten

31.Secdede fîkr-i zülf-i ‘anber-bû
Tâk-ı mihrâb olur hayâl ebrû

32.Hayl-i müddet gelür selâma zamân
Yâri görmekdürür dilünde hemân

33.Reh-i câmi‘ göñülde ‘ayn-ı cefâ
Cânib-i mey-gede şitâb-ı safâ

2b.

34.Ola serîrde mel‘anet der-kâr
Sâlis olduñ o demde yâhûd çâr

35.Pend-i Sa‘dîyi Hîzr-ı cân eyle
Dil-i mahzûnuñ gülsitân eyle

36.*Dem ki bî-çâre refî der-hâbî*
Meger ïn-penç -rûz der-yâbî

37.*Dûst nâ-pây-dâr dûst medâr*
Dûstî-râ nişâyed ïn-gaddâr

38.*Ey tehî-dest refte der-bâzâr*
*Tersemet pür-neyâverî destâr*¹³

39.Allah Allah bu mahz-ı ‘isyândur

¹² “Onun ortağı yoktur.” Kur'an 6/163.

¹³ “Uykuda çâresiz kaldığın an, bu beş günü(n ne demek olduğunu) anlarsın: Dost kalıcı değildir, dost bilmez; bu gaddarlık dostluğa yakışmaz. Ey pazarda eli boş kalan, boş sarığı taşımaktan korkarsın.”

Na‘m-i küfrânı Hak nümâyândur

40.Ey Kerîm ü Rahîm ü Gaffârâ
Ey Semî“ ü Basîr ü Settârâ

41.Dîde-i eşk-rîz –i âdem için
Sîdk-ı kalbile dökdüğü nem için

42.Hazret-i Nûh hakkı kim dâ’im
Rûz şeb da‘vet itdi ol kâ’im

43.Ol Halîlüñ ki nâmi İbrâhîm
Âteşi itdüñ aña berr ü na‘îm

44.Hasret-i iştîyâk-ı Ya‘kûba
Sabr-ı mihnet-güzâr Eyyûba

45.Hazret-i Yûsufuñ cemâli için
‘Îlm-i ta‘birde kemâli için

46.Sîdk-ı va‘d-i cenâb-ı İslâmâ‘il
Vakt-i bismil-nümâ-yı sûz-ı Halîl

47.Be-hak-ı kurb-ı hazret-i Mûsâ
Nefes-i rûh-bahşât-ı ‘Isâ

48.Şeref-i Ka‘be-i mükerrem için
Âb-ı rûy-ı Habîb-i ekrem için

49.Ol habîbüñ ki server-i *Levlâk*¹⁴
Olmasar olmaz idi nüh-eflâk

50.‘Âlemüñ halkına o ‘illetdür
Ümmeti hayr-ı cümle ümmetdür

51.Hâtemü'l-enbiyâdur ol sultân
Oldı zuhrında nûr-ı mihr nişân

52.Cümle mürsellerüñ o şâhidur
Şeb-i mi‘râc anuñ güvâhidur

53.Be-hak-ı Çâr-yâr o sultânlar
Dîne revnak viren dür-feşânlar

54.Ol iki dürr-i binâgûş-ı felek

¹⁴ “Sen olmasaydın felekleri yaratmadım” Hadis. Ahmet Serdaroglu (1966). *Mevzuat-i Aliyyü'l-Kâri Tercümesi*. Ankara. 99.

Sırr-ı *Levlâk kurret-i ‘ayn*¹⁵-ı melek

55.Ya‘ni şâh Hasan Hüseyen –i şehîd
Ser- tâc-ı girân-bahâ-yı seyîd

56.Dil-i vîrânumı sen itme melûl
Be-hak-ı hânedân-ı pâk Resûl

3a.

57.Dâ’imâ ‘aşkuñile ma‘mûr it
Nûr-ı tevhîdüñile pûr-nûr it

58.Virme ruhsat ki ‘aşk meçâzî ola
Basayum vâdi-i hakîkate pâ

59.Yâ İlâhi hidâyet eyle baña
Lütfuñile ‘inâyet eyle baña

60.Sıdk-ı kalbile tâ‘at eyleyeyin
Cân u dille ‘ibâdet eyleyeyin

61.Ehl-i takvâyı baña yâr eyle
Ehl-i fiski yanumda hâr eyle

62.‘Ulemâyi baña edîb eyle
Mührini kalbüme habîb eyle

63.Cühelâ virmesün selâmı baña
Girmesün gûşuma kelâmı baña

64.Beni nâ-merde kılma sen muhtâc
Hân-ı ihsânuña doyur koma aç

65.Oldugı demde nefsüm âhir –i dem
Fâ’ide virmez anda hayl ü haşem

66.Beni îmânum ile hem-râh it
Gûşe-i cenneti baña râh it

67.Baña sen eyle ey kerem-kâni
Dü-cihân içre lutf u ihsâni

68.İsmümi itdüñ ey İlâhi Sa‘îd
Beni sen rahmetüñden itme ba‘îd

¹⁵ “Göz bebeği, gönül sevinci.” Kur'an 25/ 74.

Fi'n-na'tı Resûlü's-sakaleyn

..-- / ..- / ..-

1. Gele ey hâme-i şikeste-rakam
‘Anberîn-nefha-rîz-i müşgîn-dem
 2. Na‘t- gûyâ olup efendimize
Tûşe-i âhiretle kendimize
 3. Medh-i *Levlâk* ile olup gûyâ
Râh-ı na‘t içre ol biraz pûyâ
 4. Gerçi haddüñ degüldür evsâfi
Oldı Hak hüsn-i hulkı vassâfi
 5. Yiñemem ‘aczüm ile hâmemi ben
Cûr’etüm ‘afv eyle yâ Rab sen
 6. Ey sipihr-âsitân Resûl-i Hûdâ
Vey tarîk-i hidâye râh-nûmâ
 7. Sensin ol şâh-ı seyyidü'l-kevneyn
Muhbir-i sâdîk u zü'l-haremeyn
 8. Oldı ey bülbül-i kelâm-ı İlah
Gülşen-i vahdetüñ kelâmullah
 9. Sen cesîm ü şeffî'-i ümmetsin
Hem şefâ'at -ger-i kiyâmetsin
 10. İrdüğinde makâm-ı mahmûda
Sen şefî' cümle bûd u nâ-bûda
- 3b.**
11. Olmasan sen murâd-ı hazret-i Hak
Yaradılmazdı ‘âlem-i mutlak
 12. Bu kadar râh-ı enbiyâ-yı Hûdâ
Müştak-ı münye nûruñ oldı aña
 13. Katre-i hûy-ı nûruñ oldı çü gül
Aña âşusfte haşre dek bülbül
 14. Sâhibü'l-burâksın sâhibü't-tâc
Sâhibü'l-isrâ vü sahibü'l-mî'râc
 15. Saña mev‘ûd olan ki kevserdür
Rîg ü sengî ki dürr ü cevherdür

- 16.Saña mahsûs vâkı‘a-i mi‘râc
Kûr çeşmân-ı i‘tizâle sirâc
- 17.‘Arş u ferş oldı zîr pâyuñda
Kaldı Cibrîl kurb-ı câyuñda
- 18.”Üdnü minni”¹⁶ kelâmı irdükde
Hazret-i Hak peyâmı irdükde
- 19.Ol safâ ol ‘atâ beyân olmaz
Lutf-ı Hak nakl ile ‘ayân olmaz
- 20.Rahmet ile getürdüñ ümmete
Cây-ı pencâh vakt-i penç namâz
- 21.Ey kerem-kâri-i habîb-i Hûdâ
Hâdi-i ‘arz-ı muktedâ-yı semâ
- 22.Gerçi çokdur bu ümmetüñde günâh
Gam degül hâk-i pâyüñ itse penâh
- 23.Bâ-husûs ‘arz-ı hâl ider bende
Rû-siyeh bu sa‘y ile şermende
- 24.Gerçi nefس-i hevâya mecbûrum
Silk-i ümmet içinde mestûrum
- 25.Olamam ümmet olmaga lâ’ik
Hüsн-i hulk içre şehâ sen fâ’ik
- 26.İtmeyüp red kabûl eyle şehâ
Ümmetümdür di haşr içinde baña
- 27.Kıl şefâ‘at eyâ resûl meded
Yoksa nâr içre yandı gitdi cesed
- 28.Yâ İlâhî o şâh-ı *Levlâke*
Reşk-i cennet o ravza-i pâke
- 29.Günde yüz biñ ola salât-ı selâm
Ümmete işbu oldı hayr kelâm

3.

Der-Medh-i Çahâr-yâr-ı Güzîn
..-- / ..- / ..-

¹⁶ “Bana yaklaş”.

1. Gele ey kilk-i hoş-sarîr-inevâ
Cilve-i nev-nümâ-yı tâze-edâ
2. Hazret-i Çâr-yâr vasfi merâm
Eyle ey hâme-i şikeste-hîrâm
3. Ol çehâr-yâr ile oldu ‘atîk
Ya‘ni Bû Bekr kim refîk-i şefîk
- 4a.**
4. Fahr-ı hazret-i kâ’înâtâ uyar
*Sâni isneyn o iz hülmâ fi ’l-gâr*¹⁷
5. İtdi mi‘râcî evvel ol tasdîk
Dindi ol cihetden aña Sîddîk
6. Mâl cânîn Resûle kıldı fedâ
Oldı anuñçün ‘abd-i hâs-ı Hûdâ
7. Cümle ümmetden eddal ü ekrem
Hayr-ı ümmet o emced ü efham
8. Yok nihâyet faziletine anuñ
Vasfi haddüñ degül Sa‘îd senüñ
9. Hazrete yâr-ı sânî oldu ‘Ömer
Münfek olmadı hîç feth ü zafer
10. Küfrden fark iderdi islâmı
Dindi Fârûk o serverüñ nâmî
11. Râh-ı şeş-mâhdan işaret idüp
Nâsa izhâr-ı hârik ‘âdet idüp
12. Hışmile parmagıyla ol server
Kayseri tahtdan itdi zîr ü zeber
13. Âfitâba nazar idince hemân
Kararup kalmaz idi tâb u tüvân
14. Sen ‘aceb itme ani ey güm-râh
Nûr-ı Hakla nazar ider ol şâh
15. Sâlis-i yâr Hazret-i ‘Osmân

¹⁷ “Üzülme, Allah bizimle beraberdir”, Kur’ân 9/40. âyete meâlen .

Kâmi‘u'l-küfr ü câmi‘ü'l-furkân

16.Sâhibü'l- 'ilm idi kân-ı hayâ
Menba‘-ı sîdk idi 'ayn-ı vefâ

17.Şöyle sâhib-hayâ idi ol şâh
İdemezdi melâ'ik aña nigâh

18.İki kez oldı hazrete dâmâd
Nûrı olmışdı âsumânda 'imâd

19.Hâhişiydi rızâ-yı Rabb-i celîl
Mâlini râh-ı Hakda itdi sebîl

20.Kâtib-i vahyi şâh-ı *Levlâküñ*
Hem vezîri o server-i pâküñ

21.Sâlide râbi‘ olmışdı 'Ali
Şîr-i Hak fâzıl-ı edîb ü velî

22.'Ilm şehrine bâb¹⁸idi ol şâh
Bu hadîsi didi Resûlullah

23.Girse meydâna ceng içün bî-bâk
Zehre-i düşmenân olır idi çâk

4b.

24.*Her ki bâ-haşr-ı Hak zened pençe*¹⁹
*Pençe-i hîş –i Sikender sence*¹⁹

25.Cümleden işbu fazlı artık idi
Pâyını keff-i Mustafâya kodı

26.Yiter ey hâme eyle hatm encâm
*Raziyallahu 'anhüm*²⁰ eyle kelâm

27.Ba‘d-ez-în gel kelâm-ı maksûda
Mâcerâ-yı dil-i gam- endûda
4.

Der-Sebeb-i Te'lîf

... / .-.- / ..-

1.Meskenüm evvel idi şehr-i 'adem
Çünkü basdum yoluña ben de kadem

¹⁸ “Ben ilmin şehriyim, Ali kapısıdır.” Hadis. Ahmet Serdaroglu (1966). *Mevzuat-i Aliyyü'l-Kâri Tercümesi*. Ankara. 43.

¹⁹ “Kendini iskender pençesi seçen herkes, mahşer gününde el çırpar(dövünür).”

²⁰ “Allah ondan râzi olsun.” Dua.

- 2.Nazar itdükde bu zemîn ü semâ
Bir ‘aceb kâr-gâh-ı sun’-ı Hûdâ
- 3.Nazarum rûşen oldı bir şehre
Dindi dünyâ-yı dûn uydı mihre
- 4.Kubbesi lâciverd reng üzre
Hem zemîni ki hâk ü seng üzre
- 5.Şu‘le-engîz olup semâda nûcûm
Zemîn olmuş cihânda âteş-i mûm
- 6.İki kandil –i pûr-ziyâ ki cihân
Rûşen olmuş heme zemîn zamân
- 7.Nûr-bâş olmuş ‘âleme yek-ser
Birinüñ nâmî şems biri kamer
- 8.Dahi arz-ı semâda ol Sübâhân
Eylemiş devr devr-i hikmet-‘ayân
- 9.Yayılop her fezâda kûy ile şehr
Akıdup her zemînde cûy ile nehr
- 10.Berr ü bahr içre yaradup heyvân
Kimini cin idüp kimin insân
- 11.Kimi berrî kimisi bahrîdür
Kimi köylü kimisi şehrîdür
- 12.Kimi olmuş cerîde der -sahrâ
Kimi dahi perende-gîr-i semâ
- 13.Cümleden eşref itmiş insâni
Eyleyüp nutk u fehm üzre anı
- 14.Çün murâd itdi itmekle ikrâm
Cümle mahlûkî kıldı hükmîne râm
- 15.Eyleyüp her gûrûh cây-ı mu‘ter
Dahi peydâ idüp ganemle mücter
- 16.Kendülerçün ma‘iyyet itmişler
Âlet-i ‘ayş u ‘îşret itmişler
- 17.Eylemiş hikmet ile Bâri Hûdâ
Kimini şâh kimini de gedâ

18.Kimi pâşâ kimisi beg olmuş
Kimi buçuk kimisi yek olmuş

5a.

19.Kimi de ‘ilme fazl ile meşhûr
Kimi câhil kimisi de magrûr

20.Kimi torlak kimisi şeyh-i riyâ
Ekseri kizb-gûy-ı zerk-nûmâ

21.Kimi ‘âbid kimisi de fâsık
Bî-zebân kimisi kimi nâtîk

22.Kimi gûyende kimisi çengî
Kimi teryâki kimisi bengî

23.Kimi şâh-ı cihân kimisi de hân
Kimi de mîr-zâ kimi de sultân

24.Kimi çavuç kimisi de kapucî
Kimi hâtır yûkar kimi yapucî

25.Kimi ‘arz ehli kimisi eşekk
Paşa nâmiyla fahr ider her seg

26.Kimi kâtib kimisi de hattât
Kimi müslim kimisi olmuş tât

27.Kimi çorbacı kimisi ırgâd
Kimi ma‘mûr kimisi ber-bâd

28.Kimi fâ‘il kimisi de mef‘ûl
Kimi ‘âkil kimisi de ma‘zûl

29.Kimi râkib kimisi de merkûb
Kimi ‘âkil kimisi de meczûb

30.Kimi de şâ‘ir-i fasîh ü belîg
Şu‘arâ mecmu‘ında şî‘ri melîh

31.Hem gazel-gû kasîdede üstâd
Mesnevî vü rübâ‘îye mu’tâd

32.Sad-ma‘anâyı bikr- kâr itmiş
Gayb ahvâlin âşikâr itmiş

33.Eyledükçe gazâl-i ma‘nâyı râm

Eyler ol hâl –i zülf ü âna devâm

34.Keyf-i ma‘nâ-yı şî‘ri kim mül olur
Kilk-i hoş-gûyi elde bülbül olur

35.Şî‘r-i rengîn –i ‘Örfî vü Tâlib
Hüsн-i teşbîh ma‘na-yı Sâ‘ib

36.Tarz-ı vâdi-i hâs Selîm kuli
Nâzîm-ı hoş-zemîn Nâsîr ‘Ali

37.Hem hayâlât-ı tâze-i Şevket
Eylemiş şî‘r içre cem‘iyyet

38.Şâ‘ir ol kimse vâdide bî-rakîb
Tâze endîşe ile şî‘rini zîb

39.Yohsa dinmez ol ahmaka şâ‘ir
Hâm-ı ma‘nâsı noktada zâhir

40.Ne kavâfi ne vezn-i şî‘r añlar
Dinse aña kamer o mihr añlar

41.Hüsн-i teşbîh ü istî‘ârâtı
Bilmeyüp halt idüp ‘ibârâtı

5b.

42.Tab‘-ı kec muktezâ-yı fehm-i sakîm
Şî‘r-i bed lafz-ı me‘ânî-i ‘akîm

43.Şöyle böyle şî‘ri eyleme sükut
Olma pür-gû sakın zebânın tut

44.Nazar itdüm o kavme çün ben de
Olmamış mürde cümlesi zinde

45.Ölmez ol kimse şî‘ri dîvânı
Cây ider dest-i ehl-i ‘îrfânı

46.Kendüler zîr-i hâkde mestûr
Dürr-i eş‘âr-ı nîgi silk-i sütûr

47.Zindedür bu cihânda ehl-i kemâl
Şâhid-i tab‘ı ile ‘arz-ı cemâl

48.Merde ancak ki nâmdur maksûd
Bu cihâna gelen olur nâ-bûd

- 49.Hâsılı şı‘r için heves itdüm
Kuvvet-i tab‘a dest-res itdüm
- 50.Akdı ol suya bu dil-i meyyâl
Bagladum tâze gûne böyle hayâl
- 51.Şu‘arâ hayline olup pey-rev
Bulayum tarz-ı hâs-ı vâdî-i nev
- 52.İdeyin şem‘a-i şûhumı dîvân
Pâdişâhâne tarh idüp eyvân
- 53.Hem-çü nakş-ı nigâr-hâne-i Çîn
Der ü dîvârin eyleyem pür-zîn
- 54.Şi‘r-i hûb el-hak oldu şehr-i ‘azîm
Ola nâzîm belâgat içre kelîm
- 55.Beyt-i evvel ki şehr bâbıdur
İki mîsrâ‘ iki kanadıdur
- 56.Gire seyrân içün çü hânende
Dil-i mürde olur ol dem zinde
- 57.Gûşe gûşe dükânçe-i teşbîh
Dürr-i kelâm-ı şebek ile şebîh
- 58.Tâze ma‘nâ olup gûrûh gûrûh
Bikr-i fîkr-i hayâl-i dürr enbûh
- 59.Sebze vü serv ile âb-ı revân
Gül-i gûlzâr bûlbûl-i nâlân
- 60.Sünbûl-i turra-ı hatt-ı hoş-bû
Çeşm-i âhû-yı zülf-i ‘anber-bû
- 61.Müje-i tîz gamze-i cellâd
Hûb-rûyân-ı melah u nev-şâd
- 62.Âsumân u zemîn ü mâh ile sâl
Hem bahâr u hazân u rûz leyâl
- 63.Mevzu‘-ı dil-keş ile âb hevâ
Gûlşen-i bûlbûl ile bâd-ı sabâ

64.Şi‘r-i hûb içredür bu cem‘iyyet
Şi‘r hakkında dindi biñ hikmet

6a.

65.Kuvvet-i tab‘ elde lîk çé sùd
Şimdi birdür cihânda bûd ne-bûd

66.Âh ta‘ân cihânda memlûdur
Hâsid-i bed-kelâm u bed-gûdur

67.Fursat ister ki saña ta‘n ide
Süfehâ gitdiği tarîke gide

68.Şi‘r olursa eger ki dürr ü le’âl
Eyü disün mi zümre-i cühhâl

69.Hâsılı süst-dil olup kaldum
Bahr-i esfâra nice kez taldum

70.Gitdi geldi baña bu endîşe
Ey kelâm-âver-i suhan-pîşe

71.Ta‘n-ı ihvâna olma sen mahzen
Böyledür çünkü kâr-ı çarh cerden

72.Ol ki ‘irfân u ‘ilmi kâsiddür
Hâ’in-i bed-tebâr-ı hâsiddür

73.*Hûy bed der- tabî‘ati ki nişest*
*Ne-reved cüz be-vakt-i murg ez-dest*²¹

74.Tîr-i ta‘ne ne gam isek de hedef
Dindi men sannefe kad istihdef²²

75.Kalem ‘anberînini der-kâr it
Sayd-ı ma‘nâyı şûh-ı ebkâr it

76.Eyledükce elünde hâme sarîr
Eylesün şî‘r-i pâküñi tahrîr

77.Eyledüm ‘ayniye niyyet-i tâze

²¹ “Tabiatında kütü huy olan, oturur; kuşların vaktinde (seher vakti) elinden hiçbir şey gelmez.”

²² “Kim tasnif ettiyse hedefe ulaşmıştır.”

Şâh-bâz-ı dil itdi pervâze

78.Çünkü basdum bu râh-ı tengे kadem
Beni nazm içre yâ Rab eyle ‘alem

79.Şi‘r-i hûbum cihânda meşhûr it
Çeşm-i bedden kelâmumu dûr it

80.Beni eyle belâgat içre kelîm
Zübde-i nesl-i pâk âl-i Selîm

81.Sadef-i tab‘umı idüp ma‘den
Her kelâmumu eyle dürr-i ‘Aden

82.Ele dîvânüm alalar zürefâ
Diyeler ravza-i dil-i ‘urefâ

83.Mey-i peymâ-yı ‘aşk it suhanum
Der-me‘ânî-i genc kıl dehenüm

84.Baña lutfuñı yâ Rab eyle refîk
Bulayum tarz-ı vâdi-i tahkîk

85.Hüsni nazm ile olayın Hassân
Keremüñ ben za‘îfe kıl ihsân

KASİDELER

1.

Kasîde der-hakk-ı Resûl-i Ekrem Nazire-i Mi‘râciye

.--- / .--- / .--- / .---

1. Gel ey dil olma sen âşufte- kâr-ı fâni-i dünyâ
Egerçi nefs-i şûmuñ rûz u şeb itmekdedür igvâ

6b.

2.Meded çesm dilünde eyleyüp ol ‘âkîbet –endîş
Bu cây-ı bî-vefâyı kendüñ içün sanma sen me’vâ

3.Düşüp da‘vâ-yı nâ-sûd-ı mecâza olma sen gerdân
Kanı râh-ı hakîkat ya‘ni kim olduñ mı nâ-bînâ

4.Düşüp bir dâm-ı terdîd-i sivâya pây-der-gil sen
Nedür bu nâ-şekîbâyı bu hîrs-ı şûr bu gavgâ

5.Neden olduñ bu reh yohisa ma‘şûkuñ mı zann itdüñ
Nice şâh-ı cihânuñ kuyrugın yoldı zen-i dünyâ

- 6.Seni bir gün idiser tahte-i tâbûta ârâyış
Gerek Keyhüsrev Efrâsiyâb olsañ gerek Dârâ
- 7.Seni tûtî gibi ger eylese şekerle perverde
İder âmâs-ı kay-engîz mûyuñ zehr-i mâr-âsâ
- 8.Eser bâd-ı gurûriyyet başuñda serv-i ser-keş-veş
Vücûdunuñ nihâlin erre-i mevt itmede ifnâ
- 9.Meşakkatler çekersin kendüñe ârâm-ı yek-rûze
Bu cây-ı ‘âriyetde kasr-ı Şeddâdî idüp ibdâ
- 10.Güler itdüñ ‘ubûdiyet makâmın nîk ile irdüñ
Dimâgın eylemiş bir şevk-i fîkr-i rütbe-i vâlâ
- 11.Saña dem-keş vücûduñ ejdehâdur çâr- ‘unsurdan
Dehân-ı mâra düşmiş muztarib gûcişksin gûyâ
- 12.Topı da mâtivâ mî bend-i râh-ı menzil-i maksûd
Sabak-hân-ı hevâyı nakş-kâr-ı mel‘anet-ârâ
- 13.Tekâsüller idersin kâr-ı hayr içün idüp i‘râz
Tecâhüller idersin nâ-revâyı eyleyüp icrâ
- 14.Vücûduñla olursun gösteriş pirâye-i dûzah
Mukaddimce eger olmazsañ ey dil na‘t ile gûyâ
- 15.Nice na‘t âteş-endâzı dil-i kerrûbiyân-ı çarh
Nice na‘t âb-ı vuslat hayr-tab‘-ı ‘âşık-ı şeydâ
- 16.Nice na‘t-ı dür-i gûş i‘tibâr-ı hâdim-i eflâk
Nice na‘t-ı şerîf pür-zîb-i zülûf-i perçem-i hûrâ
- 17.Nice na‘t ol hulûs-kâr-ı tabakçe lü’lü-yı şeh-vâr
Sitâyiş –kâr-pâş –ı hâk-i pây-ı hazret-i *Tâhâ*²³
- 18.Benî mürsel-i kevneyn-i şefâ‘at –kârî’s-sakaleyn
Resûl-i *Kâbe Kavseyn* vusûl-i kurb-ı *Ev-ednâ*²⁴
- 19.Velî menzil-i Mahmûd-ı şeffî‘ü’n-nâs-ı her-mevcûd
Kerîmü'l-hilkat-i bih-bûd kelîm-i sırr-ı *Mâ-evhâ*²⁵
- 20.Besîr-ı sâdîkü’d-dâ‘î nezîrü'l-ba‘si vel-mâhâ

²³ Kur'an 20.

²⁴ “İki yay aralığı kadar; yahut daha az kaldı.” Kur'an 53/9.

²⁵ “Kuluna vahyettiğini (vahyetti).” Kur'an 53/10.

Sirâcü'n-nûr vel-hâdi hidîv-i bâ‘isü'l-arzâ

- 21.Emîn-i mesned-i ‘izzet me’âl-i maksad-ı kurbet
Penâh-ı ‘âsi-i ümmet şefâ‘at-bahşî-i ferdâ
- 22.Sezâ-yı lutf-ı Rab sermed imâmü'l-enbiyâ Ahmed
Habîb-i Hak Muhammed efser-i râye-i şeb-i Îsrâ
- 23.O sultân-ı ser-i ser-tâc evreng-i semâlet kim
Nigîn-i da‘veti altındadur dünyâ vü mâfihâ
- 7a.**
- 24.O şâh-ı kâm-rân –ı kâm-bahş-ı zîb-i millet kim
Cülûsiyla müzeyyen kıldı mûlk-i dîni bî-gavgâ
- 25.Zuhûriyla söyündi âteşi âteş-perestânuñ
Kudûmiyla tezelzül buldu tâk-ı gurfe-i kîsrâ
- 26.Kelîl oldı fasîhân-ı ‘Arab nâm-ı belâgatde
Olınca ol şeh-i ma‘nâ ana efsah ile gûyâ
- 27.Safâ-hîz-i leb-i âb-ı zülâlûñ çünki gûş itdi
Hicâbindan zemîne geçdi sâve gibi bir deryâ
- 28.Degûl encüm sükût itmekde leyîl-i mevlidüñ içre
Nisâr eyler semâdan bir tabak dür hâce-i bâlâ
- 29.Kumâş-ı âsumânı kıldı ol şeb tâye-i rîzvân
İdüp pûşîde gehvâruñı altun pullı bir hârâ
- 30.Harîm-i devletüñde hürmete der-kâr olup gîlmân
Şafakdan çekdi şâmi âteşin bir perde-i dîbâ
- 31.Se-rûze eyledüñ çavûş âgûş-ı melâ’ikde
Kapup zât-ı şerîfûñ ‘ayn-ı nâsa itdiler ahfâ
- 32.Nice elden ele gezdürmesün kerrûbiyân-ı çarh
Ki hîç gördükleri yok idi böyle gevher-i zîbâ
- 33.Hüdâyî bir kumâş –ı hâs kıldı zâ şeh-i zâtın
İdüp Hak zuhruña ol mühr-i mihri hâtem-i tamgâ
- 34.Olınca şakk-ı sadr esrâr-ı hikmetle olup memlû
Derûnuñ mahzen itdi genc-i ‘aşka ol güneh-bahşâ
- 35.Olup nâ-yâb çünki zerre deñlü sende senlikden
Habîbâ olmuş idüp nûrdan bir serv ser-tâ-pâ

- 36.Anuñçün sâye-endâz olmadı ol zât-ı bî-mislüñ
Ki mahzâ nûr idüñ ey pâdişâh-ı mülk-i istignâ
- 37.Habîbi nûr idi çün nûrını Hak şöyle cezb itdi
Ki ‘abdîn şebde da‘vet itdi *Sübhannezi esrâ*²⁶
- 38.Olup nâ-çâr küstâhâne kilk-i şûhumı kıldum
Me’âl-i kissa-i mi‘râc –ı hazretden biraz pûyâ
- 39.Ne yirdendür ‘urûci ihtilâfât oldu ketb içre
Serây-ı âsumânî diyü tahkîk itdiler ammâ
- 40.Meger ol şeb uyurdı gözleri bî-dâr idi kalbi
Irüp Cibrîl getürdü bir Burâk-ı âsumân-peymâ
- 41.Yüzin sürdi cebîn-i pâyine çün eyledi bî-dâr
Didi ey dayf-ı zü'l-ikrâm –ı ‘izzet-hâne-i bâlâ
- 42.Buyur lutf it seni kim da‘vet itdi Hazret-i Allah
Senüñ için getürdüm bir Burâk-ı cennet-i ‘ulyâ
- 43.Sa‘âdetle Burâk’a bindi ve’l-hâsil Resûlullah
Niçe yüz biñ melekle oldu Cibrîl huzr-ı bî-hemtâ
- 44.Tekaddüm itdi ervâh-ı nebîler’çün imâm oldu
Olinca yek-kademde aña menzil Mescid-i Aksâ
- 45.Pes andan göz yumup açınca irdi âsumân üzre
Irüp ol ki gök üzerinde oldu âsumân-ârâ
- 46.Nice seyr-i temâşâ görüdî her birinde ol hazret
Semâ-yı seb‘adan bir bir güzâr eylerdi rûh-âsâ
- 7b.**
- 47.Dahi yir yir semâda gayr-i ervâh-ı nebîlerle
Görüşdü tuhfe kâlâyı hediyye eyleyüp ibdâ
- 48.Behîş ü dûzahın ahvâli ‘ibret günini bir bir
Temâşâ eyleyüp ser-cümlesini gezdi Mustafâ
- 49.Yine bir dem içinde zîr-i serde menzili oldu
Koyup Cibrîli anda Hakka ‘azm itdi tek ü tenhâ
- 50.Kîlinca pây-der-gil hem Burâkin Refrefe bindi
Nice yüz biñ hicâbı kat‘ iderdi bî-per ü bâlâ

²⁶ “Her türlü kusur, ayıp ve eksiklikten uzak olan O (Allah) yürüttü.” Kur’an 17/1.

- 51.Kalup Refref de âhir yek-kedemde bî-mecâl oldu
Hüdâsına idüp ‘azm o imâm-ı sâhibü’t-takvâ
- 52.İrince hazret içün ‘arş –ı a’ zam oldu pây-endâz
Gubâr-ı makdem-i Ahmed ile itdi şeref peydâ
- 53.Pes andan soñra irdi kurb-ı Hakk-ı hazrete şöyle
Anuñ şânında varup *Kâbe kavseyen* ile *Ev-ednâ*
- 54.Ne arz u ne semâ var anda ne ‘arş u kalem ne levh
Cemât-ı südde yok hem çâr- ‘unsur oldu nâ-peydâ
- 55.Sabak-hân-ı *Tahiyat*²⁷ oldu ol dem hazrete sultân
Hüdâ lutf eyleyüp kalbine anuñ eyledi anhâ
- 56.İdince her kelâm-ı “*üdnü minni*” kurb olup tâhsîl
İderdi kat’ kurbiyetde nice menzil-i ma’nâ
- 57.Habîbine dahi biñ bir kelâmin söyledi Bârî
Velî bî-harf hem bî- nutk bî-savt idi ser-tâ-pâ
- 58.Hüdâ irgürdi ol şeb Mustafâyı kadr-i a’lâya
Nice dürlü kerâmetle velâyet eyledi a’tâ
- 59.Vucûdı mahv olup bir bahr-i ‘aşka oldu müstagrak
O yirde zât-ı Hakdan gayrı bir şey kalmadı aslâ
- 60.Olup mazhar Hüdânuñ lutfına âhir nüzûl itdi
Gerürdi ümmete Hak rahmetinden ni‘met-i ‘uzmâ
- 61.Salavât oldu birisi mü’minüñ işte mi‘râcı
İrişdürdi semâdan müznibîne eyledi ihdâ
- 62.Şeff‘ü'l-müznibînâ bu siyeh-rû ümmetüñdendür
Şefâ‘at kıl Sa‘îd-i zâr içün lutf it Hüdâvendâ
- 63.Ma‘âsîde şerîküm gelmemişdür belki dünyâya
Nola hâlüm benüm ol rûz-ı mahşer içre vâveylâ
- 64.Egerçi pür-kine ‘âsîyüm ammâ mü’min-i pâküm
Revâ mîdur kalam mahşer içinde bî-ser ü bî-pâ
- 65.Zebânum nagme-senc-i bülbül –i zâr-ı gül-i tevhîd

²⁷ Duâ, “yaşasın, var olsun!”

Bihamdüllah dilüm tasdîk-gûyi hazretüñ hâlâ

66.Egerçi itmedüm icrâ-yı suffet lîk sultânum
Ne kim Hakdan getürdüñ cân u dille didüm *âmennâ*²⁸

67.Baña lâzım saña tasdîk –i imânı edâ kıldum
Saña lâyık şefâ‘at yâ resûl it bendeñe icrâ

68.Nitekim câm-ı mihr bâda devr-i bezm-i çarh içre
Felekde neş’e-pâş –ı subh u şâm ola semâ-pîrâ

8a.

69.İlâhi ravza-i pâk Resûle müstedâm olsun
Şakâ’ik deste-i sünbul selâm-ı hoş-gül-i ra‘nâ

2.

Ramazâniyye Der-Na‘t-ı Resûli Ekrem SAV

... / ... / ... / ..-

1.Habbezâ mâh-ı şeref-bahş-ı mübârek ramazân
Âyet-i rahmet-i Hakdur ki nüzûl itdi hemân

2.Merhabâ şehr-i mûkerrem ki kudûmî virdi
Fâsika renc ü ‘anâ mü’mine nûr-ı rahmân

3.Mâh-ı nev sanma sıpihr üzre nûmû-dâr olmuş
Varak-i reng-i kebûd üzre berât-ı ihsân

4.Hâce-i çarh-ı felek geldi mübârek bâda
İtdi mûm şenligi zann itme nûcûm-ı rahşân

5.Kadem-i mâha nisâr itdi felek mürvârîd
Âsumân üzre idüp ‘ıkd-ı süreyyâyı ‘ayân

6.Kadem-i mujde-i mâh-ı ramazâna yâhûd
Zer-efşân hil‘at ile itdi semâyi pûşân

7.Hey’et-i kâ’ide-i seb‘a-i seyyâre degül
Yakdı şâm-ı ramâzan içre kanâdîl keyvân

8.Gör hilâl-i ramazân ‘arz-ı cemâl eyleyicek
Hacletinden yirüñ altında güneş oldı nihân

9.Ümmet-i müznbibe bu mâ’ide-i rahmetdür
Mûy-ı her-ten idemez şûkrini ger olsa zamân

10.Eyledi def“ kudûmiyla şürûr –ı fiskî

²⁸ “Înandık.”

Hâtem-i savm ile ma‘mûr-ı kerem oldu dehân

11.İdeli mâh-ı levend-i ramazân şehre nüzûl
Kendini duhter-i rez eyledi humda pinhân

12.Bâde-i nâba bedel vird ile hasb ide ciger
Bâde-nûşâne olinca müteveccih ‘armân

13.Zühd ‘azîz olalı ‘âlemde şu düşdi hisse
Haşerât-ı fitene –i mûlk-i ‘ademde zindân

14.Câmi‘ ü mescidüñ ebvâbı kûşâde olalı
Oldı metrûk-ı cihân hân-kah-ı pîr-i mugân

15.Bâde vü nuklı gören şimdi meger kim eyler
Zekan-ı reng-i şarâb-ı leb-i dil-ber seyrân

16.Oldı manzûrı meger hüsni hilâl-i ramazân
Berş efyûn –horı gör büt gibi kaldı hayrân

17.Dâs-ı tîz oldı yâhûd şekl-i hilâl –i şâ‘bân
Gerden-i hûşe-i keyf ehlini çekmekde hemân

18.Hâsılı gulgule-endâz-ı kudûmu virdi
Kimine nûr-ı şeref kimine derd-i bûrkân

19.Bu şeref her şeb aña tâ-be-seher besdür kim
Zâ’ir-i ravza-i şâh-ı resûl olur her ân

20.Nice şâh-ı resûl ol kim aña mahbûbiyyet
Kadd-i zîbâsına gûyâ ki biçilmiş kaftân

8b.

21.Sîrr-ı *Levlâke* muhâtab şeh-i ‘izzet- kevkeb
Lutf-ı âverde-i Rab mahzen-i sîrr-ı Sübhân

22.Rahmet-i ‘âlemiyân ‘illet-i îcâd-ı cihân
Bâ‘is-i kevn ü mekân server-i her nefes ü cân

23.Püşt-gîr –i ümerâ muzlime-dâd-ı fukarâ
Sîla-bahş-ı şu‘arâ pâdişeh-i her dü-cihân

24.Menba‘-ı lutf u kerem muhbîr-i gûlzâr-ı irem
Sâdikü'l-va‘d-i harem vâsif-ı sîrr-ı Kur‘ân

25.Zînet-i arz u semâ hazret-i mahbûb-ı Hûdâ
Reh-ber-i râh-ı hûdâ vahy-i resân-ı Mennân

- 26.Hazret-i fahr-ı resûl Ahmed-i muhtâr ol kim
Yaratıldı yüzü suyına anuñ kevn ü mekân
- 27.Öyle bir şâh-ı kerem-pîşedürür kim her dem
Kapusı halkasıdur ümmetine dâr-ı emân
- 28.Hâsil-ı bâr-ı güneh-kâre ne gamdur olsa
Lebi merhem-deh-i zahm-ı dil-i ümmet cünbân
- 29.Oldı mahz saña çün kim ki makâm-ı Mahmûd
‘Âsiyânı idemez nâr-ı cehennem sûzân
- 30.Makarü'l-hamd senüñ ümmetüñe reşk eyler
Ümmet-i ‘ârif –i kalb-i kudemâ-yı devrân
- 31.‘Akl-ı kül ‘ilm-i ledün içre sabakdaşuñdur
Yine ümmîlik ile şöhretüñ ey şâh-ı cihân
- 32.Takviyet-bahş ola tâ kâ’ide-i lutfuñla
İtdi te’hîr-i nûzûl vakt-i Mesîhâya zamân
- 33.Kandurur ümmet-i dil-teşneñi rûz-ı mahşer
Eyleseñ lutfuñla âb-ı şefâ’at cereyân
- 34.Olmasa dâr-ı şifâ-yı keremüñ dünyâda
‘Âlemüñ derdine olmazdı cihânda dermân
- 35.Mey-i lutfuñla şinâsetdür olursa nola
‘Andelîb-i kalemüüm tarz-ı gazelde gûyân
- 36.Nûr-ı ruhsâruñı seyr ideli ey şâh-ı cihân
Eyledi mihr-i muhabbetde vûcûdın sûzân
- 37.Nâzır-ı tâb-ı temâşâ-yı cemâlüñ olamaz
Kudsiyân-ı harem-i hâs olurlar heyvân
- 38.Âhu-yı deşt-i Hîtâ hûn-ı dîlin müşk eyler
Sürme rîzîde-i mâzâg-ı basardan müjgân
- 39.Nefha-i bûyuñ iren kimse dimâga nitsün
Sünbül-i cennet ü gül-deste-i bûy-ı reyhân
- 40.Kadd-i zîbâñ ile ol turraña kurbân olsun
Bûy-ı ezhâr-ı ‘Aden server-i serv-i çemân
- 41.Saña biñ cân ile âşufte hezâruñdur hep

Bülbülân-ı melekût ey gül-i bâg-ı ‘Adenân

9a.

42.Kumrı-ı cân-ı fakîr olsa idi makbûlüñ
Hasret-i şevk-ı cemâlûñle iderdüm kurbân

43.Dest-gîr ol koma üftâde Sa‘îd –i zâruñ
Bir kuluñdur kapuña geldi getürdi îmân

44.Ey şeh-i mükremet-i dâd-ı şefâ‘at-kârân
Ser-i dîbâçe-i rahmetde Muhammed ‘ünvân

45.Sensin ol mazhar-ı sırr-ı kerem-i Hayy –ı kadîr
Hizmetünde senüñ olmakda melâ’ik pûyân

46.Râh-ı tatyîb-i dil-i pâküñ içün buldı zuhûr
Dâr-ı cennetde olan cümle kusûr-ı eyvân

47.Rûz şeb ravza-i pâküñde çerâguñ olmuş
Nûr-ı hurşîd –i ziyâ-bahş ile mâh-ı tâbân

48.Benüm ol râh-rev-i tâlib-i vâdi-i zülâl
Kesret-i zünb ile tahmîl olinup bâr-ı girân

49.Zann ider nâzır olan ‘ibret ile mahşerde
İnhinâ vü kad-i ham-küstemi gûyâ ki kemân

50.Oluram ümmetüñem rûy-ı keme şermende
Olmadum matlabuña râh-ı rızâñı cûyân

51.İtmem inkâr siyeh-rûy-ı tebeh-kârum ben
Nefs-i şûmum baña zulm eyledi feryâd u figân

52.Şöyle ‘isyân ile dil âyinesi jeng –âlûd
Ayamaz şâhid-i nev-hîz –i ‘amel-cilve bir ân

53.Dil hevâ vü hevese oldı rübûde o kadar
Her ne dem vakt-i salât olsa gelür bâr-ı girân

54.Ey kudûmi şeref-âverde-i ‘arşü’r-Rahman
Ey velî mahzen-i Hak mevrud u Hayyü’l-Kur’ân

55.Hidmet-i şâh –ı mecâzîye kasîde viricek
Sila ümmîdin iderler su‘arâ-yı devrân

56.Rûz-ı mahşer olıacak dir sîla ey şâh-ı kerem
Baña da nakd-i şefâ‘atle hemân hatt-ı emân

57.Kalemüm zemzeme-pîrâye suhan teng oldı
Kıl salavât demidür buldı kasıde pâyân

58.Nitekim sakf-ı semâvât-ı felek durdukça
İde âmed şodi hurşîd ile mâh-ı ramazân

59.‘Aded-i katre-i bârân-ı nûcûmdan efzûn
Dahi her bir nefes-i tîz sebük-hayr-ı revân

60.Ravza-i şâh resûl rûz şeb olsun yâ Rab
Salavât-ı gül-i hoş-bûy ile hem-reng-i cinân

3.

**Der-Sitâyiş-i Hâne-Münakkaş-ı Bî-Nazîr Ki Hazreti Halîm
Giray Hân Binâ-Fermûdeest Der-Kasr-ı Çagırgan**

9b.

... / ... / ... / ..-

1.Bârekallah zihî hâne-i pûr-nakş-nûmâ
Matla‘-ı ‘izz ü sa‘âdet şeref-i rûh-efzâ

2.Habbezâ hey’et-i tâvûs-ı münakkaş –kârı
Cilve-i bukalemûn tarz-nûmâ-yı zîbâ

3.Ceşm-i nezzâre olur şâ‘şa‘a-ı hayret-hîz
Gûiyîyâ mihr-i sa‘âdet içün olmuş me‘vâ

4.Câmlar itmiş o deñlü anı rûşen-dil kim
Her tarafındanagar envâr-ı tecellî gûyâ

5.Revzen-i şarkî siyeh revzen-i se-kîble ile
Câ-be-câ hazreti üçler gibi kîlmışdur câ

6.Aña hikmet meger üstâdınıñ itdûgi dûrûr
Eylemiş ‘ibret-i temsîl-i cihâni îmâ

7.Nakş-ı reşk-âver-i rûh kalem-i Bihzâdî
Remîde cân-ı hased-kerde-i Mâni ammâ

8.Oldı her nakş –ı kebûdî sanasın âb-ı revân
Aña yir yir mahal-i sebzî çemenzâr-ı safâ

9.Subh-ı hurşîd ile revnak-deh olur câmları

Şu‘le-i şem‘ ile şeb virmede gün gibi ziyâ

10.Nedür ol hüsn-i dil-âvîz o vâdi-i sipend
Âb-ı zer ile gören dir ki çekilmiş tugrâ

11.Pîse-gâhında ya ol suffe-ı hûb-ı vâsi‘
Ne ‘aceb hûb yakışmış nice düşmiş hakkâ

12.Armagan gitse olur Çîne eger tasvîri
Resmini alsâ da tuhfe idüp üstâd-ı Hîtâ

13.Gör ki ol çeşme-i ser-lûle-i âb-ı şîrîn
Dil döker merdüm-i âmed-şodegâne gûyâ

14.İtdi ol çeşme ile himmet-i tab‘-ı dâver
Hak bu kim kâ’ide-i âb-ı hayâti icrâ

15.Nice dâver ü halîm-tab‘ o hâkân-nijâd
Zâtıdur bu sadef-i çarhda dürr-i yekâtâ

16.Tab‘ıdur kân-ı şecâ‘at o sehâvet-pîse
Âb-ı rûy-ı şeref-i âl-i Selîm olsa sezâ

17.Ey şeh-i mükremetâ hak bu ki zu‘m -bendüñ
Görmedi mislini bu çarhda çeşm-i ‘ankâ

18.Târ-ı fikre deri vasfuñ nice mümkün çekmek
Eylesem secde-i endîşe –keşîde itrâ

Bir dem içinde ki çün himmetüñ ‘âlî itdüñ
Eyledüñ böyle kelefler ile hûb bînâ

Göricek hendese-i tarhına tâhsîn eyler
Dâhil olan bu sarây içre eger bay u gedâ

Kanı bir böyle binâ mülk-i cihân içre dahi
Şarkdan garba dek ifrât ile var ise sala

Mu‘tedil şekl-i pesendîde-i bünyâd-ı kavî
Mürtefi‘ menzil-i hem-zânû-yı tâk-ı kisrâ

10a.

Sebeb devr-i gam-endâzî-i rûh-yâb-ı ferah
Saykal-ı jeng-i dil-i âyine-i keyf-nümâ

Saña dâd-ı Hak imîş togrısı mi‘mârî tab‘
Böyle kimseyi Mesîh görmedi makarr-ı ‘anâ

Vaz‘-ı hâk üzre ne hâcet kudûmîn seyr için
Sû-be-sû âdeme dehlîzi durur râh-ı hedâ

Pîse-ğâhında kemer-besté gulâmî gibi hem
Tek ü pû kerdesidür şâm u seher bâd-ı sabâ

Al parmaklıklıla virgüren âdem bî-şek
Beñzer ol dest-i ‘arûsa ola anda hînnâ

Feyz-i envâr ile pürdür ki derûnî o kadar
Hep ber-â-ber görünür çeşmümize subh mesâ

19.İsterem hazreti Hakdan ki Sa‘âdet Giray
O la tâli‘ bu safâ-hânedede her demde şehâ

20.Haşre dek ide mu‘ammer anı lutf-ı Bârî
Pîse olsun şeb ü rûz ‘işretile zevk safâ

21.Ey Hüdâvend-i kerem-kâr şecâ‘at-pîse
Lutf-ı şîrînün idüp tüti-i tab‘um gûyâ

22.İtdi mahlût-ı suhan-senci vü sihr ü i‘câz
Kıldı âmîzeş-i târîh ü kasîde imlâ

23.Emr kılduň baña bu hâne-i hûbuň vasfin
Meh-mâ-emken-i evsâfini itdüm inşâ

24.Bendeñe emr-i temeddüh buña mahsûs oldı
Veche tahsîs ile bu hâne ‘aceb müstesnâ

25.Gerçi gül gibi niçe hâne-i dîger vardur
Goncadur cümle miyânında bu hâne hâlâ

26.Öyle gonca ki gören bir kez olur aña hezâr
Bûy-ı nakş-ı güli eyler dili mest ü şeydâ

27.Kayd-ı mümtâz-ı suhan-gû ile der-kâr oldı
Fîkr târîhine düşüp Cem ‘asîr-i şu‘arâ

28.Cevheri harf ile buldum güher itmâmin
Râh-ı efkâra olup bende Sa‘îdâ pûyâ

29.Harf-i menkût ile nâçâr didüm târîhin
*Bârekallah*²⁹ zihî hâne-i pür-nakş-nümâ

²⁹ “Allah mübârek etsin.” Aslı tebârekallah, Kur’ân 7/54.

Sene: seb‘e vü sittine ve mi’ete ve elf
(1116)

MUSAMMATLAR

1.

Terkib-i Bend Der-Rûm İli Kenefine

--. / -. / --. / -.

I

- 1.Yâ Rab ne tîre-kevkeb olur bu Sa‘îd-i zâr
Mülk-i cihânda bulmadı yek zerre i‘tibâr
- 2.Sûret-nümâ-yı mahzenü'l-hüsâm iken dili
İdbârı kîr-gûn ile olmakda pür-gubâr
- 3.Jengâr-ı ye’si kalmadı enîne-i dilüñ
Görünmez oldu şâhid-i ümmîd-i nev-bahâr

10b.

- 4.Hîrmen-ı dilde nûsha-i maksûda başladı
Pergâr-ı dûn-ı tâli‘ ile çizmege kenâr
- 5.Dâr-ı cihânda kilk-i senc-gûsı hem-demi
Ma‘nâ-yı bikr-i şâhidi mi şî‘r-i âb-dâr
- 6.Çekdi ‘arûsî dûnuñ ey çarh sîneye
Taht-ı safâda bir süri nâ-ehl nâ-be-kâr
- 7.İkbâl eyle ehl-i dile ey felek yeter
Hod-bîn hod-furûşları eyle zâr zâr
8. İtdüñ Sa‘îde zilleti künc mülk-i Rûmî taht
Ey baht-ı saht reşk ile ol sen de laht laht

II

- 1.Yâ Rab ne şûre- zâr olup gam-zidâ-yı Rûm
Elde giryे vü gam bitirür nâ-sezâ-yı Rûm
- 2.İkbâli kalbe gelse hemân lâ-yafnâ olur
Ehvel bakar meger ki görenler safâ-yı Rûm
- 3.‘Îlm ehli nâ-bedîd ma‘ârifse nâ-şenîd
A‘yânı hep pelîd budur mâcerâ-yı Rûm
- 4.İşbu ‘aceb ki sâlik-i merd-i Hûdâ ‘adîm
Her kûçede nişeste iken evliyâ-yı Rûm
- 5.Bir sîm-ten de yok ki göñül kâm ala biraz
‘Ankâ-yı kûh-ı Kâf gibi meh-likâ-yı Rûm
- 6.Gördükce âdemî dem –i inkârdan gelür
Bî-gâne tarz olur reviş-âşinâ-yı Rûm
- 7.Bir dem halâs eylese lutfiyyla Hak bizi
Tenden degül ki cânuma geçdi cefâ-yı Rûm
8. Yâ Rab halâs eyle beni Rûm-ı şûmdan
Ya‘ni ‘azâb-ı sûziş-i nâr-ı gumûmdan

III

- 1.Zann itme Rûm milketi cây-ı makar bize
Her dem güzâr-ı ‘omr gazab-ı sakar bize

2. İkbâl ile dil oldı hemân taht-ı ye's-i şâh
 Geldi hediyye zer-ger-i gamdan kemer bize
 3. İtdüm hakîkat ile nazar gördüm ehl-i Rûm
 Tündî-i saht-ı Rûm ile 'aynı bakar bize
 4. Gam gûsesinde yâd-ı leb-i dil-berân ile
 Vişn'âb-ı keyf çekmege hûn-ı ciger bize
 5. İtdüm hûcûm-i kâfir -i gamdan güzîr içün
 Rûm içre hasb-ı hâlüm iden mukarrer bize
 6. Bir dem murâdum üzre dönüp çarh-ı tîz-rev
 Olsa zemîn -i mülk-i Kırım'a sefer bize
 7. Mihmân-ı keyf dilde o demde konuk olup
 Virmezdi hüzn-i kalb-i gubâr keder bize
 8. Yâ Rab halâs eyle bu Rûm ilinden meded
 Başumdan aşdı geçer gamum itdi cezr ü med

11a.

IV

1. Dâd ey sîpihr yok mı bu zulmûn nihâyeti
 Mevcûd olan cihânda bulur elbet gâyeti
 2. İrdi murâda bir iki nâ-pâk nâ-sezâ
 İtdüñ gürûh-ı ehl-i dile sen hîyâneti
 3. Merdûd eyle anları idbâr-ı saht ile
 Teslîm eyle bize de bir kez emâneti
 4. Cân u dil ile sîdkîla ihlâsila girüp
 Râh-ı Hûdâda görüncedür istikâmeti
 5. Birkâç zamân da sîne-i mecrûha merhem it
 Çerkes nigârı lâle-ruhı servi kâmeti
 6. İtsek edâ-yı ni'met-i Mevlâyı şûkr ile
 Tayy-ı mekân eyleyûgörsek kerâmeti
 7. Dünyâda dâdum almaz isem senden ey felek
 Dîvân-ı Hakda eylerem âhir şîkâyeti
 8. Ey baht sen de hâb-ı girândan açup gözin
 Gör kim safâ-yı dûn u denî dutdı yir yüzin

V

Gör Rûm-ı şûmî dil-berinüñ hîç edâsı yok
 Gül nâ-guşîde bûlbûlinüñ de nevâsı yok
 Her şûhi mihr-bâni erâzil me'âb ile
 'Arz-ı şikes-te-tâze civânuñ kiyâsı yok
 Secde ider yüz üstine der-kâr olanlara
 Yıllar geçer ki 'âşikîna merhabâsı yok
 Taz'yîf eyledükce erâzil 'aceb bu kim
 Oldukca bâz -gûn görinürde hayâsı yok
 Her demde sürme çekdürü agyâr-ı dûnına
 Sâhib hayâ-yı 'âşikîna tûtiyâsı yok
 Her demde esb-yâri egerler biner gider
 Püşt-i safâsı hâne-i menzil kirâsı yok
 Bâg-ı visâle kerre-i vaslı salar hemân
 Küstâh tab'-ı muglim içün de cezâsı yok

Bir yirde böyle dil-bere ne mâcerâ ola
Hayretle hûn-ı ‘âşik için Kerbelâ ola³⁰

VI

Bir şeb ki çarh kurmuş idi hayme-i nevi
Pîrûze reng kubbesi pervâzı âteşî
Nûr-ı dü-çeşm-i ‘âlemi hâb-ı girân olup
Bâz-ı şu‘ûrı tende uçurmuşdı her biri
Rûh-ı revân-ı ‘âlem-i lâhûti seyr idüp
Gördüm serây-ı kudsde bir pîr-i rûşeni
Didüm ki hall-ı ‘îkd-ı şu‘ûr eyle lutf idüp
Derd-i derûnda muzmer olan dâg-ı müşkili
11b.
İdbâr tutdu yüz bu Sa‘âdet ocagına
Anlar şarâb-ı devletile mest her biri
Didüm ki vaz‘-ı dehr geçüpdür derûnuma
İtdüm sihâm-ı ta‘ne nişân çarh-ı kec-revi
Didi ki geldi hayr sa‘âdet ocagına
Zînhâr itme hikmet-i Hakdan şikâyeti
Başla du‘âya çarh ile itme mükâleme
Yüz tut niyâz-ı tâm ile Vehhâb-ı ‘âleme

VII

Bahr-ı dalâlet içre koma yâ Hüdâ bizi
Tîr-i belâya sabra kıl ‘ayn-ı rızâ bizi
İtme mürîd tekye-i pîr-i mecâziye
‘Aşk -ı hakîki râhîna kıl mühtedâ bizi
Döndür kelâm-ı kec-rev-i nâ-mezâkumuzu
Tevhîd-i zikrûn itmege subh u mesâ bizi
Yâ Rab be-hakk-ı kavim-i şehîd-i Kerbelâ
Yâ Rab be-hakk-ı fahr-ı cihân Mustafâ bizi
Künc-i ferâgat içre zelîl itme Rûmda
Taht-ı Selîm vârisi kıl sen şehâ bizi
Kâm-ı ‘arûs-ı tahti bize nâm-zâd idüp
Mahtûbe –i şerîfiye irgür Hüdâ bizi
Her demde ‘ayş ‘îşret –i zevk safâda kıl
İki cihânda lutf ile sâhib-nevâ bizi
Şâd eyle bu Sa‘îd kuluñ lutfa mazhar it
İhsân ile mûlk-i Kırım içre ser-ver it

2.

Murabba‘

I

..-- / ..-- / ..-- / ..-
Bârekallah zihî ‘işve-perest-i mümtâz

³⁰ Dk.Zâhir yanına kimse gelmedi.

Mâye-i cismini gûyâ ki Hûdâ eyledi nâz
Bûselikden dil-i ‘uşşâka idince şeh-nâz
Lütfini va‘de-i meknûn ile eyle icâz
Ne kadar itse niyâz ‘âşik ider nâz-ı dırâz
Nice nâz itmesün ol ey felek-i şu‘bede bâz
Gözi mey-hâne-i nâz u kaşı mihrâb-ı niyâz
Yaraşur her ne kadar itse niyâz ehline nâz

II

Habbezâ ol dü-leb-i mevc-i şarâb-ı gül-fâm
Nedür ol çesm-i dü-nevreste-i nakş-ı bâdâm
Serv-kad gonca-dehen sîm-ten-i kebg-hîrâm
‘Îşve-endâz-ı dil-i ‘âşik u agyâr-merâm
Pîç-der-pîç o siyeh-zülf leb-i müşgîn-fâm
Dahi hurşîd-münevver dahi mahsûl-i kelâm

12a.

Gözi mey-hâne-i nâz u kaşı mihrâb-ı niyâz
Yaraşur her ne kadar itse niyâz ehline nâz

III

Eyledüm pîre-zen-i çarha hîtâb ile su’âl
Hîç gördüñ mi didüm ol şeh-i hûn-rîze misâl
‘Îşve-dil nâz-reviş şu‘bede- ger turfa gazâl
Sîhr ider her suhanı ‘âşikina ruhları âl
Gördüğüm yok didi ey şîfte görmekde mahâl
Hak bu kim oldu bu beyt aña mutâbık ahvâl
Gözi mey-hâne-i nâz u kaşı mihrâb-ı niyâz
Yaraşur her ne kadar itse niyâz ehline nâz

III

Ne ‘aceb şûhdur ol dil-ber-i nâzende-‘itâb
Geh günâh ‘arz ider ‘âşiklarına gâh sevâb
Nedür ol lutf-ı suhan böyle Firengâne –hitâb
Hayr-niyyetde iken çâk bu kadar küfre şitâb
Humret-i çeşmi dil-i ‘âşika gösterse şarâb
‘Arz ider nâz ile ebrûları tâk-ı mihrâb
Gözi mey-hâne-i nâz u kaşı mihrâb-ı niyâz
Yaraşur her ne kadar itse niyâz ehline nâz

IV

Didüm ol şâh-ı melâhat-gere dün böyle ricâ
Sensin ey kân-ı melâhat şeh-i iklîm-i cefâ
Eyleme tâ bu kadar ‘âşikuña cevr ü cefâ
Erham u terhamı gûş eylemedüñ mi ‘acabâ
Gûş-ı cânila didi eyle Sa‘idâ ısgâ
Didi evsâfuma bu beyt-i belâgat-gûyâ
Gözi mey-hâne-i nâz u kaşı mihrâb-ı niyâz
Yaraşur her ne kadar itse niyâz ehline nâz

3.
Müselles

-.- / -.- / -.-

I

El-firâk ey tal‘at-ı yâr el-firâk
Yakdî hüsünîn câna nâr-ı iştiyâk
Semt-i dilde vâki‘ oldı ihtirâk
Âteşe atdı meded tâk –ı revâk

*Sîne-hâhem şerha şerha ez-firâk
Tâ be-gûyem şerh-i derd-i iştîyâk³¹*

II

Dûr olaldan senden ey gül yüzlü âh
Sîne-zahmum tîr-i gam hâlüm tebâh

12b.

*Ger hemî hâhî vü ger ez-dil me- hâh
Mî-keşem her lahza bâ-sad-gûne âh³²
Sîne-hâhem şerha şerha ez-firâk
Tâ be-gûyem şerh-i derd-i iştîyâk*

III

‘Âlemi tutdı firâkum ‘âlemi
Diñlemez bu çarh-ı zâlim nâlemi
Mevt soldurdu o verd-i âlumi
Bilmeye herkes benüm ahvâlumi

*Sîne-hâhem şerha şerha ez-firâk
Tâ be-gûyem şerh-i derd-i iştîyâk*

IV

Gâh âh ü gâh nâle vü gâh gam
Ayrılık müşkil imiş yâ Rab nidem
Eşk ile yazsun bu beyti dem-be-dem
Levh-i ruhsâr üzre müjgân-ı kalem

*Sîne-hâhem şerha şerha ez-firâk
Tâ be-gûyem şerh-i derd-i iştîyâk*

V

El-amân ey çarh-ı zâlim el-amân
Tîr-i gamla eyledüñ kaddüm kemân
Oda yansun raht-ı baht u hânumân
Yârsız ber-bâd ola serv-i çemân

*Sîne-hâhem şerha şerha ez-firâk
Tâ be-gûyem şerh-i derd-i iştîyâk*

³¹ “İştiyak derdini açmak için, ayrıldıktan parça parça olmuş bir yürek isterim.”

³² “İster isteyerek, ister istemeyerek, her an gönülden yüzlerce çeşit âh çekmekteyim.”

VI

*Ey Sa‘îd –i zâr bâ-kalb-i hazîn
Yâd kon ïn-beyt-i Mevlânâ hemîn
În –mûseddes-râ hitâm-i ‘anberîn
Bâşedeş tayy-i kalem kon ba‘d-ez-în³³
Sîne-hâhem şerha şerha ez-firâk
Tâ be-gûyem şerh-i derd-i iştiyâk*

4.

Gazel-i Sultân-ı Şu‘arâ Nâbî Tahmîs-i Sa‘îd

I

.-.- / ..- / .-.- / ..-
Vücûdi nahl-ı himem kıl donandurincaya dek
Cihânda mislüñi ey dil arandurincaya dek
Ki hayra bezl-i dem it kendüñ andurincaya dek
Çerâga sarf-ı nefes eyle yandurincaya dek
Visâle eylemeibrâm utandurincaya dek

II

13a.

Saña ey ‘âşik-ı şûrîde pend-i pîrâne
Girerse hâhiş-i âgûşa yâr-ı mestâne
Olup mukâbele cân câna câme-yabane
Olinca hâbîde nâ’il visâle cânâne
Çalışma bûs-ı kenâre uyandurincaya dek

III

Sunarsa kâsse-i nîm-merâmî baña cihân
Ne gam ki huşk-leb-i kâm her şeh-i devrân
Basîret it nazar-endâz-ı ‘ibret ol bir ân
Bu bezm içinde kime virdi sâki-i devrân
Piyâle-i mey-i ümmîdi kandurincaya dek

IV

Dakîk-i fîkr ile her jâj-hây-ı rüsvâyî
Bulam diyü reh-i dâdî-i şî‘r ü inşâyî
Ki zu‘mî kendin idüp tûfî-i şeker-hâyî
Hayâl-i vakt ile çesmesâr-ı ma‘nâyi
Karışdurur nice nâdân bulandurincaya dek

V

Girerse pençe-i âteş dehâna bir sâ‘at
Îrerti ‘akreb ise âsumâna bir sâ‘at
Hezâr hîle kurup rîsmâne bir sâ‘at

³³ “Ey inleyen Said, bu azin kalple Mevlânâ’nın bu beytini hatırla da, artık kalemi bırak, bu müseddese anberle son ver.”

Bulinca nev-hevesân-ı zamâna bir sâ‘at
Ne pîç ü tâbe düşerler dolandırıncaya dek

VI

Garîb-i ‘arsa-i rüsvâ ider belâ-yı cehel
Virürken aña terakkî cebîn-nümâ-yı kesel
O sa‘b-ı râh-ı merâmî idince zann ile sehl
Bu ‘arsada çalışur nice Fâris-i nâ-ehl
Elinden esb-i murâdî boşandurıncaya dek

VII

Zemîn-i sîneyi derd ü belâya der-bend it
Nasîb olan saña her zahm-kâra hursend it
Visâl-gîri-i âgûş-ı yâre bir kand it
Dü- desti şerha vü dâgila bir kemend- bend it
Meyânına o perînün kuşandurıncaya dek

VIII

Şarâb-ı hikmetü’l-gayr oldı hûn ki her zâta
Sûrâhi şems ü kamer kîmiyâ-yı hâcâta
Piyâle-keşligi irgür o deñlü gâyâta
Kümeyt-i sâgarı sur ‘arsa-i harâbâta
‘Arak- çekânligila kan kaşandurıncaya dek

IX

Serîr-i ‘izzete ey şâh olan gulâm-ı Hûdâ
Elünde câm –ı şarâb öñünde bezm-i safâ
Gelür mi hâtırıñña fakr-ı sîne-sûz ‘acabâ
Hezâr bahr-i gama gavta-hâr olur fukarâ
Kenâr-ı nânını bir zâda bandurıncaya dek

13b.

X

Zamâna erre-i mihnetle seçmese sadefi
Zuhûr ider mi derûnindaki o dürr-i hafî
Misâl-i zât-ı fezâ’il sıfât-ı Men ‘arefi³⁴
Ne çâr-mîha çekerler o nâ-tüvân hedefi
Zebân-ı nâvek-i tîre tayandurıncaya dek

XI

Vücûdîn eyledi pâ-mâl ‘âşîkân çü hazef
Nice dem itdi nisâr aña dürr-i çeşmi sadef
‘Aded-nümâ vü nûcûm-misl ü rîg ü seng ü kef

³⁴ “Kendini bilen Rabbini bilir.” Hadis. Ahmet Serdaroglu (1966). *Mevzuat-i Aliyyü ’l-Kâri Tercümesi*. Ankara. 118.

Hezâr -kîse nükûd-ı sırişk olındı telef
O mâha mâye-i nahvet kazandurincaya dek

XII

Gice bezmde tenhâ düşürüp o ‘İsâ-dem
Basınca havf ile ‘üryân câme-hâbe kadem
Dehânum oldı şeker-âb gözlerüm pür-nem
Ögüp kitâb-ı ruhın eyledüm hezâr -kasem
O şâha sîdk-ı derûnum inandurincaya dek

XIII

Felekde pîre-zen-i çarh itdi kaddini dâl
Nice fûsûn ile her subh u mesâ eyledi âl
Nücûmdan dökerek râhı üzre dürr ü le’âl
Sipîhr-i pîr çürütdi hezâr- kefş-i hilâl
O mâhi hâle-i bezme dolandurincaya dek

XIV

Nice muhammes idersün bu şî‘r-i nâ-yâbı
Sezâ degül şebe pîrâye-i dürr-i nâbı
Gözet Sa‘îd suhan içre hadd ü âdâbı
Çalışdı bu gazel-i âb-dâr için Nâbî
Dehân-ı hâme-i huşkı sulandurincaya dek

5.

Gazel-i Mîsrî- Halîdî -Tahmîs-i Sa‘îd

I

--. / --. / --. / --.
Tedbîr-i sad-hezâr ile itseñ savaşlama
Biñ mekr ü hîle- kâruña her işde haşlama
Tab‘-ı hasîsi cûd ile itseñ de başlama
Eşcâr-ı bahla nahl-ı kerem olmaz aşlama
İtseñ ‘atâyı cân ile dildenbagışlama

II

Biz bir garîb-i ‘âlem-i üftâde sâ’ilüz
Ol gamze-i katîl ü fûsûn-sâza mâ’ilüz
‘Âşık-ı dilüz semâda merîhe nâ’ilüz
Mecrûh olursa cismümüz ey mât kâ’ilüz
Tek âteş –i lisânile ‘uşşâkî haşlama

III

14a.

İtdüm bu âb-gîne-i çarh içre imtihân
Ma’nâ-yı bikri bilmedi beyt içre eblehân
Gûş it ne dir o şâ‘ir –i hoş-gûy-ı nüktedân
Bilmez derûn-ı hâleti bîrûndan küstahân

Mahv olsa dahi hâne-i eş‘ârı taşlama

IV

Ey ‘âşık-ı şîfte vü şûrîde pür-melâl
Sad-‘ömr-i Nûh ile eger eyleseñ iştigâl
Ol yâr-ı şûh dâmenine dest-res-i meçâl
Ümmîd itme girmez ele gonca-i visâl
Ey ‘andelîb bî-hûde efgâna başlama

V

Mecmu‘a-i musattar-ı dîvân-ı ‘anberîn
Evzân-ı sihr ü kâfiye deryâ-yı kâgidîn
Îtseñ Sa‘îd tetebbu‘-ı vâdi-i nâzîmîn
Teftîş eyleseñ de bulinmaz bu nev-zemîn
Bî-ma‘nâ cildi negeste beyti tiraşlama

6.

**Matla‘-ı Mengli Giray Hân İtmâm-ı Gazel-i Me‘âli –i
Kırımı Tâhmîs-i Sa‘îd**

I

--. / --. / --. / --.
Ebrû-yı kemân-dâr-ı şebih itdi cesâret
Ma‘mûre-i mûlk-i dile yüz tutdî hasâret
İtmezse nevâzîşde gamzeyle kefâret
Bir nîm-nigâh ile o şeh itdi işâret
Mûlk-i dilümi leşker-i hüsn eyledi gâret

II

Olmış gibi ol server-i hûbân haber-dâr
Âmed-şod-ı ‘âşk ile bagladı bu dil-i zâr
İhsân-ı firâvân idüp ol yâr-ı cefâ-kâr
Kasr-ı dil-i vîrân şode- bîne done tekrâr
Eyler hacer-i cevr ile tasyîm –i ‘imâret

III

Bir kerre düşerse ser-i kûyîna güzâruñ
Reşk-âver-i ‘anber olur ey bâd gubâruñ
Tutduñ o zamân kâfilede müşk ile bâruñ
Peyveste olursañ şiken-i zülfine yârûñ
Sen itme sabâ bir dahi hîç Çîni ziyâret

IV

Biñ kerre niyâz itdüñ o şûh itmedi ısgâ
‘Uşşâkına sengîn-dil iken ol meh-i garrâ
Eyler dem-i cân-bahşîn ile agyârı ihyâ
Pey-der-pey olur lutfî ‘adûya bize ammâ
Geh ‘işve gehi şîve gehi cevr ü hakâret

V

Nûş itme Sa‘îd dagdaga-efrûz-ı cemâli
Çek câm-ı hakîkat ile musaffâ mî hâli

14b.

Gûş eyle ne dir zümre-i erbâb-ı kemâli
Mestâne-i mey-hâne-‘îşretüz bize ‘âli
Feyz-i mey-i mey-hâne degüldür bu şetâret

EL-MUKATTAT

1.

-.- / -.- / -.- / -.-
*Ân ki der-ser-hoş-dârı çeşm-i ‘ibret-bâz dâd
Kerde-bûdend an-çenân meftûh-ı bâb-ı irşâd*

*Her kucâ nâzır şodem dîdem revâçeş der-meyân
Der-cihân cüzî ne-dîdem men ze-ahkâm-ı Hüdâ*

*Her ki dîdem pişe-dâr dâr-ı şârâ kâm-yâb
Ân ki râşî nîst-yâbed kerde şod rû-der-kafâ*

*Devlet-i islâm der-dest rû-keş-i üftâde bûd
În-siyeh-rû ‘Arab u ân surh-ı ser-pûde kemâ*

*V’ân Süleymân-ı mecâzî bûd bî-şek ïn-zemân
Rând taht-ı kâm-râ lutf-i ‘Arab bûdeş Sabâ*

*Gayret-i Hak der-zuhûr âmed cû-der yek-lahza
Gûş-i cânem pür-sadâ şod ïn-kucâ şod ân-kucâ*

*Be-her katl ïn-dü-kibr ateşi tâ rûz-ı haşr
Nâm-ı Mahmûdî hem-ân âvîhet tîgeş der-semâ*

*Hâtif-i gaybî nidâyî dâd-dûşem ey Sa‘îd
Sebt-i şedîd-i çerh ïn –Mahmûd-ı nigû-yı garrâ³⁵*

2.

-.- / -.- / -.- / -.-

³⁵ “Sarhoşluğa ibret gözüyle bakana, bir o kadar irşat kapısı açıldı. Her ne yöne bakarsam gözüm, ortayı bulur. Dünyada Allah’ın hükmünden başka bir şey görmedim. Güzüm, her ülkeler alan şâha baktığı zaman, o buyun egen yüzün kafada olduğunu anlamadığını, gördü. İslâm devleti elinde olanlar, düşkünlerden yüz çevirir oldular. Bu siyah yüzlü Arap, bu kızıl başlıklı genç... Bu zamanda şüphesiz, o Hz. Süleymân mecâzî oldu. Tahtın sultanatını sürmeye Arapın lutfu, Sabâ olur. Hakkın gayreti, arayana bir anda zuhûr eder. Can kulağum şu sesle doldu: Bu nerede; o nerede olur? Mahşer gününde bu iki kibir ateşini Mahmûdun adıyla semâda asılı kılıç katledecektir. Ey Said, gâibden gelen, bu şükredenin sesini, çarının giçirtisi içinden duyarım.”

Dil-i şûrîde ile ‘azm –ı harâbât itme
Mey-i engûr ile hall bir dahi hem-vâr olmaz

Vefk-i nîsân-ı vücûd mâye-i nîk ü bed iken
Dürr olmuş tutalum her biri şehvâr olmaz

‘Aşk-ı ma‘şûk füzûn-ter gerek ‘âşikdan kim
Nakş-ı hoş-sûret-i bîr ü hade dil-dâr olmaz

‘Aşk kim sîne-i ‘âşikda nûmâyân olmaz
Tûrda nahl-ı tecellî de belî nâr olmaz

Rûy-ı hat-âver-i dil-ber dile âteş urmaz
Der-küsûf tal‘at-ı hurşîdde envâr olmaz

Bir gazab olmaz meh-i ‘âşukuñ efgânından
Ehl-i dil nâle-i bülbül ile bîzâr olmaz

Ne kadar hûrs ile dil nâzır-ı devlet olsa
Nân-ı nâ-puhtede sîr-i şikem-i hâr olmaz

Ehl-i dil fakr-ı libâs ile olur cilve-nûmâ
Nûr-ı meh tîre-şeb olmazsa nûmûdâr olmaz

Meşreb-i sâf ile mecûsi mey-i nârin gör
Hemçü sîm-âb bu dil şîşede firâr olmaz

Daha kimine eser eyleyemez ta‘n-ı ‘adû
Bahr-i ebyaz has u hâşâk ile mürdâr olmaz

15a.
Şi‘r çokdur bu cihân içre Sa‘îdâ ammâ
İsti‘ârât ile böylece eş‘âr olmaz

3.

... / ... / ... / ..
Kûh-ı Kâf olsa tenüñ göklere ger irse serüñ
Bu felek mevt-i kemendine seni bend eyler

Taht-ı ten rûh-ı Süleymânı revân gezdürse
Nefes-i vâ-pesin âhir saña der-bend eyler

Görinen sanma zemîn üzere hezâr-emvât
Saña biñ bir dil ile agız açup pend eyler

Pîre-zen dünbe-hîrâm felege aldanma
Zîb ü ârâyış –i etvârını her çend eyler

Rüstem-i zâle delâlet iden ihvânı gibi
Seni âhir uçurup bir kapuya hand eyler

Ten gubârin savurur bir gün olur bâd-ı hevâ
Penç-rûz içre ne hâsil ki hemz-mend eyler

Çıkarup gözüñi zehr eyleyü kusdursa gerek
Pâre-i nâni ki virdükce saña kand eyler

Meger ol kimse necât buldı cihândan hâvî
Lutfinı hazret-i Vehhâb Hüdâvend eyler

4.

... / .-. / ..-
Gûş-ı cân üzrine idüp mengûş
Bu kelâm-ı cevâhiri sen bil

Seyl-i bârân câha akması tîz
Taşraya çıksa aña nâ-kâbil

Ya hımâr oldı hem-seg-i bed-hâl
Düşdi bâr-ı girân ile der-gil

Oldı mânend-i gavs-ı bahr-i siyâh
Görinür saña gerçi deryâ-dil

Dür-i ihsâne dest-res idemez
Talsa gavvâs -ı ma'rifet biň yıl

Vâ'iz-i şâ'irân-ı ïn-yemîn
Vâdi-i nush içinde ol gül mül

İtdi bu kît'ayı çü dürr-i yemîn
Mâl-ı hem-seng - misâl üzre dil

*Mâl-i dünyâ misâl-i gîr-i segest
Çün kesi seg bûd kefi medhil*

*Be-derûn gerdeneş bûd -âsân
Bedr-i âverdeneş bûd müşkil³⁶*

15b.

5.

.-. / ..- / .-. / ..-

³⁶ “Dünya malı, köpek tutmak gibidir. Kim köpek olursa eline girer. Zihninde dolaşması kolaydır. (Oysa) dolunayı (yakalayıp) getirmek zordur.”

Bu pend-i pîri idüp gûş -ı hûşuña mengûş
Visâl-i her zen -i zîbâya itme sûz u gûdâz

Vefâyı gördü mi şemşîr esb ü zende meger
Bu bî-vefâyî dehr içre server-i ser-bâz

Düşürme gönlüñi çün bâz-ı dâm-ı nisvâne
Ne deñlü olsa da meh-rûy-ı âfet ü tannâz

Lezâyiz-i dil ile bûm-ı künc-i gam olma
Hevâ-yı ‘âlem-i tecrîde ol hümâ-pervâz

Sezâ bu memba‘-ı ‘irfâna olsa dest-âvîz
Kelâm-ı cevher-i ‘allâme –i suhan –perdâz

*Mûtecezzît be-hakîkat ‘azîm sultanaat
Zemîn şînev ten âzâd-hîş bende mesâz*

*Berâ-yı bî-keşe zevkî ki hâk-i ber-sevâd
Esîr-i zen-i netüvân şod be-sâlhâ-yı dûrâz*³⁷

6.

.-. / .-- / .-. / ..-
Sehâyı şöhret için kendüye şî‘âr iden
‘Aceb midür ki hakda olursa ol güm-râh

Rızâ-yı Hak degül ihsâni çünkü bî-şek olur
Ki gendüm germî-i hîrmen-i habbezâda tebâh

Riyâyı dâd –dehişle görüp o sultâni
Sehâda Hâtem-i dehr oldu pür olup efvâh

Nedîm-i meclisidür her segân-ı dehr –i denî
Kelîm-i meddahîdür her zam-ı dûrûg u güvâh

Seni bu tarz-ı riyâ gûne gûne etvâruň
Cehennem içre şeyâtîn ile ider hem-râh

O bezl-i nâ-mahal için nazar idince didüm
Zihî sehâ vü kerem “*Lâ-ilâhe illallah*”³⁸

16b.

İbtidâ-i Gazeliyyât Harfü'l-elif

1.

³⁷ “Gerçekte, parçalara ayrılmak(çürümek) büyük sultanat. Toprak üzerinde iken, uzun yıllar boyunca gücsüz bir kadının esiri olup zevkini sürdürmeyeni, toprak dinler, âzâd ettiği teni köle yapmaz.”

³⁸ “Allahtan başka tapacak yoktur.” Kelime-i tevhid.

-.- / -.- / -.- / -.
Hamd ile bed' eyle ey dil beyt-i şı're ibtidâ
Ba'd hamd ü Hâlik-ı arz u sipihre ibtidâ

Nâ-resîde menzil-i maksûd olur bî-per ü bâl
Îtse nâ-tahmîd-i nâ-kes murg-ı emre ibtidâ

Hamd-i Dâdâr-ı cihânî itmeyüp kavm-i selef
Oldılar manzar nişâne tîr-i gamze ibtidâ

İntihâ-yı maksad-ı Aksâya vâsil olmaga
Mazhar ol feyz-âverî-i hamd pîre ibtidâ

Cün revâcı buldı kâlâ-yı suhan tahmîd ile
Vâcib oldı hâme-i mu'ciz-sarîre ibtidâ

Hayr ile itmâm-ı dîvân eyleseñ olur 'aceb
Hamd ile itdüñ Sa'îdâ çünki şı're ibtidâ

2.

-.- / -.- / -.- / -.
Kâr olursa lutf-ı Hak her kârda yârî baña
Kâr-ı nigûdur dü- 'âlemde siyeh-kârî baña

Hûn-ı dil mül gam-ı nuklî târ figânum bestedür
Îrtikâ-ı 'îşret-i sad-pâyedür zârî baña

Kehribâr-ı zahm-ı tende seng-i ta'ne her zamân
Cezbe-i kâr-ı muhabbetdür cefâ-kârî baña

Kasr-ı tenden sun'-ı hikmethâ-yı Bârî seyrine
Revzen-i câm-ı Hüdâdur çeşm-i bî-dârî baña

Kâble-i Ka'be metâ'-ı hayr için ser-mâyedür
Ni'met-i Perverdgârî 'ömrümüñ varı baña

Râh-ı teng-i çarh-ı muzlimden güzâr ey Sa'îd
Gam degüldür ger meded eylerse süvârî baña

17a.

3.

-.- / -.- / -.- / -.
Şîşe-i hûn-ı dilüm sahbâ-yı câm olsun saña
Gamze-i mey-hârlar mest-i müdâm olsun saña

Halkahâ-yı mesti-i çeşmûñ ki dâm olsun saña
Âhu-yı diller esîr-i müstedâm olsun saña

Gitdigüm demde ‘adem şehrine ey mihr-i vefâ
Ber-güzâr-ı dil huzûrıñda selâm olsun saña

Tavkını kumrı ider serv üzre pây-endâzıñña
Sahn-ı gülşen yek-kadem cây-ı hîrâm olsun saña

Yek-cevâb-ı nerm ile ihyâ kılup it ‘âşkı
Her nefes nutk-ı Mesîhâdan kelâm olsun saña

Ruhlaruñ gûyâ kızıl elma firengî çeşmüñne
Nev-remîde portakalsitânnum hâm olsun saña

Şi‘rûni kıl ol mehûñ evsâfi ile gülsitân
Ey Sa‘îd efkâr-ı rengîn ihtimâm olsun saña

4.

-.- / -.- / -.- / -.-
Dil-ber olsun zülf-i ‘anber –rîz göstersün saña
Âfet-i takvâ vü sad-perhîz göstersün saña

Pîç ü tâb-ı ebruvân-ı hüsn ü endâm-ı sefîd
Cezi medd-i bahr-i şûr-engîz göstersün saña

Nâtika –pîrâ olinca gonca-ı ser-bestesi
Gül gibi câm-ı mey-i leb-rîz göstersün saña

Geh cemâl ü geh celâl olsun dil-i ‘uşşâkına
Şems-i hüsni nisbet-i Tebrîz göstersün saña

Her nigâhi tende bismilgâha mahşer eylesün
Dem-be-dem tîgin ki ol hûn-rîz göstersün saña

‘Aks-i kâmmü üzredür hep gerdiş-i çarh ey Sa‘îd
Nola bir kez devlet-i Cengîz göstersün saña

5.

-.- / -.- / -.- / -.-
Hep şehîd-i makdemüñdür serv-kâmetler saña
Gamze her lahza ‘ayân eyler kiyâmetler saña

Gavta-hâr-ı bahr-i hûn olup dil-i ‘uşşâk-ı zâr
Her kerem-dîzüñ ‘adû olmuş melâmetler saña

Dil akar çün âb-ı kadd-i dil-sitânuñ pâyine
Servden efzûn olsun istikâmetler saña

Yek-kadem himmet de kûy-ı yâre it tayy-ı mekân

Bâl ü per olsun sebük-rûh-ı kerâmetler saña

Vâdi-i ‘aşk içre kıl efkâr-ı leşker ey Sa‘îd
Yir yir âh-ı âteşîn olsun ‘alâmetler saña

6.

.-.- / .-.- / .-.- / ..-
O zülf-i pür-şiken-i ‘anberîn içinde dilâ
Ruh-ı nigâr şeb içre meh çehârda gûyâ

Benefşe-i hatı mı gösteren pûd ol mehden
Ya âb-gîne-i sâf içre sünbul-i bûyâ

17b.

Sipihr sanma ki te’sîr -ı âh-ı sûzdandur
Kebûd-ı fâm-ı zeberced -nûmâ vü sahn-ı semâ

Rakîb-i rû-siyehüñ hem-demi olur mı o mâh
O zâg-ı şûm ile olmaz bu bülbül-i gûyâ

Sa‘îd pûte-i ‘aşk içre kân olam dirseñ
O telh-gûy semen –bû yolında ol pûyâ

7.

.-.- / .-.- / .-.- / ..-
Tâbiş-i meyle dü-ruhsâruñla matla‘dur baña
Ol hayâl-engîz ebrûlar dü-misra‘dur baña

Cebhe-i sâf-ı safâ-hîzüñde zâhir naks-ı mâh
Kir getürmiş rûyina ol bû müşa‘şa‘dur baña

Şevk-i rûyuñla derûn -ı tîreye yakdum çerâg
Cism-i zerdüm hazz için anı müşamma‘dur baña

Farkuma pâmâl-i esb-i yâr olınca na‘l ile
Açdigum güller degül vefk-i murabba‘dur baña

Çeşmûme seyl-i belâdur kalbe mihnet âtesi
Sûz-ı bahr-i vaslda her demde enfa‘dur baña

Nâzır-ı ruhsâr-ı yâr olsa rakîb-i bed-sirişt
Âb-ı sâfiye mukâbil şekl-i minka‘dur baña

Kilk-i sehhârı Sa‘îdüñ hayli efsûn-kâr imiş
Bir bakışda hüsn-i matla‘ hüsn-i makta‘dur baña

8.

-.- / -.- / -.- / -.-

Dilde tûbâ-kadd-i nahl-ı müstakîmîdür baña
Sünbül-i turra dimâg-ı cân şemîmîdür baña

Yek-suhanla kalb-i mevt-engîzümi ihyâ ider
Her nefes ki yârden ise kelîmîdür baña

Berg-i gülden ter olan rûyında hatt-ı müşk-rîz
Safha-i bahrü'l-garâ'ibdür halîmîdür baña

Dûr-bâş eyler baña her dem segân-ı kûy-ı yâr
Pâs-bân-ı hâzır u genc-i harîmîdür baña

Eyleyen şî'rîn Sa'îdüñ var ise kâmil-pesend
Tarz-ı nev-sâz-ı suhan zihن-i Selîmîdür baña

9.

... / ... / ... / ..-

Pister-i gaflet-i dünyâ -yı denî-raht-ı ricâ
Olmasa mâ ba'adında hatırlat-ı 'ukbâ

Sûrdur mü'mine mahşer bize zühd ile tenüñ
Dâhil-i sûde libâs ile bezenmek ne safâ

Gerdenüñ zîr-keşin bâr-ı emânet eyle
Bende-i târik-i emre kerem itmez Mevlâ

Ta'n-ı pür -nâvek-i hussâd-ı zamâna sabr it
Bülbül-i hoş-nefese ekser olur hâr-ı cefâ

Ehl-i şer hayr kelâma olamazlar nâtik
Lâl-i zâtîde tasavvur olinur mı gûyâ

18a.

Tâ'at-ı zühde riyâ âfet-ı dindür zînhâr
Penbeyi âteş-i sûzâne bırakmak meselâ

Ne kadar mücîrim iseñ çekme Sa'îdâ sen gam
Umaruz ola şeff' hazret-i sırr-ı Tâhâ³⁹

10.

--. / --. / --. / --.

İrdi behîş -i mâh-ı nev tâze-çehâr-ı bâ-safâ
Hep ser-i hil'at -pûş idüp eşcârı in'âm-ı Hûdâ

Her tâze dil-ber kec gûle gûl-geş idince subhuña
Hem-çü meh şeb-i çârda itmekde sahrâ içre câ

³⁹ Kur'ân,20.

Gonca musâhibdür güle yâr oldı sünbul sünbüle
Bî-çâre ‘âşık bülbüle kısmet ezel hâr-ı cefâ

Zanbak açınca tug-ı Cem her serv bir sâhib-‘alem
Güldür emîr-i muhteşem ‘ayyâr-ı şeb-revdür sabâ

Oldı karanfil surh-rû her lâle pür-mey ber-sebû
Düşdi hezâra güftögû zerrîn kadehden içdi mâ

Mevc-i şakâ’ik bahr-i hûn fevc-i benefşe nîl-gûn
Rûy-ı zemîn hem sebz-gûn rindâne ‘ayş için salâ

Sohbet-i gül-i hâr u has bülbüle giriftâr-ı kafes
Resm-i ezel sâhib-nefes bend-i belâya mübtela

Kavl-i hakîmi gûş iden ritl-ı girân ber-dûş iden
Bu demde mey çok nûş iden gamdan rehâ vü dil-güşâ

Sen şâ’ir iseñ gel Sa’îd nev-rûzdur eyyâm-ı ‘îd
Hengâm-ı zîr ü serv-i bîd gülzâra ecel bî-riyâ

11.

--. / --. / --. / --.
Şol dil ki oldı zemzeme-i mâtem-âşinâ
İtmez hayâl-i ‘işret-i câm –ı Cem-âşinâ

Gel bir safâ-yı ‘âlem-i âb it hayâl-i yâr
Ülfet-pezîr-i çeşm olarak demdem-âşinâ

Hayfâ ki olmada nigeh-endâz-ı iltifât
Gül-çehregân-ı turfa zamân ‘âlem-âşinâ

Her şerha tende mühr-i Süleymâna döndi lîk
İtmez vefâ o perî degül hâtem-âşinâ

Gelse Sa’îd encümen-i ‘âşıkâne âh
Ol âhuyı remîde olup her-dem-âşinâ

12.

--. / --. / --. / --.
*Der-derûn perverde-dârem ‘aşk –ı âteş-pâre-râ
Hûn-ı her laht-ı ciger engîht la ‘lin-pâre-râ*

*Dil neşod ez-tire-i dünyâ-yı dûn- endûh u kîn
Âşiyân batn-ı sadef bâşed dür-i şehvâr-râ*

Rûz-ı mahşer hâsılı nîst ez-tehî-i dest-i mâ

Şâd-i iydeyn –i muhabbet şod dil-i bî-çâre-râ

*Tîre-dil-râ cüz-i bahtî güfte-i vâ ‘iz neşod
Pür-sadâ bâşed cevâb-âviht seng-i hâre-râ*

18b.

*Himmet-i ân kes bülend üftâd mecâzî-râ güzeşt
Tahte-i meşk-i hakîki saht her mismâre-râ*

*Misra ‘-i der-gûdegî yâdem Sa ‘îdâ ez-Zafer
Tahte-i tâbût mî-pendâstem gehvâre-râ⁴⁰*

Harfü'l-bâ

13.

-.- / -.- / -.- / -.-
Rûzi-i nefsum içün gezdürme yâ Rab bâb bâb
Merd-i kâni‘ eyleyüp ben zâri kıl ‘izzet-me’âb

İktisâb-ı zahr-i âhirle sa‘âdet bulmaga
Gafletüm ref‘ eyle çeşmümden benüm mânen-i hâb

Yâ İlâhi zulmet-i ‘isyânda güm-râhuz meded
Nâr-ı hicr-i ba‘d ile redd eyleyüp virme cevâb

Merdüm-i dîdem nedâmetle sen eyle eşk-rîz
Âteş-i âh-i te’essüf –gûyumi eyle şihâb

Ravza-i firdevse idhâl eylesün lutfuñ beni
Koyma nâr-ı dûzaha cûrmüm olursa sad-kitâb

Hüsni‘ imânüm kabûl it cûrmümi ‘afv eyle kıl
Nüsha-i ‘isyân olan ketb-i vücûdum intihâb

*Levh-i mahfûz⁴¹ uñda nâmum ger şakîse yaz Sa‘îd
Olmayam şermende beyne'l-mü’minîn rûz-ı hisâb*

14.

⁴⁰ “Ateş parçası olan aşkı, gönülde besleyenim. Her ciğer yarasının kanı, bir la‘l parçasından yüzüktür. 2. Gönül, kin ve garaz dolu aşağılık dünyanın derdinden gamlanmadı. O karnında dürr-i şehvâr üreten sadefin yuvasıdır. 3. Hâsılı, mahşer gününde elim boş olmayacak. Çâresiz gönlüme, muhabbetin çifte bayramı nasip olacak. 4. Bahtsız, yaralı gönüle, vâizin sözü tesir etmez. Sert mermerden çikan ses gibidir onun cevabı. 5. Mecâzî aşka geçen âşığın mertebesi yüksektir. Hakîkatın meşk tahtası, her çivi için serttir. 6. Ey Saïd, Zafer’den kişi bir misra hatırlıyorum: Tabutun tahtasını beşik sanıyorum.”

⁴¹ Kur'an 85/22

-.- / -.- / -.- / -.-

Bâg-ı ‘âlemde kalur mecbûl-i bî-fer gül garîb
Nagme-sâz-ı tab‘-ı ‘uşşâk olmasa bülbül garîb

Hayl-i ezhâr içre zanbak kâm-rân-ı ser-firâz
Gömgök itmiş derd-i ‘aşk ile tenin sünbul garîb

Şehr-i gülzâr-ı vücûd içre terennüm-sâzdur
Nâle vü feryâd ile mânend-i bülbül dil garîb

Duhter-i rez hayli müddetdür tasarruf-kerdesi
Dest-i rind içre mukayyed oldu gitdi mül garîb

Hâl-i ‘anber-bûy-ı yâre öykünürmiş gâlibâ
Eylemiş kendin siyeh-rû ‘âleme fülfül garîb

Lâl olup terk-i cihân itdi Sa‘îdâ ‘ibret al
Şâh-i iklîm-i suhanken Tâlib-i Âmul garîb

15.

-.- / -.- / -.- / -.-

‘Acebdür kim bu ‘âlem içre dil-ber bî-vefâdur hep
Ser-i kûy-ı belâda ‘âşikân-sâhib-rızâdur hep

Şikenc-i zülfden kurtulma gerçi hayli müşkildür
İden dil-bestе halkı kâkül-i zînet-fezâdur hep

Ne deñlü olsa bâlâ –rev kemend-i âhı ‘uşşâkuň
Yine dâmân-ı zülf-i ‘anberine nâ-resâdur hep

Girân-câni ezelden ‘illet-i âsâyış-i tendür
Nasîb-i ehl-i dil rûz-ı ezel tîr-i belâdur hep

19a.

Sa‘îdâ terk kil pend-i fasîhâdan alup vâye
Misâl-i mâ cârî-i serv-kadler bî-vefâdur hep

16.

-- / -- / -- / --

Ben zârı leked-horde –i nâz eyleme yâ Rab
Dil-dâde-i mahbûb-ı mecâz eyleme yâ Rab

Sen hâdi olub Ka‘be-i matlûbuma yol vir
Ser-keşte-i vâdi-i Hicâz eyleme yâ Rab

Sanduka-i esrâr-ı suhan eyle derûnum
Çün kubbe-i ifşâ-ger-i râz eyleme yâ Rab

Bed-gûylara ‘ibret dile tâb u tüvân vir
Mânend-i kûh-ı red ile bâz eyleme yâ Rab

İlhâk ile lutf eyle Sa‘îdi sü‘edâya
Sen itme şakî redde cevâz eyleme yâ Rab

17.

.--- / .--- / .--
Kazâdan bir semen-ruh sîm-gabgab
Dil-i meyyâli yagma eyledi hep

Benâti sîmden gûyâ kalemdür
Siyâh-ı nokta-i hâli mürekkeb

Görüp rûyunda ol zülf-i siyâhi
Didüm hurşîdi gör der-burc-ı ‘akreb

Dil-i meyyâl ile sevdâ-perestân
İderler derd ile feryâd yâ Rab

Degüldür ebruvân-ı zerd fâmi
Çün oldum sâlik-i râh-ı tecerreb

İdince cezr med bahr-i haseni
Atar taşra dür-i mâhî-i mezheb

Kırân iderdüñ ol meh-rû ile sen
Olayduñ ger Sa‘îdâ sa‘d-ı kevkeb

18.

--. / --. / --. / .--
Pîrâyede câm-ı gül iner pûr (teri meşreb)⁴²
Hem-nagme-i bülbül dil olup hem-seri meşreb

Bû-yâfte-i gonca-i kâm ârez-i kâm ïz
Olmakda füzûn hâhiş-i derd-i seri meşreb

Müjgân-ı hadeng âhu-yı çeşmâne hedefdür
Levh-i sadef-i sîne-i hûş-perveri meşreb

Sûziş-fîgen-i pertev-i hurşîd-i kiyâmet
‘Aşk âfet-i âyine-i rûşen-geri meşreb

Her çâk-i elem dilde dikiş tutmadı hayfâ
Tefrîh-i kazâya olsa sûzen-geri meşreb

⁴² Bu gazel der-kenardadır. Parantez içindeki yerler tamir görmüştür.

Üstâd Sa‘îd olsa nola tâlib-i âmil
Ol bülbül-i güftâr-ı suhan-âveri meşreb

Harfü’t-tâ

19.

-- / -- / -- / --
(Çek câm-ı) mey-i ‘aşkı dilüñ mahz-ı surûd it⁴³
(Mey ile) gam-ı kalbi hemân bûdî nebûd it

(Derd-i) dile âteş-figen ol ‘aşk ile her-gâh
(Hicrân gam)ını def'a hemân hâne-i dûd it

(Ol serv-i)kadi ravza-i kalbüñde dikersen
(Hûn-âb) idüp dûd-ı dilüñ serv-i kebûd it

(Hâk) eyle tenüñ Ka‘be-i maksûdî dilerseñ
(Düş) bâdiye-i ‘aşka da ifnâ-yı vûcûd it

(Gel ey)Sa‘îd ‘aşk ile âşufte-mizâc ol
(Bend it) yeñi ma’nâ-yı fehîmâyı nûmûd it

20.

-- / -- / -- / --
Boz savm-ı dil-i zârumı gel şâma ne hâcet
Besdür bize ebrû meh-i bayrâma ne hâcet

Zehr-âb ise destüñde çeker ‘âşık-ı nâ-kâm
Ey sâki-i gül-çehre bu ibrâma ne hâcet

Bûs-ı leb-i la‘lüñ sihiri keyfüm olınca
Pertev-figen-i bâde-i gül-fâma ne hâcet

Zer tilsim-ı sayd-ı dil -i hûbân-ı zamândur
Sad- mekr ü sad-efsûn ile sad-dâma ne hâcet

Cevr-ülfet olup oldı Sa‘îdüñ saña bende
Gayra kerem it ‘âşika ikrâma ne hâcet

21.

... / ... / ... / ...
Tâlibüz vaslına yârûñ bulabilsek fursat
Çarh-ı bed zâlim-i ‘Örfî’den olursa nusret

19b.

Feyz-i ihyâ-yı suhan itmede ahz itse kelîm

⁴³ Bu gazel der-kenardadır. Parantez içindeki yerler tamir görmüştür.

Mahz-ı lutf-ı nutuk-ı Hakdur o nûra niyyet
Bize lâzım mı rakîb ile Selîm-tab‘ olmak
Gösterelüm o harâbî ile her dem Şevket

Kuvvet-i tab‘ ile di şî‘r-i Nazîrî’ye nazîr
Fîkr-i Sâ’ible bulursaň bu cihânda Rîf‘at

Kasd-ı a‘dâya ne gam olsa bize nâsır ‘Ali
Bize eylerdi teveccûh dü-cihânda ‘izzet

Muhteşem olsaň eger Rûm’dâ yine vahîsin
Çünkü nâzımsın eger şî‘rûne virseň sûret

Nef‘i-vâr tab‘-ı Fehîm’üñ eger olsa Sâbit
Nâdirî tab‘-ı zekâ içre bulurdu ‘İsmet

Muhtesib dün mey-i nâb ile bir az dilleşdi
İtmedi pîr-i mugâna o hîrâsla hurmet

Hâsılı Nâ’il olan buldı Necâtî Bâkî
Bezm-i akdesde Nedîm ‘ârif-i billah elbet

Rif‘ati Rûhi ile Vâsîf-ı Sîrrî olamaz
Bendenüñ Vecdi şu‘ûrı aña bulmaz kudret

Vahdeti Râgîb-ı âgâh-dil olmak fikri
‘Uzlefî bulsa kemâl Vehbi olur ol ni‘met

‘İsmeti Zâtî ile tarz-ı Rîzâ’ya mâ’il
Cevherî buldı Bahâyî aña mesken cennet

Dürri eş‘ârı ‘Azîz Zihni anuň Sâkîb’ıdur
Fâ’izî tab‘ı Safâ istemez aslâ şirket

Hâletî Tîgi Şefîk ‘âşika olmaz aslâ
Âh o imlâ-ı Fuzûlî’de bulunmaz Şefkat

Kendi Şehrî gibi remz ile ider Lutfî ‘Atâ
Sebzi destâr ile Fâ’ikdür o mâh-ı Tal‘at

Mantıkî Selîm-i bürhânda Tulû‘i nâkîs
Râmi olsun mı Merâmî-i üç dilde rû‘yet

Kendüñi ‘âlem-i lâhûta enîs eyleyegör
Gülşen-i ‘adna Sezâyî olasın hem-niyyet

Tayy it ey hâme bu çâbük-rev-i şî‘r-i teri

Bunlaruň yokdur esâmesine hadd ü gâyet
Eşref-i Rûm u ‘Acem nâmını yâd itdüñ sen
Nefes olmuş saña ey hâme-i câdû Fîtnat
Nâm-ı pâk-i şu‘arâ ile Sa‘îdâ kıldıuň
Âsumân-ı hüneri kevkebe-i pür-zînet

Harfü’s-sâ

22.

..- / ..- / ..-
Niyâz-ı kesret ile âb u tâbuma bâ‘is
Gül-i nezzâre-i rûdur ‘itâbuma bâ‘is

Nukûd-ı eşkümi pâyüne hep nisâr itdüm
Bu ‘aşk-ı cevr-revişdür harâbuma bâ‘is

Ne ân ki târik-i meyhâne-i safâ oldum
Şarâb-ı la‘l-i lebüñ ictinâbuma bâ‘is

20.a.

Cilâ-yı sîne-i sîmînûñe nazar kıldum
Olurdı mahz-ı ziyâ iktisâbuma bâ‘is

Sa‘îd ‘âlem-i rü’yâda zülfüñi gördüm
Odur bu hîç degül inkılâbuma bâ‘is

Harfü'l-cim

23.

..- / ..- / ..- / ..-
Seni gafletde komış nefş-i hevâ gel gözüñ aç
İddihâr it ‘amel-i zâdi olursaň muhtâc

Seni ferzîn-i felek bir gün ider âhir mât
Tutalum bâzi-i dünyâda imişsin hallâc

Hasret-i ni‘met-i envâ‘a ne bu hîrs-ı segî
Pâre-i nân ki yitmez saña çün olduň aç

Kendüñi tekye-zen-i tâk-ı zeberced itseň
Tîr-i merg-i felek eyler seni bir gün âmâc

‘Abd-i ahkarsın eger bî- ‘amel iseň ferdâ
Şark u garbdan saña tahsîl ola ger bâc harâc

Zîr-i tûbâ saña mesken ola mânend-i Sürûş
Sîmeden lezzet-i heyvânı iderseň ihrâc

Hüsn-i hulkı taleb it kendüni sen eyle Sa‘îd
Bu gazel zulmet-i nefsuñde saña oldı sirâc

24.

-.- / -.- / -.- / -.-
Eyle bir gül –rûy sünbül-mûy birle izdivâc
Sînesi taht-i safâ olsun anuñ mânend-i ‘âc

Müşg-âver mülket-i hüsnüñde tâcirdür o zülf
Bender-i Çin’den gelür bir bûse alsak nola bâc

Kalmaz idi zîr-i pây-ı eblehân kâlâ-yı şî‘r
Ursalar ‘asruñ mülükî aña tamgâ-yı revâc

Olamaz merd-i ma‘ârif merd-i nâ-ehl ile hoş
Bülbül-i hoş-nâle zâg-ı şûma kılmaz imtizâc

Seng-i ta‘n ile şikest itme kulûbı sen sakın
Münkesîr olsa yapılmaz kalb mânend-i züçâc

Hil‘at-i şî‘ri giyür ma‘nâ-yı hûba ey Sa‘îd
Dürr ü gevherle murassa‘ kıl edâñi eyle tâc

25.

-.- / -.- / -.- / -.-
Şâ‘irüñ yâri civân-ı köhne-sâl olmak da güç
Mâ’il-i seyr ü safâ tâze-nihâl olmak da güç

Rûy-ı hûba olmamak nâzır ne mümkün dünyede
Ârzû-yı dil ile gark-ı vebâl olmak da güç

Câme-i kat katla manend-i piyâz olmaz revâ
Merd-i ber-dûş girde-i pejmürde-şâl olmak da güç

Ol civân-ı ser-keşî terk eylemek de mümteni‘
Dâ’imâ cevrin çeküp mânend-i nâl olmak da güç

Kâni‘-i nân-pâre-i huşk ol Sa‘îdâ gam yime
Gasb-ı mât-i halka sâhib-i nevâl olmak da güç

20b.

Harfü'l-hâ

26.

--. / --. / --. / --.
Derd-i derûna çün geliyor câm ile ferah
Pes sayd eylesek nola biz dâm ile ferah

Muhibb gâyeti sâdîk imîş birbirile
Memnû'dur müfârekâtı kâmile ferah

Vaslın hayâl- âveri âgûş eylerüz
Kalbe gelür o vesvese-i hâm ile ferah

Kalbüñ cilâsı jeng-i gurûr ile mahv olur
Her kim ki kesb eyler ise nâm ile ferah

Görmem Sa'îd hayli dem oldı ferah yüzin
Mümkin mi ülfet eyleye hîç vâm ile ferah

27.

-.- / -.- / -.- / -.-
Sayd-ı hübân -ı zamân itmekde mâhirdür kadeh
Ser-nigûn ider süvârı hayli sâhirdür kadeh

Müflisi ma'mûr devrân-ı gedâyı şâh ider
Şeb-çerâg-ı dürr-i yektâyî cevâhirdür kadeh

Boşanur bintü'l-'ineb meclisde biz şâhidlerüz
Hullesiz tâlib yine vaslına kâfirdür kadeh

Baş açık abdâl-i 'aşkı olduğunda şüphe yok
Duhter-i rez olduğu meclisde hâzirdur kadeh

Her gice pençe salarsa ser-nigûn olur Sa'îd
Merd-eğen pehlevân -ı 'asr-ı kâhirdür kadeh
Harfü'l-hâ

28.

--. / --. / --. / --.
İtdi esîr-i zülfi beni bir civân şûh
Kadd-serv tîr-her müje ebrû-kemân şûh

Eyler nigâhi biñ saf-ı 'uşşâkı târumâr
Böyle cihâna gelmedi sâhib-kırân şûh

Takmiş yanında hançer-i ser-tîze gamzeden
Cellâd-ı çeşmi 'azabda çü âhuvân şûh

'Uşşâkı bir nigâha da şâyeste olmadı
Ey Türk-i genc-i gile- püser bî-emân şûh

İtdi Sa'îd tâze zemîn ile nev-hirâm
Nahl-i ma'ârif-i kalem-i nâ-tüvân şûh

29.

... / ... / ... / ..-

Bezm-i mey içre şeb ol mâha sarısam küstâh
Olsa mestâne de âgûsuma alsam küstâh

Disem ey şûh seni eyler idüm rencîde
Ahz-i bûseyle eger olmayabilsem küstâh

Câme-hâb-ı güli egninde de ‘uryân idicek
Ser-i bâline çü öksüzce dikilsem küstâh

21a.

Mervaha ol meh içün per-i hümâ-dil olsa
Hâb-ı nâz itse o ben ‘aşkla sarısam küstâh

‘Âşikam pâk-nazar dil-ber içün hem-çü Sa‘îd
El uzatmam tene tenhâda da kalsam küstâh

Harfü’d-dâl

30.

... / ... / ... / ..
Oldı tûl-ı emelüñ kur‘a-zen-i bûd ne-bûd
Penc-rûz içre münâsib mi dilüñ nâ-âsûd

Bizi teşvişe düşürme yiter ey nefş-i ‘anûd
Eyleme gark-ı günâh ile bizi gird-âlûd

Cây-ı âsâyiş-i emn oldı kiyâs itme sakın
Bize bu devr-nûmâ hayme-i pûr-nakş-ı kebûd

Nazar itmez şeref-i heşt-cihâna el-hak
Bezm-i bî- kesde bulan mültefe-i kurb-ı şühûd

Kavl-i Hak ile ‘amel eylemege nâsihdür
Saña ‘ibreti yiter vâki‘a-i ‘Âd u Semûd

Cûrmüñe mu‘terif ol hâhiş-i gufrân eyle
Mazhar-ı lutfî ide tâ ki seni Rabb-i vedûd

Rûz şeb kendiñe vird eyle salavât-ı selâm
Tâ şeff‘üñ ola ol sırr-ı makâm-ı Mahmûd

Rûz-ı ferdâ saña i‘tâ ideler nâm-Sa‘îd
Cebheñi hâk-i mezellede iderseñ fersûd

31.

... / ... / ... / ..
Sitâre yâver-i tâli‘midür felek Behzâd
Olaydı ben de idem pençe tâb-ı ferruh-zâd

Velî ne hâsil olur baña tevsen-i bed-baht

Ne deñlü râm ola dirsem ider o deñlü ‘inâd

Ne esdi bâg-ı murâda nesîm-i lutf u kerem
Ne gördü gonca-ı dil gülşen-i cihânda güşâd

Metâ‘-ı cehl-i revâyış- pezîr şehr-i sürûr
Nukûd-ı fazl u hüner oldu vakf-ı gam âbâd

Baña bu deñlü hüner yine ma‘rifetdendür
Bîdâ‘at-ı hünerê kim revâc elinden dâd

Çü cehl-mâye –i ‘izzet imiş ‘ibâdet ile
Benüm o târik-i ‘irfân her -çi bâd-âbâd

Kalem ki nahl-ı ma‘ârif dinür irince elem
Esîr-i mihnet olup gamdan olmadum âzâd

Geçince cânuma evzâ‘-ı çarh-ı kec-reftâr
Bu nazmı şî‘r-i Züheyr üzre eyledüm bünyâd

*Be-zencîred-i eyyâm ez-ân şikeste-dilem
Küçâ revem be-ticâret-i bed ïn-metâ‘ kesâd*

*Temettu‘i ki men ez-fazl der-cihân-ı deyrem
Heme cefâ-yı peder pûd-ı sille-i üstâd⁴⁴*

21b.

Yiter Sa‘îd yiter ur dehâne mühr-i sükût
Zebân-ı hâmeyi itme şikâyete mu‘tâd

32.

.--- / .--- / .--- / .---

Cihâni yakdı ol hüsn-i ziyâ-efrûzdan feryâd
Ne tâb-endâz imiş ol âtes-i dil-sûzdan feryâd

Nigâhı pâye-bahş-ı tesliyetdür hayl-i ‘uşşâka
Meded ‘ayn-ı fitendür gamze-i dil-dûzdan feryâd

Çeker perde visâl-ı ‘âşık-ı ma‘şûk için her şeb
Firâk-ı yâri ibrâz eyler ammâ rûzdan feryâd

Olinca hûzn olur vakt-i bahâr eyyâmı bâ-hevâ
Ser-i mütâli‘ eyler mevsim-i nev-rûzdan feryâd

⁴⁴ “Günlerin zencirine vurulmuş olmaktan kalbim kırık. Bu kötü ticaret ve zarar eden malın elinden nereye gideyim? Bu dünyâ mabedinde, benim kârim fazilettir; baba cefâsi ve üstat sillesinden.”

Senüñ râz-ı nihâlüñden olur destân-zen-i ma'nâ
Sa'îdâ eyle dest-i kilk-i kîr-endûzdan feryâd

33.

... / ... / ... / ..
Hamdüllah yine insâfa gelüp çarh-ı 'anîd
Ahter-i baht-ı siyâhum hele itdi hurşîd

Kaplamışken dil-i âyinemi ye's-i jengâr
Çekmiş iken reh-i ümmîdümbe bir sedd-i hadîd

Sad şükür lutf idüp hazret-i Sultân 'Osmân
Eyleyince o veliyyü'n-ni'am-ı hân-ı cedîd

Şerbet-i kâm çeker şimdi gürûh-ı dürsitân
Nûş idince nazar it galle-keşân-ı bâ-sadîd

Hak mübârek ide kalgay ile nûre'd-dîni
Öreki hazret-i sultânide itsün te'yîd

Dahi ser-'askeri mansûr muzaffer itsün
İde Allah bu du'â-gûyi da mansibla Sa'îd

Harfü'z-zâl

34.

... / ... / ... / ..
Düşmiş sefîd-i rûya her nokta hâl-i kâgız
Gül-penbe -ruh güzeldür ellerde âl kâgız

Herkesle itmeseydi efsâne -gûyi der-kâr
Bir böyle pîç ü tâba düşmezdi hâl-i kâgız

Söyler zebân-ı hâli ser-geşte-i visâle
Pervâne sûz-ı âtes olsa me'al-i kâgız

Hicrân-ı savmî eyler 'iyd-ı sürûra tebdîl
Nâkl-i peyâm-ı yâri idüp hilâl-i kâgız

Îzhâr-ı terş-rûyi mektûb olınca eyler
Her tâze-rû Sa'îdâ gûyâ nucûm-ı aşkile 'uzzâldür

Harfü'r-râ

35.

... / ... / ... / ..
Âsumân gûyâ nucûm-ı aşkile 'uzzâldür
Nokta nokta dâqlarla sîne-i abdâldür

22a.

Hikmetüñ işrâkına hurşîd tâb-âver degül
Ra‘şe-nâk-i havf-i kahruñ murg-ı zerrîn-bâldür

Künhüñ idrâkinde vasf-ı şer‘-i bî-çûn u çirâ
Bahs-i zâtuñda zebân-ı ehl-i hikmet lâldür

Âsumân itmiş kiyâmi hidmetüñde bî-‘imâd
Secde-i rûy-ı zemîn kudretüne dâldür

Dûstuñ ger düşmenüñ rûzı hûr u hânuñdadur
Hikmetüñ kim lâ-yezâlîdür berîn-minvâldür

Yâ İlâhi it müsemmâ sen mutâbık ismine
Bu Sa‘îd-i zâr bahr-i ma‘siyetde dâldür

Her ki fermânuñda kâsır ol giriftâr-ı gazab
Ol ki emrûñde kiyâm eyler hümâyûn-fâldür

36.

--. / .--. / --. / .--
Ol yâr-ı safâ-bahşa bir bûseye niyyet var
Ya himmet ile vâsıl ya her geh ‘azimet var

Mesken-ger-i gurbet itdi dili pür-zillet
‘İzzet vatana merbût gurbetde felâket var

Ma‘cûni leb-i yârûñ gayr ile devâ bulmaz
Tîr-i gam-ı firkatle kalbümde cerâhat var

İtme dilüñi tîre bâziçe-i gerdûndan
Her kârı te’hîrde bilseñ nice hikmet var

Şol câm-ı safâ-bahşı bir kez bize sun sâki
İhsânuña ‘illetdür kalbümde kasâvet var

Da‘vâ-yı tafsil ile vasf itme bize dûzah
Dûzah dil-i ‘âşikdur vâ‘izde hamâkat var

Tanzîr-i Sa‘îdâdur bu şî‘r-i Gazâyîye
Firkat-i gamuñ sanma takrîrine tâkat var

37.

--. / .--. / .--. / .--
İklîm-i kelâm gerçi ki sad-merhale-câdur
Pîrân-ı suhan-perverde nezdîk-nûmâdur

Nev-tab‘-ı suhan müferri‘-ı müsta‘idânem
Hem-pâ-zen-i hem-vâdi –i şî‘r-i zürefâdur

Vâdi-i hayâl-i suhana düşmeme bâ‘is
Efsûn-geri-i câvid-i kilk-i bülegâdur

Terzîk-i rakîk-âvere pey-rev olamaz dil
Yagmâ-ger-i pes-mânde-i hân-ı füsehâdur

Jeng-âverî-i tab‘ıbecîl olan el-hak
Bed-ta‘n kec-endîş –i kelâm-ı süfehâdur

Tahsîn-nüvâz Şükri –i musannif-i üstâd
Gavvâs-ı yem-i ma‘rifete mahz-ı safâdur

Gör tâli‘-i ber-geşteyi ol şâh-ı cihânum
Mânend-i felek kec-rev -i bî-ser ü vefâdur

Ol mâh-ı perî-çehreyi hod-bînûme sâñî
Hûbân-ı zamân içre eger olsa sîlâdur

22b.

Sen vâsil-ı gencîne –i ma‘nâ olamazsın
Mesmû‘ı-i tatvîli kelâmuñ ne belâdur

Hatm-i suhan u tayy-ı makâl eyle Sa‘îdâ
Söz az olup öz olması kavlü’l-evliyâdur

38.

--. / --. / --. / --.
Her tîr-i çarh kavs-i kaderden zuhûr ider
Hep âh-ı âteşîn seherden zuhûr ider

‘Uşşâka derd ol mehe sıklet virür rakîb
Efâl-i nâ-şinâsi o hardan zuhûr ider

Bed-asl olan şebîh olamaz asl-zâdeye
Sûd-kesân-ı hâs güherden zuhûr ider

Olmaz nazîre Rezmî-i üstâda ey Sa‘îd
Ol şî‘r şâh-ı mülk-i hünerden zuhûr ider

39.

--- / --- / --- / ---
Lebüñ yâkût rengi ruhlaruñ tâb-ı kamer-ferdür
Kaşuñ medd-i sa‘âdet nâsiyeñ hurşîd-i enverdür

Cemâlüñde müşâhid hâl-i ‘anber-bûydur yohsa

Ya gül-Çîn ya Hindû-beççe-i ferhunde-ahterdür

İder dâg-ı dilümden cûş eşk-i çeşm hicrûñle
Akar kûh-ı muhabbetden ‘aceb hûn-âb sellerdür

Gül-i gülzâr-ı hâkister semûm-ı âh-ı âteşden
Firâk-âbâd dirler kalb-i ‘âşik böyle bir yerdür

İdince ravza-i hüsnüñde mesken râhatuñ uçdı
Uyutmaz çeşm-i şûhuñ dil ki bir dem-keş kebûterdür

Şikâr itse Sa‘îdâ gam mî şâhîn hâs-ı ma‘nâyı
Senüñ bâz-ı hayâlüñ sayd-ı ma‘nâ içre ber-terdür

40.

... / ... / ... / ...
Ne bu mestâne bakışla bize bu gûlmemeler
Turrañı bâg-ı ruhuñ üstine sünbüllemeler

‘Âşıkı serv-kadüñ üzerine ber-dârla
Her zamân eyleme ol zülf ile çengellemeler

Âh kim pâyüñe yüz sürdürmek idi maksûdum
Mâni‘-i hâhiş-i dil oldu o engellemeler

Her bir a‘zâ ile etvârına yok zerrece söz
Baña gâyetde pesendîdedür ol gûl memeler

Gök gök olmuş gibi kâr-ı şeb ile verd-i terüñ
‘Ukde-i sîmi gûşâyışde mi bu ellemeler

Âsumân üzre süreyyâ mî ya pîr-i devrân
Keyf erbâbına ‘iydiyye gıdâ tellemeler

Bende-i hâs-ı derüñ ya‘ni Sa‘îdüñdür bu
‘Âdet-i şân-ı şerîfûñ mi tecâhüllemeler

23a.

41.

... / ... / ... / ...
Safâ-yı şî‘r ile ülfet dile gûşâyışdır
Mihekk-i tab‘a zer-i şî‘r âzmâyişdir

Gazâl-i şâhid-i ma‘nâyı zîb ü ârâyiş
Huzûr-ı tâlib-i ‘îrfâna bir nûmâyişdir

Garaz o çeşme-i dâg-ı derûn cûşından

Hayâl-i nahl-i kadüñ dilde bir sulayışdur

Rakîbi darb ider ‘uşşâk su diyinceye dek
O küstenî-i segi özge hîrpaleyışdur

O deñlü müntehâ-yı zîr ü bâr-ı ‘isyânuz
Güzâr-ı ‘ömr ile sanma ki kabzâyışdır

Kümeyt-i hâme rikâbuñda lâl olup kalmış
Sa‘îd kâfiye-i şî‘ri çok ârâyışdır

42.

--- / --- / --- / ---
Olur ‘âciz kitâb-ı hüsni şerhinde me‘ânîler
İder o âbî vasfin kasr-ı mîr ü Isfahânîler

Meyânuñla dehânuñ idemezler sırrını zâhir
Hayâl-i mû-şikâfin bezl ederse Taftazânîler

Belâdur başına agyâr dâ’im ehl-i ‘irfânuñ
İletsünler cehennem dereke anı zebânîler

Hîrâm-ı kâmet-i serv-i bürend-i fitne-engîzüñ
Göreydi heybetinden âb olurdu Kahramânîler

Civân-ı tab‘-ı nev-gûyâñı Hâkânîye pey-rev it
Sa‘îdâ nev-civâna muktedâdur pîr-i fânîler

43.

--- / --- / --- / ---
Ehl-i fazl olmaz tefahhur dâ’imâ hâmûşdur
Bahr-i a‘zam çaglamaz mânend-i enhâr gûşdur

Halka ber-gûş bende-i nefş ü hevâdur ol habis
Sanma abdâluñ iki gûşindaki mengûşdur

Ber-kenâr-ı âb ez-lutf-ı Hüdâ her serv-i bîd⁴⁵
‘Îşret-engîz safâ vü bezm-i nûş-â-nûşdur

Murg sanma gaflet-i eyyâm u mâh u sâl ile
Kesmege serv-i vücûduñ erre-keş bir mûşdur

Zemzeme itdi gice tâ subha dek göz yummadı
Bûy-ı gülle var ise bülbül dahi ser-hûşdur

⁴⁵ “Su kenarındaki her söğüt ağacı, Hüdâ’nın lütfundan...”

Gurbet-i kahr-ı felek çıktı dilümden dûd-veş
Sen Sa‘îdâ sanma kim ol gördüğün ser-pûşdur

44.

.-.- / ... / .-.- / ..-
Şarâb-ı la‘l-i lebüñ erguvânlıdur dirler
Dehân-ı tengüñi şîrîn zebânlıdur dirler

O sürme-rîz siyeh-çeşm-i âhûvânuñ içün
Hülâsa kelimât-ı Isfahânıdur dirler

O veche pâkden alduk ki bûy-ı mihr ü vefâ
Karanfil-i ruhuñı mihr-bânlıdur dirler

23b.

Duhûli rind-dilüñ hüsн bâgına memnû‘
Tenâd-ı gamzeñi tîr ü kemânlıdur dirler

Sa‘îd biz haber alduk kelâm-ı Sâbitden
Rakîb-i kelb –nişin ihticânlıdur dirler

45.

...- / .-.- / ..-
Bilemez ‘âşikin o meh-peyker
Belki bilse dahi tecâhül ider
Kor mî mihri firâka ‘uşşâkı
Katı öz ile dir ïn –mefesser

Kûyuñ içre rakîbe yir virme
Aña ta‘yîn –i mesken eyle sakar

Zîr-i zülfüñde görünür zahmı
Yâ hod ebrüñ içinde dogdı kamer

Mâlik-i genc olurdum ol sâ‘at
Kolumni bend ideyidi kemer

Seni râh-ı gubârdan sakınup
İki dîdem yoluña su sepler

Gögerür gâhice ruh-ı âlüñ
Âh kim bilsem ânı kimler emer

Lebleri la‘le oldı dâg-ı ciger
Gîbta-keşdür terlice ol memeler

Ker kabûl it Sa‘îdi ester-rev

‘Âşikuñ sâdikuñ odur dirler

46.

--. / --. / --. / --.

Kıldı beni esîr sitem-kâra rûzgâr
Bir buynu baglu bendesi mekkâra rûzgâr

‘İsyânı dilde mâye-i zevki neşât idüp
Döndürdi kalbi zülf-i siyeh-kâra rûzgâr

Yakma kulûb-ı halkı sakın itme târumâr
Pek çok dokunma kâkül-i dil-dâra rûzgâr

Bâg-ı emelde nahl-ı dil olmadı bâr-ver
Hasm-ı kadîm şâ‘ir-i sehhâra rûzgâr

Yazsa Sa‘îd bu gazelüm vechi var gibi
Sîmîn kılma safha-i zer-gâra rûzgâr

47.

--. / --. / --. / --.

İklîm –i bekâ ‘ârif-i billaha hevesdür
Dünyâ-yı denî kalb-i selîmine kafesdür

Cân vâsil-ı cânân olur illâ ki ten ile
Hep tûl-ı emel câzibe-i nîm-nefesdür

Rûzân u şebân ‘âkil olan gâfil olur mı
Her sâ‘at aña kûs-ı rahîl bâng-ı ceresdür

Kâmîl aña dirler ki ider kesb-i kemâli
Ten-perver-i nâdân hemân ‘ayn-ı feresdür

24a.

Dünyâ ile âlûde olan halk Sa‘îdâ
Bir lâşe-i mürdâra konan fevc-i megesdür

48.

-.-- / -.-- / -.-- / -.-

Reng-i ruhsâruñla mevc-endâzdur gül-zârlar
Mest olup efgân iderler ‘andelîb-i zârlar
Hayli demdür kim sebük-rev cân-ı ‘uşşâkuñ senüñ
Ta‘ne-i agyâr-ı bed-eftâl ile bîzârlar

Bûy-ı zülfüñ şemmesi irse dimâg-ı cânına
Tabla-i müşkin perîşân ideler ‘attârlar

Deyr-i mihnetde büt-i kaddüñ olaldan fikrimüz
Bagladuk zülfüñ hayâliyle siyeh-zünnârlar

Sûziş-i sîneñ senüñ böyle giderse ey Sa‘îd
Göstere Tûr-ı tecellîden nişâne nârlar

49.

... / ... / ... / ..
Mâl-i dünyâ ile şol kimse ki oldı magrûr
Hâbda genci olup ölmىše beñzer mesrûr

Ol ki nûş eyleye ‘ömürinde şarâb-ı gaflet
Râst reftâr idemez cisr-i fenâ üzre ‘ubûr

Dil-i tîre suhan-ı şem‘-i hidâyet neyler
Mâh-ı tâbân ile ülfet-zede olmaz şeb-kûr

Seng-i ta‘n irse dil-i çîni olur pür-feryâd
Gûiyâ tiynet-i aslı idi hâk-i fagfûr

Gird-i ‘isyân-ı şebâb sürme-i çeşm-i pîrî
Cûşî-i mey sebeb-i sâfi-i âb-ı engûr

Makbul-i merd leked-horde-i idbâr olur
Muhtelifdür ‘asel-i sâf ile nîş-i zenbûr
Şeb-i tîr içre degül şu‘le-i berk ey gâfil
Bize cellâd-ı felek çekmede yaluñ satur

Olmak isterseñ eger mûlk-i bekâ içre Sa‘îd
Dil-i vîrâneñi tevhîd ile eyle ma‘mûr

50.

... / ... / ... / ..
‘Âlemi bûy-ı gül-i bâg-ı dilüm mest eyler
‘Andelîb-ı nagam-ı ‘aşk ile hem-dest eyler

Turfa bî-kayd –reviş mey-gede-i ‘aşkum ben
Dilesem tâk-ı semâvâti dilüm best eyler

Gonca-i âhi felek bâg-ı dilümden koparur
Tâli‘-i şahs-ı nühûset-fere der-dest eyler

Resen-i hâhişi dil bahr-i tefekkûr içre
Mâhi-i baht-ı nigûnsârum içün şast eyler

Ben o feyz-âveri-i gülşen-ı ‘aşkum ki Sa‘îd
‘Âlemi bûy-ı gül-i bâg-ı dilüm mest eyler

24b.

51.

-.- / -.- / -.- / -.-

Halka halka âllar gûyâ ruhuñda bâdedür
Ya semen sahnında düşmiş âteşin seccâdedür

Rûyuña zülf-i mu'anber bî-nazîr üftâdedür
Hâl-i müşgîn tekellüfden egerçi sâdedür

Âb u tâba şirketi la'lüñ kuri gavgâdadur
Var ise reng-i leb-i dil-berine sahbâdadur

Himmet-i 'âlî-murâd olan o şûhi sevmesün
Yohsa hîrmen-i dil-i 'âşik tarîk-i câdadur

Maksad-ı ma'nâya râci'dür o taht-ı nâfede
Nükte-i ezmâr-ı gâ'ib ki zamîrhâdadur

Çeşmûne müjgânunuñ tîrin kaçan gamzeñ sanur
Dil hedef âmâc-gâh-ı sînede âmâdedür

Çeşm-i fettânuñ gezer her dem sûy-ı agyârda
Gösteriş meyl-i dil-i şûhuñ gûrûh-ı yâdadur

Şimdi kânûn-ı belâgatda Sa'îdâ var ise
Nagme-ârâ-yı hüner kilk-i suhan-pîrâdadur

52.

.--- / .--- / .--- / .---

Dü-dest-i nâzîkin ol şûh çün reng-i hînâ eyler
Figân kim hûn-ı hasret-rîz 'âşikilde câ eyler

Meger ol meh hevâ-yı hûn-ı 'âşikdan hînâ eyler
Yem-i hûn – mevc-i dilde her dem –i dîde şinâ eyler

Düşer pervâne-veş dil kûhsâr-ı tîg-i rahşâne
Perestiş-gâh –ı gamze hükm-i icrâ-yı kazâ eyler

Ne hâletler görür diller dü-çeşm-i sürme-hîzûñden
Vücûd-ı 'âşikî nîm-nigâhuñ tûtiyâ eyler

Yiterdi her biri ser-mâye rûy-ı hüsni hûbâna
Senüñ meşşâta-ı kudret ki hâlüñ câ-be-câ eyler

Nigâh-endâzı bî-mihrûñ dilümde neş'e-yâb olmaz
Tehi gerdânelük câm-ı şarâbı bî-safâ eyler

Geçerse satmaga dükkânçe-i nâz üzre ol mihre
Kumâş-ı vuslatunuñ donluğu pek çok bahâ eyler

Ne hâcet gamze-i ser-tîzi çekmek hayl-i ‘uşşâka
İşâret gûşe-i ebrûya kıl biñ yıl gazâ eyler

Şeker-bâş-ı fesâhatdır Sa‘îdâ kilk-i hoş-gûyuñ
Ki gûyâ tûti-i şîrîn-makâle iktidâ eyler

53.

.--- / .--- / .--- / .---

Şular kim şâ‘irân-ı nükte-sencânı begenmezler
Gurâb-ı şûmlardur ‘ændelîbâni begenmezler

Nola hem-sohbet-i ihvân-ı nâ-ehl olmasa kâmil
Girân-cânân ezelden ehl-i ‘îrfânı begenmezler

Zemîn-i mülk-i Mîsr-ı ‘aşkda ‘uşşâk-ı şeydâlar
Levendâne degülse mâh-ı Ken‘âni begenmezler

Cefâ dirler güzeşte- hûb-rû her gün tırâş olsa
Zarâfet-pîse dehr-i köhne-cânâni begenmezler
25a.

Leb-i âb-ı zülâlüñ gird-hat-ı sebz-gûnuñda
Görenler zulmet içre âb-ı heyvânı begenmezler

Çekenler zahmîni ol gamze-i ser-tîz-i pîrânuñ
Şu‘â‘-ı hûn-rîz-i tîg-i Kirmâni begenmezler

Sa‘îdâ elde iken kâr-gâh-ı kân-ı endîşe
Gürûh-ı ehl-i diller dürr-i ‘ummânı begenmezler

54.

--. / --. / --. / --

Murg-ı dili bûlbûl iden ol gonca-dehendür
Hatt-ı ruh-ı nev-restesi göñlümde dikendür

İtmiş tutalum va‘de-i vaslin hata ta‘lîk
Pâyân-ı bahâr içre olan zevk-i kühendür

Âgûşa degül dâm-ı hayâle bile basmaz
Bir âhu –yi vahşîdür o meh nâdirendür

Dil tâzelénür olsa güzeşte ruh-ı dil-ber
Sevdâya ‘ilâc âb-ı revân seyr-i çemendür

Hüsnüñde sefidî kef-i yem mevc-zen olmuş
Endâhte-i tüde-i ‘anber ki o bendür

Âşufste iden tekye-i gülşende hezârı
Bir gül ki ruhı tıynet-i gül-penbe bedendür

Ta'n itme Sa'íd öpse civân tab'-ı hasûdâ
Tartzı reviş-i tâzede bir pîr-i suhandur

55.

--. / .--. / .--. / .--
Bu 'aşk bize kismet-i rûz-ı ezelidür
Tâb-efgen-i hurşid-i felekden de celidür

Her kâr ki bahşide-i hûb-ı ezelidür
'Uşşâk-ı belâ-keşde cevâb eger belidür

Dest-resüñ olamazsa da matlûb-ı hakîki
Terk itme mecâzîni bu ânuñ bedelidür

Zahm-ı dil -i zâr dönmededür beyza-i surha
Her gamze ki bu kâfir-i Rûmuñ 'amelidür

Üftâde olup dil nola zâr itse çü zenbûr
Egninde libâsı ki o şuhumuñ 'Alidür

Bir bûseye al şimdi metâ'-ı dil ü câni
Ruhsâriña hat gelmededür gün nicelidür

İden ser-i zülfine Sa'îdâsını bende
Bir kâfir-i Bulgâr-neseb-i Rûm güzelidür

56.

.--. / .--. / .--. / ..-
Merde meydân-ı ma'ârifde hüner lâzimdür
Ne zer ü sîm ne envâ'-ı güher lâzimdür

Kâm-ı dilden nola dûr olsam eger rûz-ı cezâ
Sâlike puhte-dil olmaga sefer lâzimdür

'Aşk olan sîne vü 'akl olması imkân olmaz
Pîşe-sûzân olicak şîre güzer lâzimdür

25b.
Bahr-i a'zam olicak oldı derûnî tîre
'Akli kâmil ola çün dilde keder lâzimdür

Görmeyen Hakkı hakîkatde olur nâ-bînâ
Rû'yet-i pertev-i hurşide basar lâzimdür

Seni cezb-i Hak idüp olsa hevâ-yı vuslat
Bâd-bân keşti-i deryâ-reve per lâzimdür

Eşk-rîz ol güher-i ‘aşk ola dilde peydâ
Olmaga dürr ü sadef bahre matar lâzımdur

Tîg-i tevhîd ile kıl kâfir-i nefşüñ maktûl
İrtidâda düşenüñ hûni heder lâzımdur

Hırka-pûş olmayacak şeyh-i cihân el virmez
Aňla tagyîr-i şekil âlet-i cer lâzımdur

Şöhre-yâb olmayacak şimdi Sa‘îd o mihre
Ne ma‘ârif ne hüner âdeme zer lâzımdur

57.

.--- / .--- / .--- / .---
Gülistân-ı safânuñ ol düruh gül-sâlarındandur
Dil ol gülzâr-ı hüsnüñ bülbül-i gûyâlarındandur

Olur bî-nûş-ı keyf-âlûd bakdukca dil-i ‘âşik
Leb-i rengîn-i mevc-endâz mey-i sahbâlarındandur

Görüp çîn-i cebîn-i yâri telh-i nâ-ümîd olma
Peyâm-ı vuslatuñ ebrûları îmâlarındandur

İder emvât-ı kalb-i ‘âşiki ihyâ şeker handı
O meh-peyker ki hübân -ı zamân ‘Îsâlarındandur

Metâ‘-ı vaslı idüp terk olmak kâni‘-i bûse
Giriftârân-ı ‘aşkuñ ‘âlem-i sugrâlarındandur

Sa‘îdâ şûr-ı ‘aşk eyle be-kavl-i ‘ârif-i merhûm
Göñül bir bezm-i pür-şevküñ kadeh-peymâlarındandur

58.

--. / --. / --. / --.
Sâki suna şol câm-ı safâyı elemüm var
Def^e eyleyiñüz jeng-i dili hayli gamum var

Lâzım mı baña kesret-i dînâr ile şöhret
Mîrâs-ı key ü kâ‘ide-i câm-ı Cemüm var

‘Ankâ-yı felek çeşmûme bir per-i megesdür
Teslîs-i subûhîye ile şöyle demüm var

Terdîd ile teşvîşe düşürme beni rahm it
Ey şûh-ı levendâne senüñ gayrı kimüm var

Mecrûhlaruz gerçî ki gam çekmezüz aslâ
Halvâ-yı ruh-ı yâr gibi emle semüm var

Reşk-âver-i ihvân olan el-hak ki Sa‘îdâ
Gencûr-ı suhan nahl-ı ma‘ârif kalemüm var

59.

..-- / ..-- / ..-- / ..-
Dükilür hîrmen-ı eflâkideki erzenler
Görmemiş mi ‘acabâ gökdeki pervîzenler

26a.

Zahm-ı ten kesret-i feyz-i dil için vâsistadur
Ne kadar olsa olur tab‘- gûşâ revzenler

Subh hüsyâr gerek mest-i mey-i gaflet olan
Dest urur hâb-ı seher kâfileye reh-zenler

Üfürür âtes-i ‘uşşâki usûliyle dile
Bestedür bâd-ı hevâ kâ‘ide-i ney-zenler

Beñzer iken felek-i atlasa rûy-ı tâze
Nereden zâhir olur çak bu kadar sûzenler

Sebeb-i feyz-i hîredden mi hevâdan mı Sa‘îd
Merdden-i zevk için âşufte-ter güzerenler

60.

.-. / ..- / .-. / ..-
Dolâb-ı gülşeni rû sanma bir karâra döner
Döner o gül varak-ı rûy-ı tâze hâra döner

Nihâd-ı ‘izzet-i ‘âlem imiş derem-dâri
Me’âli nokta-i çarh-ı felek –medâra döner

O gonca âyne-veş meşreb-i dü-rûyîden
Olınca dest-be-dest pençe-i hezâra döner

Şu kim döner nefes-i huşk va‘d-i ferdâya
O gird-bâd-ı hevâdur ki rûzgâra döner

Sa‘îd bî-mey ü sâki olınca meclisümüz
Hemân o gülşen-i bî-gül olan bahâra döner

61.

--. / --. / .--. / --.
Her dem bu ‘âlem içre misâfir degül midür
‘Âkil hemîşe cân ile nâfir degül midür

Rahmetle bulmaga dilerüz cümle imtiyâz
Hakkuñ bir ism-i a‘zamı Kâhir degül midür

Âhir bu çeşm-i saht olabilsek dürr-nisâr
Hak seng içre gevhere kâdir degül midür

Hak diyü cilvezârı olan ‘ayn-ı zâhîde
Meydân-ı müdde‘âda müzâhir degül midür

Sîm-âb-veş olur dil-i hak cûy-ı bî-karâr
Hurşîd ıztırâb ile sâ’ir degül midür

Dolâb-ı çarh nokta-ı pergâr-ı ‘aşk ile
Bu ‘arsa-ı muhabbetâ dâ’ir degül midür

Böyle nazîre-gûyi-ı Reşidde ey Sa‘îd
Destüñde hâme hak bu ki sâhir degül midür

Harfü'r-râ

62.

... / ... / ... / ...
Girmedi gûşina hayfâ o mehüñ söz ile sâz
Ney-i kilküm tutalum nagmeler itdi şehnâz

Fâş ider râz-ı dil-i zârumı her bir demde
Görmedüm çeşmüm sırişk-âvere beñzer gammâz

Nedür ol câme-i sebz içre o endâm-ı sefid
Pûte-i berg-i semen rîhte-i sîm-güdâz
26b.

Kalb-i ‘uşşâkî nigâh-ı meh ider der-çengâl
Süzüyor kebg velî sayda dü-çeşm-i şeh-bâz

Eskal-ı cismüñe şâyeste mi lâf-ı uçmak
İtme ey şeyh-i riyâ-pîşe yukardan pervâz

İftihâr-ı şeref-i pâye-i ‘ünvân-ı Sa‘îd
Hat-ı şî‘rüm yiter oldukca aña safha-tırâz

63.

--. / --. / --. / --.
Âşûb-ı hîz-i zemzeme-i ‘âşikânemüz
Peyveste-gîr-i çerh-ı berîndür zebânemüz

Biz nâr-ı ‘aşk sûhteleriyüz semenderüz
Eşk-i şerâr -ı âh iledür âb u dâinemüz

Bahr-i hakîkate salaruz keşti-i dili
Tûr-ı mecâz-ı ‘aşkdadur bâd-bânemüz

Pervâz-ı hem-cenâh-ı hümâyuz kim eylerüz
Şâh-ı dırâht-ı ‘âlem-i kudsîde lânemüz

Biz ‘andelîb-i nagme-tîrâz –ı muvahhidü
Mescidle deyr birdür ‘ibâdetde hânemüz

Şimdi meyân-ı tâze-hayâlân-ı Rûmda
Besdür Sa‘îd bu gazel-i şâ‘irânemüz

64.

.-.- / .-- / .-.- / ..-
Velâyetin idiyor mûy-ı serle fâş henüz
‘Aceb mi şeyh-i şehr olsa nâ-tîrâş henüz

Felekde bir mehi her şeb kenâra çekmek için
Sipâh-i encüm ile çarh ider savaş henüz

Urılmadı gibi hayfâ o âfitâba mihek
Yüzinde meh gibi yok sikke-i harâş henüz

Dil oldı ciger-i hûn zahm-ı ta‘n-ı a‘dâdan
Gözümden akmaga yüz tutdı kanlu yaş henüz

Kelâm-ı pûç ile ihvâni seng-i ta‘n atarak
Nihâl-i kilk-i Sa‘îd oldı mîve-pâş henüz

65.

--. / .--. / .--
Biz gerçi ki bu cihânda mestüz
Ser-mest-i dem-i mey-i elestüz

Hâl ehli bizi ‘ademden añlar
Meydân-ı belâda gerçi pestüz

Hurşîd-i câmî eylerüz gerdân
Cemşîd Şâh gibi mey-perestüz

Olsak da hümâ-şikâr pervâz
Zülf-i siyehüñ yanında bestüz

Rengîn hayâl ile Sa‘îdâ
Bir bülbül-i zâr-ı gül be-destüz

27a.

66.

... / ... / ... / ..-

Mey-perestân ile gam-hâr-ı perîşânuz biz
Künc-i mey-hânede mey-hâr-ı perîşânuz biz

‘Aşk ile yanmada pervâne ile sûzânuz
Hem-nefes bülbüle bir zâr-ı perîşânuz biz

Dökilür mey çekicek bâd-ı hazân-ı gamumuz
Ber-güzeşte gül-i destâr-ı perîşânız biz

Hâmemüz bülbül-i destân-zen olur hem-çü hezâr
Tab‘-ı rengîn ile gülzâr-ı perîşânız biz

Dil akar her yüzü gülzâra Sa‘îdâ çün âb
Tab‘-ı meyyâl ile bed-kâr -ı perîşânuz biz

67.

... / ... / ... / ..-

Şol ki ser-mâye-i endîsesi ‘irfân olamaz
‘Akl-ı kül kâ‘ide-i tab‘ına bürhân olamaz

Dür-i feyzine sadef sînesi şâyeste degül
Merd hem-çü mesil-i meşreb-i ‘ummân olamaz

Hâlet-i nez‘a nice tevbe-i ta‘lîk eyler
Ol ki vâ-pes-i nefes ye’sde îmân olamaz

Yem-i rahmetden ider cümle halâ’ik ger nûş
Leşker-i mûr için secrde noksân olamaz

Tam‘a-ı renc dil-i sahta şikâ-zeddendür
Ger tabîb olsa Mesîhâ yine dermân olamaz

Hâk-i râh-ı kadem ol Hak seni itsün ‘âlî
Gird-pâ olmayacak hem-ser-i keyvân olamaz

Bu gazel nola Sa‘îd olsa cevâb-ı Tâlib
Çeşm-i insâf kadar kâmile mîzân olamaz

68.

... / ... / ... / ..-

Kelâm-ı şâ‘ir-i bî-‘aşk içre sûz u tâb olmaz
Gül-i hoş-bûy-ı nâ-sûzende âteşde gül-âb olmaz

Ne mümkün beñzemek ehl-i mecâzî ehl-i tahkîke

Bu zâhir her ber-âb-ı surhda keyf-i şarâb olmaz

Metâ‘-ı ma‘rifet eyler mu‘azzez ehl-i ‘irfâni
Libâs u zerle her ‘unvân-furûş ‘âlî-cenâb olmaz

Bulınmaz ‘akl-ı devr-endîş-i ‘âlem fark-ı câhilde
Misâl-i bahr-i ebyaz her bir an dek cây-ı âb olmaz

Zirâ‘at itmeyen hasret-keş olur vakt-i hîrmende
Te’essüf vakt-i pîrîde mükâfât-ı şebâb olmaz

Mey-i ‘aşk ile mestem şimdi ben ol deñlü ‘âlemde
Bu tâk-ı lâceverdî çesmüme per-i zübâb olmaz

Şarâb-ı hûn mı nûş eyledüñ ey çarh mihnetle
Yürekden hûb rengîn hûn-âğıste kebâb olmaz

Ne mümkün şeni evrâk-ı direng-i rûzgâr üzere
Gam-ı pür-sûz –ı gurbet kâbil-i satr-ı kitâb olmaz

Hücûm-ı ye’s ü mihnet lutf-ı Hakkı gayr-ı sâ’irdür
Hevâda ebri gör kim men‘-i nûr-ı âfitâb olmaz

27b.

Sa‘îd terk-i harâb it verziş-i âh-ı seher ile
Du‘â-yı subh-gâhuñ men‘i-i ‘arş u hicâb olmaz

69.

... / ... / ... / ...
Dil-i teng- havsala her nâz-ı dırâzı çekemez
Tâ -be-cây-ı reviş-endâzi-i nâzı çekemez

Tesliyet hâtır-ı âzâr-keşe olmaz pey-rev
Laht-yâb-âyne ta‘mîr-i nüvâzı çekemez

Yıkılur âh safâ-hâne-i tab‘um bir gün
Saht-ı yâr –ı felek-i ‘arbede-sâzı çekemez

‘Aks-i devrân-ı felek güldi bu ye’s ehli dile
Bâr-ı kâm-ı dil-i agyâr-firâzı çekemez

Nân-ı huşka dile a‘lâ görünür hûrsendî
Sâz-ı her lutf-ı hara târ-ı niyâzı çekemez

Dograr ebnâ-yı zamânâ su katar aşimuza
Terk ider sohbeti dil telh-i piyâzı çekemez

Ta‘n-ı agyârdan ‘uşşâk nola itse firâr
Şîr-i ‘âlî-menişân zahm-ı gûdâzı çekemez

Söyleme şı‘rûni bârîk-i hayâl içre Sa‘îd
Tab‘-ı ihvân-ı zamân şı‘r-i mecâzı çekemez

70.

-.- / -.- / -.- / -.-
Her dü-zülf-i yâr eldeyken hümâyı neylerüz
Sâye-gîr-i ‘anberüz murg-ı hevâyı neylerüz

Beste iken târ-ı âh sâz-ı şîvende bize
Nagme-i tanbûr ile âheng-i nâyi neylerüz

‘Âşikuz tiryâki-meşreb berş-i zehr-i gam-horuz
Vuslat-ı câm-ı şarâb-ı pür-safâyı neylerüz

Seyr idelden bender-i sûretde hâl-i Hinduyı
Âhuvân-ı Çîn ü Keşmîr ü Hîtâyı neylerüz

Terk-i hâhiş matlab-ı künc-i kanâ‘atdır bize
Tâc-ı şâhî serde keşkül-i gedâyi neylerüz

Hırka-ı her târ-ı tende zîb idüp sad-gam göre
Bir fenâyî Nakş-bendüz mâsivâyı neylerüz

Saydımuzdur âhu-yı ma‘nâ-yı gaybî ey Sa‘îd
Biz dehân-ı ma‘ni-i nâ-puhte-hâyı neylerüz

71.

-.- / -.- / -.- / -.-
Dil esîr-i kâkül-i dil-dâr ister istemez
Zahm-hâr-ı gamze-i mekkâr ister istemez

‘Âşıkı ol zülf-i ‘anber-bâr ister istemez
Beste-i zünnâr ider nâ-çâr ister istemez

Der-nigû-yı çerb telh için olur şîrîn-cevâb
Bal ider zenbûr-ı şîrîn-kâr ister istemez

28a.

Dil şifâ-hâh-ı leb iken zahm-hâr-ı gamzedür
Nîşe-i zendür tabîb bîmâr ister istemez

Gülşen-i dilde o şûhi ‘andelibân-ı suhan
Serv ile ölçer biçer hem-vâr ister istemez

Nâ-şekîbâne Sa‘îdâ bir gün âhir çün enîs
Hâlümi ‘arz eylerüm ol yâr ister istemez

72.

.--- / .--- / .--- / ..-

O şâh-i kişver-i hüsni görüp gedâlanıruz
Süm-i semendine rû-mâle hâk-pâlenirüz

Firâk-ı cür'a-keş -i telh telh isek de hele
Hayâl-i vuslat ile subh u şeb safâlanıruz

O âb u tâb ile şeftâlu -yı ruh-ı yâri
Görince kıl kaparuz öyle iştihâlanuruz

Olinca her şeb-i vuslat sefîd-i subh-ı bedîd
'Aceb cefâlanuruz bir 'aceb cefâlanuruz

Hevâ-yı bûselik ile gezüp 'Irâk u 'Acem
Terelleli ile yâ-lelli ile lâllenürüz

Kitâb-ı ma'nide mesned ileyhi- 'aşkuz lîk
Ki nahv-ı dîde-i nâdâne mübtedâlanıruz

Gedâ-yı zillet-i gurbet bizüz Sa'îd ammâ
Hayâl-i devlet ile gâh pâdişâlanuruz

73.

.--- / .--- / .--- / ..-

Çerâg itmez havâkîn ehl-i 'irfâni uyandurmaz
'Acedür bezm-i nâm u şânına bir şem' yandurmaz

Firîb eyler gedâyı va'de-i meknûn ile hayfâ
Cihânda kimseyi ihsân dutumından kıvandurmaz

Virür dil- teşnegân-ı hâhişe sakâ-yı eltâfi
Bir iki katre âb dirhem ü dînâra kandurmaz

Cihânda havf-ı itlâf ile hân-ı 'asrumuz hâlâ
Düşürmez dür eşigin lü'lü-i çesmin sulandurmaz

İder hakâret-i büt kâr-ı imsâkîde ol hazret
Dil-i zenbûr-ı nâsı şimdi lutfina revandurmaz

Öñine kollanurlar bendegân-ı hâk-i dergâhuñ
Aña yek pul-ı ücret nâm-ı hidmetden kazandurmaz

Der-ân bî-çâreyi ol âsitân-ı devlete der-hâh
Egerçi niçe demler nâ-ümîd eyler usandurmaz

Alurdi ögdilin meydân-ı vasfuñ bu Sa'îd-i zâr
Kümeyt-i hâme-i çâpük-revi hergiz yarandurmaz

Harfü's-sîn

74.

..-- / ..-- / ..-- / ..-

Lutf it ey bâd-ı sabâ vakt-i seher-hîz ol es
‘Anber-i turra-ı dil-dâr peyâmin dile res

28b.

İdemez cünbîş-i vâ-best-i der-dîde nigâh
Âh kim men‘e velî gamze-i kattâli ‘ases

Saña meşşâta dilüm şerha-i sînem şâne
Dil-berâ zülfüñi mîkrâs-ı muhabbet ile kes

Bârekallah zihî virmeđe zîb dîmûne
Tarz-ı destâr-ı levendâneye ol kırmızı fes

Seni hem-râh-ı rakîbân gören dir ne ‘aceb
Serv-i ra‘nâ ile gûyâ salinur bir iki has

Resm olnmaz ezelî resm-i Sa‘îdâ ‘âşik
Her ne deñlü dil-i zâr itse de mânend-i ceres

75.

-.-- / -.-- / -.-- / .-.

Ateş-i ‘aşk-ı mecâzîden idince iktibâs
Mürşid-i râh-ı hakîkat eyleyüp kıldum kiyâs

Merd olanlar câme-i zîbâ ile fahr eylemez
İrtifâ‘-ı kadr-i İbrâhîm Edhemdür palâs

Âbı teşhîs itmez âb içre mâhî seyr ile
Zât-ı Hakdan bî-haberdür bahr-ı hayret içre nâs

Cezbe-i nûr-ı Hûdâ kıl sâf eyle kalbüñi
Pertev-i hurşîdi ahz itmez olan âyine- pâs

Nûrı feyyâz-ı İlâhîden alur işrâkiyûn
Yohsa bî-nûr-ı Hûdâ hurşîd meh levh-i necâs

Puhte olmuş hûşe-i gendüm sefid-i müyuñi
Biçmege dest-i ecelde kad-i ham-küsteñi dâs

Kabza-i hâki kîlur tâk-ı kemâl üzre hilâl
Ol Hûdâvend-i zemîn ü âsumâna çok sipâs

İtdi istignâ ümîd-i ‘afv ile yâ Rab Sa‘îd
Beyt-i vâhidle nola magfür olursa bu havâs

Harfü's-şin

76.

... / ... / ... / ..-

Muntazır makdemüne ehl-i dil ey kahve-furûş
Suna fîcâni tolu kahve ile eyleme boş

Dil-i yârâna şîtâb ile yitişdür lutf it
Olmadan bâr-ı humâr ile melûl medhûş

Nice kahve o siyeh-fâm-ı Yemen mevlidi kim
Getürür büyî ölisî dile mânend-i Sûrûş

*Çin-i dâd-i ezel-i pend marâ üstâdem
Mahremet duhter-i rez nîst hem-ân kahve be-nûş⁴⁶*

Baña devr irdügi dem gadr-i ta'alluk itmeyem
Çekerüm ben de cemâ'at gibi pür-cûş u hurûş

Kahveci-zâde bu şeb bizlere hem-râz oldı
Egilince öñüme agzına tutdum ben gûş

Şûr-ı gavgâ ile pür mey-gede Nâ'ib hazer it
Cây-ı âsûde dilerseñ seheri kapuya düş⁴⁷

29a.

77.

... / ... / ... / ..-

Bâde-i câm-ı hakîkatden olan sahbâ-nûş
Olur ol câm-ı zûcâc içre ayakdan bî-hûş

Olamaz 'arsa-i rüsvâyide engüşt-nûmâ
Çekmese rind eger ritl-i girâni ber-dûş

Bir şarâbı idesin nûş ki tâ halk-ı cihân
Çeşm-i 'ibretle disünler baña hevâ-mey-nûş

Olamaz 'ışret-i dünyâ yine gamdan hâlî
Hem-dem-i sohbet ü hem-meclisüñ olursa Sûrûş

Nîl ider cismini mihnetle kelâm-ı a'dâ
Ol ki sünbü'l gibi eylemeye ser-tâ-pâ gûş

Hüsн-i tanzîm-i suhan ise Sa'îdâ besdür
Kalem-i nâdire-perdâzuñı eyle hâmûş

⁴⁶ "Üstâdımın bana ilk nasihatı, üzümün kızı mahrem, ancak kahve mahrem değildir."

⁴⁷ Dk. Bu gazeli Nâ'ib-i Yanbolu'nuñ gazelinden dimiştir.

78.

.--- / .--- / .--- / .---

Kabâ-yı lâle-gûn ber-dûş-ı şûh u şengdür âteş
Şarâb-ı şu'le-nisâr 'aşk-ı bî-ferhengdür âteş

İder her bir nazarda dîdeyi reng-i temâşâyî
Metâ'-ı âteş-i hârâ-yı reng-â-rengdür âteş

O bir bî-rahm- dil-ber sûzeni yek-pâre ahkerdür
Ki tıfl-ı yâd-gâr -ı âhen ü hem-sengdür âteş

Harîf-i dâmen-i dil serd-nefes-i bâddan nâşî
Gazabdan ejder-i âteş-feşân-ı cengdür âteş

Sa'îdâ Şâm Hind iklîmini teshîr için gûyâ
Ziyâ-yı tîg-i âteş-bârî-i hûşengdür âteş

79.

.--- / .--- / .--- / .---

Dem-i pîrî ten-i her ra'se-ger sîm-âba beñzermiş
Revân-ı nâzenîn-ı 'ömr cây-ı âba beñzermiş

Birin zîr ü birin bâlâ idince merd olan añaclar
Sipîrûñ oyunu 'iydiyye bir dolaba beñzermiş

Hayâtiyla münevver mevti ile târ olur 'âlem
Vücûd-ı fâzılân hurşîd-i 'âlem-tâba beñzermiş

Olinca müstefîd-i 'ilm-i tâlib merd-i vâlâdur
Güneşden iktibâs-ı nûr ider meh-tâba beñzermiş
Kalemüm bir lisâna iktidâr ile tekellümde
Hakîm-i zû-fünûn bu Nâsır-ı Fârâba beñzermiş

Fütâde mürdeğân-ı dûde-i ihvân-ı nâ-ehle
Meyân-ı billurede bir dür-i nâ-yâba beñzermiş

Çekîde telh-i evzâ'-ı cûhelden katre-i eşküm
Sa'îdâ rûyum üzre dir gören zehr-âba beñzermiş

80.

-.- / -.- / -.- / -.-

Rûyuña bakmış dil-i zâr gehi âh eylemiş
Mest-i mey-i hûsn olup hayli günâh eylemiş

Gamze silah-dâr-ı hûsn ebrû kemend-dâr-ı nâz
Mûlk-i melâhatde Hak sen mehi şâh eylemiş

29b.

Nûrı zalâm il'eyle zîb-âver idüp ol Hüdâ
Zînet-i rûyuñ senüñ zülf-i siyâh eylemiş

Dil nice dil-dâr-ı mülk vaz'ını inkâr ider
Âh ile eşküm aña iki güvâh eylemiş

Âhuma pey-rev Sa'îd subh-ı dem-i âteşîn
Dâmen-i çarh-ı felek vâ-hayf tebâh eylemiş

81.

--- / --- / --- / ---
Bu şeb tîg-i nigâhuñ gâlibâ mey-hârelenmişmiş
Dem olmuş zahm-ı sînem mevc-i meyden pârelenmişmiş

Akip âb u hevâ-yı ravza-i hüsn-i safâ-hîze
Dem-i fiskiye-i çeşmüm 'aceb fevvârelenmişmiş

Karanfil-veş ruhuñ dillerde mevc-endâz-ı reng olmuş
Gül-i rûyuñ meger kim keyf-i meyden hârelenmişmiş

O şûhuñ bezm-i reftâr itdüğü demlerde meh-sûret
Kenâr-ı safha-i rûyi ser-â-pâ karelenmişmiş

Sa'îde dest-res olmadugündan dâmen-i yârî
Delîl oldu ki ol üftâde pek bî-çârelenmişmiş

Harfü's-sâd

82.

--- / --- / --- / ---
Hidmet eyle şâh-ı 'aşka eyleyüp dil ihtisâs
Ser-i beyti üzre oldu kûy-ı mihnet içre hâs

Devşirür diyü hired sen meh nûcûm-ı erzeni
Çalmada her gün felek rûyine humdan bir rasâs

Mihr-i tâli‘ zerre-veş baña hüveydâ olmadı
Oldı hayfâ jeng-i gam ile dil-i âyine pâs

Âh kim çâh-ı zenahdâne düşen bî-dillere
Olmasa kullâb-ı zülfüñ dest-res bulmaz halâs

Ögdül için sen de meydân-ı ma'ârifde Sa'îd
Eyleyüp bu şî'ri dest-âvîzi bâm-ı çarha as

83.

--- / --- / --- / ---
Nice demdür iderin bu dili zâra mahsûs

Düşürebilmedium ol mâhi kenâre mahsûs

Âb u tâb –ı ruhı şeftâluyı almaya da yok
Kanı bir çâşni kim tâze-‘izâra mahsûs

Tâze dil-ber çeker âğuş-ı visâle her şeb
Eyleyen sîm ü zeri elde medâra mahsûs

Pâyine düşse nola yâr eger agyârûñ
Gülşen içre gül-i ter olmada hâra mahsûs

Nagme-i kilk ile vâ-bestê Sa‘îdâ bu gazel
Olmaz el-hak şu‘arâ içre hezâra mahsûs

Harfü’d-dâd

84.

... / ... / ... / ...
İtme ey dil ser ü sâmânuñ içün matlab-ı karz
Ger Aristo ise bî-hûş olur sâhib-i karz

30a.

Eylemez ter leb-i hâhiş-ger-i ümîdi dilâ
Olsa ger çeşme-i hurşîd saña kevkeb-i karz

Âb-ı çeşmin akıdur her-gehi mânende-i tâk
Ger şümâr eylese dil va‘de-i rûz u şeb-i karz

Ger dikilse baña öksüzce olup yakamda
Dürr –ı şehvâr ise düşsün be-meded yâ Rab karz

Va‘deyi eylese ferdâya Sa‘îdâ ta‘lîk
Meyl kılmaz dü-cihân içre dü-rûz u şeb-i karz

85.

-- / -- / -- / --
İtdi beni magbûn-ı cihân âh meded karz
Şûrîde vü bed-kâr-ı zamân âh meded karz

Ol bî-derem oldukça baña dest-res eyler
Dil ise ider zâr hemân âh meded karz

Sultân-ı cihân olsa dahi meskenet eyler
Makrûz-ı ‘aleme vir aman âh meded karz

Zer-gerden eger kulle-i kâf olsa da gelmez
Böyle dile bir bâr-ı girân âh meded karz

Rûm içre Sa‘îdâ seni terk itmedi aslâ
Sâyeñ gibi ol âfet-i cân âh meded karz

Harfü’t-tâ
86.

.-.- / .-- / .-.- / ..-
İder sipihr cefâyı baña vefâ ile halt
Gam-ı piyâle-i zehri sunar safâ ile halt

Sipihr-i hokka-i pîrûze derûnum ma‘cûn
Felek ider dil-i bîmâruma devâ ile halt

Tutar yüz ehl-i sa‘âdet tarîk-i idbâra
Görince mesned-i ikbâli nâ-sezâ ile halt

Hakîm-i hikmet-i nâ-sâz çarhı çalmadadur
Figân-ı nagme-i şîrîn idüp sadâ ile halt

İdüp bu pîruzenüñ mîhrini dilüñden dûr
Sa‘îd el-hazer itme o bî-vefâ ile halt

Harfü’z-zâ
87.

.--- / .--- / .--- / .---
İderse Hak ‘inâyet bendesin eyler hemân mahzûz
Olur manzûr-ı Bâri bir dem içre bî-gümân mahzûz

Neden eyâ cihânda münkesir erbâb-ı dildür hep
Bulup nev-devlet-i ikbâl-i çarhı kaltabân mahzûz

Dönerdi ‘aks-i kâm meşreb-i nâ-ehle bu devrân
Nigûn-ı ‘izzet-i agyâre olsa âsumân mahzûz

Niçün konmaz ‘aceb ‘ankâ-yı devlet âşiyânına
Niçün mihr-i sa‘âdet tâli‘ olmaz kâm-rân mahzûz

Nice olmaz Sa‘îdâ mübtelâ-yı bezm gamlardan
Bu Rızâ şî‘ridür gûş eyleyen âteş-demân mahzûz

30b.

Harfü’l-‘ayn
88.

.--- / .--- / .--- / .---
Beni bir dil-rübâ-yı şûh içün magbûn iden tâli‘
Beni çün Kays-ı Leylâ-veşe mecnûn iden tâli‘

Gama ser-mâye olsun diyü mülk-i Rûm-ı şûm içre
Dilüm yek-bûseye bir kâfire merhûn iden tâli‘

Cihânda dest-res olsun diyü nân-pâre-i huşkuñ
Beni pervâne-âsâ gird-i bâb-ı dûn iden tâli‘

Beni idüp tüvân-ger mâl-i hulyâ ile ‘âlemde
Künûz-ı fîkr-i gamla mislde Kârûn iden tâli‘

Sa‘îdâ-veş beni her târ-ı nâ-sâzî-i çarh ile
Hevâ-hîz-i fîgâna sînemi kânûn iden tâli‘

89.

-- / -- / -- / --
Bir tâze ruh-ı dil-ber-i ferhunde imiş şem‘
Bir ‘âşık-ı üftâde-i sûzende imiş şem‘

Sûz-ı dil-i pervâneye olmakda nemek-pâş
Bir Bû Leheb-i dil-ber-i nâzende imiş şem‘

Her şeb yanar ‘aşkuñ ile tâ-subh –ı kiyâmet
Pervâne-sîfat bî-dile tâbende imiş şem‘

Geh şa‘şa‘a-pîrâ-yı şeb-i meclis-i dîvân
Geh mürde-i subh-dem-i ferhunde imiş şem‘

Yandı dil-i zâruñ gibi gurbetde Sa‘îdâ
Bir yâr-ı şeb-i tal‘at-ı rahşende imiş şem‘

Harfî’l-gayn

90.

... / ... / ... / ...
Baña bir câmî felek sunsa ider zehr ayâg
Eyleyince anı ber- kâlibe dilde ifrâg

Ne gam-ı dehr ne efkâr-ı elem-peymâyi
Görmedüm kûşe-i mey-hâne gibi câm-ı ferâg

Yakdı kandîl-i dili pîr-i mugân var olsun
Yine bir câm-ı şarâb ile uyandurdı çerâg

Gamze biñ zahm urıcak tende nigâhı baglar
Eyledi sînede yârüm yine dâg üstini bâg

Ruhların ‘âşıkına zülf ile mestûr eyle
Gör tutar pertev-i hurşîde o dil-ber pür-dâg

Nakd-i cân u dili pâyüñe nisâr eyler idüm

Baña ol mug-peçe bâzârını itse tek sâg

Hep eritdi nesi var ‘aşk ile mânen-i Sa‘îd
Kalmadı bu dil-i mihnet-zedede zerrece yâg
31a.

Harfü'l-fâ

91.

-.- / -.- / -.- / -.-
Ol mihek-âverde-i âğuşı birle ittisâf
Eyleyen da‘vâ gerek âyine gibi sîne-sâf

Ol tezervi sayd-i çengâl-i dil-i meyyâl iden
Ya ola şâh-bâz-i deşt-i ‘aşk ya ‘ankâ-yı Kâf

Gamze-i mestâne-i nîm-nigâhın seyr iden
Dir şarâb-horde-i kâr-i tîg-i tîz-i bî-gulâf

Fehm ider ol sîne-i sîmîni manzûr eyleyen
Nükte-i âyine-i ‘aks-nümâyı bî-hilâf

Hâl-i ‘anber-bûyı ol ruhsâr-i gül-gûnuñda ya
Ravza-i gülzâr-i cennet âhu-yı müşgîne nâf

Cezm ideydüm oldugın makbûl eylerdüm hemân
Lâle-i hûnîn-i kalbüm bâg-ı dilde ittisâf

Cebhe-i sâf-ı hilâl-i ebruvân-ı zerd-fâm
Mescid-i zerrîn der- tâk maksad-ı cây-ı muzâf

Yine katl-i ‘âma niyyet eylemiş gûyâ hemîn
Gamze-i hûn-rîz ile müjgân olupdur sâf sâf

Cilve-i ma‘nâ-yı hûbuñ görmek ise ey Sa‘îd
*Kâsim-ı envâr hâhed dâşt bî-şek i‘tirâf*⁴⁸

92.

-.- / -.- / -.- / -.-
Pertev-i hurşîd zâhir hey’etinde ihtilâf
Zât-ı Hak rûşen cihâne rü’yetinde ihtilâf

⁴⁸ “(Sâhip olduğum bu kabilyeti) nur dağıtan (Allah)ın verdiği şüphesiz itiraf ederim.”

Hil‘at-i gufrâni ver-ber eyleyen bulur halâs
Râh-ı dûzahdan ve lîkin cennetinde ihtilâf

Ehl-i havf ol kıl ricâ ile tesellî kendüne
Müznibe bir dürlü yokdur rahmetünde ihtilâf

Sad-sipâs u hamd ile eyle zebânın nagme-kâr
Yokdurur hîç sâhib-i lutf olduğında ihtilâf

Müttefikdür ‘izzet-i echelde ‘âlem ey Sa‘îd
Hep ma‘ârif ehilnûndür devletinde ihtilâf

Harfü'l-kâf

93.

--. / --. / --. / --.
Tâb-ı ruhuñ keyf-i mey-i nâb ile bulduk
Feyz-i mehi hursîd-i cihân-tâb ile bulduk

Agyâr ile hem-bezm idügin biz haber alduk
Sen hûr-veşî sohbet-i kezzâb ile bulduk

Kâm-ı dile dün dest-resüm olmadı hayfâ
Câdû-geri-i çeşmi girân-hâb ile bulduk

Bir kît‘asidur mâh-ruhuñ mîr-i ‘imâduñ
Ta‘lîk-i hatuñ hüsnini nâ-yâb ile bulduk

Münkir degülüz mülket-i şî‘r içre Sa‘îdâ
Bu tarz-ı nevi vâdi-i ahbâb ile bulduk

31b.

94.

--- / --- / --- / ---
Tulû‘-ı nûr-ı ‘aşk ile müşâr-ı bâ-lisân olduk
Teferrûd eyledük ‘aşk içre bir sâhib-zamân olduk

Tenümde rîg deguldür târ u pûd-ı mihnet-i gamda
Leked- kûb-i cefâ-yı ta‘n-ı a‘dâya ketân olduk

Devâm-ı âh-ı bî- bûr u bî- isti‘dâddan feryâd
Dü-tâdur kaddümüz ikbâl ü dânişle kemân olduk

Hûcûm-ı kesret-i gam dâ’im isti‘lâ ider kalbe
Tevekkül hisnîna mahsûr olaldandur emân bulduk

İder te’sîr kalb-i ‘âşıkâne rûy-ı dil-sûzum
Giriftâr-ı muhabbet pey-rev-i âtes-demân olduk

Sa‘îdâ hamd ol Allah te‘accüb itmedük aslâ
Muhibb-i ‘ârifân-ı çâker-i sâhib-dilân bulduk

95.

--. / --. / --. / --.
Zann itme hemân saña benüm cân ile ‘âşık
'Alem saña dil-dâde vü biñ cân ile ‘âşık

Görmezse senüñ kadd-i ser-efrâzuñı iñler
Şûrîde- dilin serv-i hîrâmân ile ‘âşık

Bezm içre meded itme ‘ayân sîne –i sîmin
Pâyüñe düşer çâk-i girîbân ile ‘âşık

Bâlâya su‘ûd eyler idi hem-çü Mesîhâ
Hem-pâye olaydı saña dâmân ile ‘âşık

Hem-reng-i şakîk oldı gamuñla dil-i pür-hûn
Reng-âver olur lâle-i nu‘mân ile ‘âşık

Zâhir olıcak hat-ı ruhı kıldı Sa‘îdâ
Tekrâr bizi hüccet ü fermân ile ‘âşık

96.

--. / --. / --. / --.
'Âlemi garka-i hûn eyledi bu ra‘nâlik
Yiter ey şûh bu vâdide heves-peymâlik

Günde biñ hûn ise ger ‘umde-i tab‘-ı şûhuñ
Yine gelmez sanemâ ‘âşıka istignâlik

Olsun üftâdelerüñ hâk-i reh-i dergâhuñ
Şehlere ‘ârdur ey mâh-i cihân tenhâlik

Subh hurşîd iledür görmesi şeb mâh iledür
Çeşmi kûr felege düşmez iken bînâlik

Nefes-i nush ile dil-mûrdeleri ihyâ it
Saña ancak bu yiter kâ‘ide-i ‘Îsâlik

Dime kim hân-kah-ı ‘âlem içinde hâlâ
Kanı bir merd ki şayeste ola babalık

Kafes-i tende nice murg-ı dil ârâm eyler
'Arsa-i çarh-ı felek olmaz iken pehnâlik

Câhil-i dûnu çeker gör ser-i kâra devrân
Ehl-i dil nûş ider hûn-ı dilin sahbâlik

32a.

Kafes-i gurbet içinde dil-i tûfî-i Sa‘îd
Âh kim zâg u zegan itmede şükr-i Hâlik

97.

--- / --- / --- / ---
Nola biz rind-i ‘âşık-pîşe ez-ber havf u bîm olsak
Helâk-i gamze-i her-tâze-i mahmûr-i nîm olsak

Dil-i ferzene ‘asrı bezm iderse zer ider yohsa
Füsûn-kâr eylemez hûbân-ı devrâna kelîm olsak

Girîbân-ı keş-â-keş ta‘n-ı her ser-pençe-i ihvân
Mesîhâ-veş görinür sûy-ı eflâke kerîm olsak

Eger kismet ola pertev-nümâyîş zât-ı nâ-dâne
Ne hâsil gûne farzâ ‘ilm ü fazl ile ‘alîm olsak

Ser-i bî-kevkebe ma‘kûsî dûr-bîn-veş devri
Mukarrerdür eger kim Şâh Mahmûda nedîm olsak

Yine gelmez hoş-âmed meşreb-i nâ-ehl-i ‘îrfâna
‘Adûya terş-rû ahbâb u yârâna halîm olsak

Hayâl-i tab‘-ı Hâkânî nijâd-ı pûr-ı Tâtârî
Virince el nola reşk-âver-i şî‘r-i Fehîm olsak

Bizüz ol şâ‘ir-i mâhir Sa‘îdâ nola çarh içre
Sa‘âdet Hân-zâde ibn-i el-hâc Selîm olsak

98.

--. / --. / --. / --.
Aldı metâ‘-ı ‘aklum bir dil-rübâ-yı fâ’ik
Giyse libâs-ı gül-gûn olur gûl-i şakâ’ik

Bakdıkca ‘ayn-ı ‘âşık añlar me’âl-i nâzî
Ser-safha-i cemâle mektûbdur dakâ’ik

Şîrâze-bend olınca eczâ-yı gûne- ‘allâm
Hurşîd-i şemse rûze meh cild-i Şâma lâyîk

Üftâddur melâlde akvâl-i Hak muhâlif
Gün gibi zâhir iken güm-râhdur halâyîk

Gül pister-i safâda hâr ile şâd u handân
Gör ‘andelîb-i zârı efgân-ger-i hadâyîk

Sad-dâg-ı sîne ile ‘uryân çarh-ı abdâl
Bir mâh-rûya her gün dönmezdi olsa ayık

Bu şî‘r-i pür selâset manzûr olınca hakkâ
Tab‘-ı Sa‘îde dinse şâyeste bahr-ı râ’ik

Harfü'l-kâf

99.

--. / --. / --. / --.
Hatt-ı ruhuñ zuhûr ideli gitdi hâletüñ
‘Ankâ-yı kûh-ı Kâfa dönüpdür melâhatüñ

Hüsünüñ zevâli virmiše beñzer keder saña
Înkâra yok meçâl belürdi melâletüñ

Aldukca nakd-i dilleri hüsünüñ kefil itmiş
Yazıldı işte hatt-ı rûyuña kefâletüñ

32b.

Tutdı beyâz rûyuñı hep hatt-ı tîre-reng
İtdi siyâh bir necm hurşîd-i tal‘atuñ

Mensûh-ı hüsün nüshasını kâtib-i kazâ
Nakşin çıkardı rûyuña hatt-ı siyâkatüñ

Didüñ bu şî‘r-i hüsni zevâl ile ey Sa‘îd
İrdi dimâg-ı ‘âleme bûy-ı fesâhatüñ

100.

--. / --. / --. / --.
Arturdı câm-ı mey senüñ ey mâh hâletüñ
Râm oldı bûy-ı rûyin gelmeden melâhatüñ

Âşûb-ı fitne-hîz-i kıyâmet ‘ayân ider
Reftâra gelse nâz ile ol serv-i kâmetüñ

Hûbân-ı ‘asr bende-i hâk-i derüñdürür
Müjgân-ı sürme-hîz ile gâlib semâhatüñ

Âb u âtes içre sun‘-ı İlâhi gösterür
La‘lîn-lebâ ol dûzah-ı pür-letâfetüñ

Dâg-ı derûn-ı ‘aşka nemek-pâş-ı firkatüz
Kânûn ile şifâ bulamaz bu cerâhatüñ

Gül-çehregânı lu‘bet-i teshîre çekmede
Ey şeyh-i şehr hayli mü’essir kerâmetüñ

Evsâf-ı yârde bu gazel hayli hoşcadur
Makbûl-i ehl-i tab‘ Sa‘îdâ belâgatüñ

101.

... / ... / ... / ..
Hayli demdür dil-i gam-dîdemüzi demlemedük
Yâdgâr-ı Cemi mânend-i keyân Cemlemedük

Bize bu cevr ü ‘itâb ile neden istihkâk
Medih itdük bu cihân içre seni kemlemedük

Dün gice şârib iken yâr ile mahfîce rakîb
İtdük ihmâl o har eblehi biz semlemedük

Böyle vahşet-geri olmak bize bu meşk-i gazel
Süm-i âhû-yı Hotan izlerini nemlemedük

Matlabuñ dürr-i suhan gavs ile bahr-i gühere
Çak bu deñlü feri ihrâca Sa‘îd bilemedük

102.

... / ... / ... / ..
Rüstem-i saf-şiken-i manzarı olsa rûyuñ
Anı zencîre çeker kâkül-i ‘anber-bûyuñ

Mâh-ı ruhsâruña revnak-deh-i dîger olmuş
Şeb-i târik gibi zülf-i siyeh-i şeb-bûyuñ

Getürince ele bir kerre düşürmez idüm âh
Dil-i çevgân ile ol gabgab-ı sîmîn-gûyuñ

Saf-ı bismilgeh-i kurbân olur elbet geçemez
Dil ü cân ile varan kûyuña vuslat-cûyuñ

Tâli‘-i sa‘d ile eflâke çıkardum ol dem
Ele bir kerre getürsemidi bir ednâ mûyuñ

33a.

Sahn-ı gülzâr ola gülbüñ olur her demde
Sünbülüñden dökilen katre-i hoş-bû-hûyuñ

Tatlı diller yine vâdi-i nevi kıldı esîr
Yazdı bu şî‘ri Sa‘îdâ kalem-i hoş-gûyuñ

103.

.--- / .--- / .--- / .---

İdüp tezvîce ey dil kasd sen rüsvâ-yı ‘âm olduñ
Takıldı buynuña tuz torbası baba-yı dâm olduñ

Tutam sad-şevk ile kân-ı ‘arûs-ı vehdi deldüñ şeb
Uyanduñ hûb-ı gafletde ne gördüñ ihtilâm olduñ

Felek mürdâr idüp Kız Kullesinde bahr-i gam içre
Saña hâtun alan alçak ile sâhib-merâm olduñ

Hevâ-yı ‘âlem-i tecrîdde iken murg-ı şeh-bâzî
Zen-i sad-hîle-i sayyâd-ı dehre pây-dâm olduñ

Akıtduñ keşti-i dil sûy-ı ferc ba‘d-ı şedd ile
Çü keştiyân açup yelken hevâ-yı gîre râm olduñ

Açık başlar tarîkîndan alınca lezzet-i fânî
Varup ‘avrât bâzârında sen şeyhü’l-harem olduñ

Meger bu vâdi içre ‘Avni-i hoş-gûya pey-revsin
Niçün ey hâme-i bî-magz böyle kec-hîrâm olduñ⁴⁹

104.

.--- / .--- / .--- / ..-

Çün kanâ‘at iledür sohbeti merdân-ı gamuñ
Bî-şeker bâde-i huşkî dile pes nân-ı gamuñ

Mîhr-i ‘aşkumdur iden terbiyet-i kâm-ı dilüm
La‘l-i hûnîn-i ciger tâze Bedahşân-ı gamuñ

Hâme-i nâhun-ı mâtem ile eyler tahrîr
‘Arz-ı hâli şerha pûr- sînesi dîvân-ı gamuñ

Bî-riyâ anuñ içün ‘âşika âteş urmasa
Kanı bir merd-i nefes -germi bu meydân-ı gamuñ

Sînem âh lü’lüye döndürdi leb-i şûr-engîz
İdüp âmâde-nemek-pâşı pûr-ihsân-ı gamuñ

Târ-ı vasla çekeyüm dir dür-i nâ-süfteleri
Dâd feryâd eleminden bu sefhân-ı gamuñ

Bu gazelse nola Tarzîye Sa‘îdâ tanzîr
Şî‘r-i pâkizesidür nâdire-gûyân-ı gamuñ⁵⁰

⁴⁹ Dk. Bu gazel ‘Avnî-i şîrîn-suhanâ nazîredür.

⁵⁰ Dk. Bu gazel Tarzî-i hoş-gûya nazîredür.

105.

... / ... / ... / ..-

Pîç-der-pîç ruhuñ üzre komış ser zülfüñ
Pâs-bân oldu gülistânuña ejder zülfüñ

Yâhud ol sâ'il -i Hindû-yı siyeh-rûdur kim
Şehr-i gülzâr-ı ruhuñ üzre ider cer zülfüñ

Zînet-efrûz cemâlüm diyü itse da‘vâ
Olamaz kâkül-i hoş-bûyuña hem-ser zülfüñ

Ne ‘aceb âteş-i gülzâr cemâlûnde yanur
Niçesi hâl-i ruhuñ oldu semender zülfüñ

33b.

Oldı tûbâ-yı kaduñ üzre cemâlûn izhâr
Âşıyâni sâz olan zâg-ı siyehdür zülfüñ

Nice mümkün göre hurşîd cemâlûni Sa‘îd
Ebr-i bârân-sıfat sâye-fügendür zülfüñ

106.

... / ... / ... / ..-

Harâret-dâd hurşîd olsa ger rahşândan bezdük
Egerçi la‘l-i hâhiş-kânuż ammâ kândan bezdük

İçicek kumri-ı dil teşne-i tîg-i nigâhuñdur
Kitâl-i şu‘le-pâş hançer-i bürrândan bezdük

Biz ol hayrân-ı deşt-i âhu-yı çeşm-i Mogolânuż
Beyâbân-gîr-i hicrüz râhat-ı eyvândan bezdük

Bize Bâgçesarâyuñ bir civân-ı nev-resi olsa
Kavî-endâm her bir meyl-i nev-berândan bezdük

Sa‘îdâ tâze-rû mîrzâ-yı dil-berde karâr ammâ
‘Îbârethâ-yı Tâsluk vâdi-i Yersândan bezdük⁵¹

Harfü'l-lâm

107.

... / ... / ... / ..-

Dilüñden dûr eyle hûzni dâ’im ‘ayş u demden gel
Tedâvi eyle derdüñ var ise bir gonca-femden gel

⁵¹ Dk. Ser-‘askere bu gazel Yersân’dâ sadme eylemişdir.

Ma‘ârif sûd virmez bahr-i ma‘nâ içre gavs itsek
İdem makbûl dirseñ kendiñi sâhib-deremden gel

Kibâr-ı ‘asr ikrâm eylemez çün merd-i takvâya
Çeküp ritl-i girâni râh-ı resm-i ‘ayş-ı Cemden gel

Kaçar redd-i selâmı virmeden çîn-i cebîn eyler
Mülük-ı ‘asrumuzdan nâ-ümîd ol sen keremden gel

Sa‘îdâ hâhişüñ lutf-ı havâkîn ise ‘asruñda
Gabî vü câhil ü fessâk ol hem fasl-ı demden gel⁵²

108.

... / ... / ... / ..-
Olamaz kâbil-i âmed-şode her hûb bu dil
Mürtesim olalı ‘aşkuñ saña mahbûb bu dil

Düşeli başına sevdâ-yı hevâyî kâkül
Bend-i zencîr ile mânende-i meczûb bu dil

Akin itdi nigeh- endâz Tatâr-ı gamzeñ
Mahzen-i sir iken oldı saña menhûb bu dil

Âteş-i âh ile nâleyle ruh-ı zerd ile
Oldı sevâd-ı ‘akis-efgen-i zer-kûb bu dil

Olmayaldan o meh âverde-i âgûş-ı Sa‘îd
Hâk-i erbâb-ı ser-gerde –i meskûb bu dil

109.

... / ... / ... / ..-
Lebi gibi ruhuñ üstünde diye mâh-ı cemîl
Tâk-ı hüsn üzre asılmış bâd-ı ruşen kandil

34a.

‘Âriz-ı pâküñüñ üstinde siyeh hat yâhud
Nüsha-i hüsnüñe hattât –ı kader yazdı mı zeyl

Eşk-rîz dîde-i çeşm ile ten –i pür-za‘ifüm
Merd-i sekâ gibi kûyuñda ider halka sebîl

Kışt-zâr-ı mihen-i ‘aşkuña ‘âmil olalı
Fikr hûsum saña virdüm iki bi’l-mâl-i kefîl

Beyn-i ‘uşşâkda rahm it bu Sa‘îd-i zâra

⁵² Dk.Bu gazel Karasulu şâir Hilmî Efendiye naziredir.

Hâdim-i muhterem-i ‘aşkuñı sen itme zelîl

110.

--- / --- / --- / ---

Meger var reng-i bûyuñdan başında bir hevâ ey gül
Be-her şeb eyler efgân bülbül-i sâhib-nevâ ey gül

Degül şeb-nem saçar pîrâhen-i rengînûñ üstinde
Gül-âb-efşân olur bî-çâre her demde saña ey gül

Makâmın hâr haslar eyler iken gülşen-i kûyuñ
Sığışmaz ‘andelîb-i hoş-nevâ-veş her gedâ ey gül

Virüp destâr-ı sebzüñ bâde olduñ surh-ser şimdi
Olup âhir dökersin âb-ı rûyuñ germ-câ ey gül

Mü’essirdür meger efgân-ı bülbül subh-ı dem-keşde
Girîbânın seherde çâk idersin câ-be-câ ey gül

Sa‘îde reng bûyuñla olup pîrâye-i destâr
Safâ geldüñ başum üzre yerüñ var merhabâ ey gül

111.

--- / --- / --- / ..-

Getürüp geldi bize bûy-ı bahâri sünbü'l
Hayr-makdem-i gûlizâr-ı hezârı sünbü'l

Âsumânî o libâs ile idince cilve
Cây ider safha-i her tâze-nehârı sünbü'l

Teni gömgök yakası çâk perîşân-destâr
Gûiyâ pîse ider ‘arbede-gâhi sünbü'l

Goncanuñ hâr ile tokmaklamasından kaçup
Sâye-i serve iletmekde civârı sünbü'l

Âteş-i ‘aşk ile kandillerini yakdı Sa‘îd
Neylesün lâle gibi elde fenârı sünbü'l

112.

--- / --- / --- / ---

Be-her şeb hâr ile tâ-subh olınca ceng ider bülbül
Şerâr-ı âhîn âteş eşk-i çeşmin seng ider bülbül

Ne sûd eyler hezâra çünkü gûş itmez gül-i ra‘nâ
Usûliyle tutam sad-besteye âheng ider bülbül

Ne demde al astâr olsa bâg içre libâs-ı gül
Zemîni eşk –i çesm ile şakâ’ık-reng ider bülbül

İder bûy-ı gül irince hemân âgâz-ı nâ-sâzı
Meger esrâr-ı bûy-ı güle kendin beng ider bülbül

Meger kim vâr ise ger ‘aşk-ı pür-sûz-ı Sa‘îdâ-veş
Anuñçün kendüyi tâ böyle bî-ferheng ider bülbül

34b.

113.

... / ... / ... / ...
Kavli bed râyda kec her sözi nâ-puhe ‘alîl
Ne kadar râst direm dirse dahi İsma‘îl

Nefesi evc- zen-i Mîsr-ı belâgat olamaz
Eger âvâz-ı nehîk ile iderse tertîl

Tam‘a-âver sözi bî-ehl olana dinse sezâ
Asdı gûyâ omuzu başına bir boş zenbîl

Bize lân ile dûrûgına olur revnak-deh
Kanı âdâb-ı kiyâsîdeki bûrhân u delîl

Suhanuñ kadri pür-teşbîh degül ‘indinde
Nice mümkün ki Sa‘îdâ seni alsun mı günül

Harfü'l-mîm

114.

... / ... / ... / ...
Gerden-i bendini ol zülf-i girih-gîr idemem
Turrañı bu dil-i dîvâname zencîr idemem

Oldı ezmîne-i kalbüm gam ile jeng-âlûd
Mihr-i hurşîd-i ruhuñ olmasa tenvîr idemem

Aglamam derd-i gamuñ çekmeden ammâ agyâr
Göre kûyuñda komaz âh ile şeb-gîr idemem

Tâze-ma‘nâ-yı kalem hendeseden hâricdür
Câdu-yı kilki gil- efsûn ile teshîr idemem

Pây-ı tahta şeh-i iklîm-i ma‘ânî oldum
Kudret-i havsala-i tab‘umı takrîr idemem

Ne kadar mücid-i ebkâr-ı ma‘ânî olsam
Nef‘i-i sâhiri bir vech ile tanzîr idemem

Esb-i çâpük-rev-i tab‘ı yiñemem ben de Sa‘îd
Vâdi-i tâzede derr- tantana tedbîr idemem⁵³

115.

.--- / .--- / .--- / .---
Neden hem- tulu‘-ı hurşîd- rev ruh oldu şeb bilmem
Nedür âyâ bu vaz‘-ı cem‘-i ezdâda sebeb bilmem

Olup hem-vüs‘at-i âğûş-ı sahrâ-yı cünûn-ı ins
Rem-i etfâle seng-i ta‘ndan aslâ ‘azab bilmem

Vûcûd-ı rind ü ‘ârif mevlid-i rûz-ı sitemüm ben
Nesebi çâr-‘anâsır oldu dîger em ü âb bilmem

Degül bir rind-i keyf-âlûd hem-bezm-i hakîkatdır
Mecâz-ı câm-ı mey nûş itmege tahrîk-i leb bilmem

Sa‘îdâ nola pey-rev-kâr-ı vâdi-i Nedîm olsam
Eger küstâh isem ma‘zûr tut resm-i âdâb bilmem

116.

.--- / .--- / .--- / ..-
Mîr-i iklîm-i suhan tâze-zebândur kalemüm
Hâdi-i pîşine vü hûş- leme‘ândur kalemüm

Dil-i ahbâbum içün kilk-i şeker ü şîrîn
Dil-i a‘dâma hemân mât u çiyândur kalemüm

35a.

Reviş-i turfa-hîrâm-âverî-i tarz-ı bedî‘
Nâkil-i fenn-i ma‘âniyle beyândur kalemüm

Reng-i rûy-ı suver olsa nola kilk-i nakkâş
Sözde çıkmaz başa Hassân-ı zamândur kalemüm
Sad-zebân ehli eger olsa tekellüm eyler
Başdan ayaga degin cümle dehândur kalemüm

Bahr-i ebyazda ne dem şevk ile olsa cârî
Bulmuş eyyâmını keşfî-i revândur kalemüm

Mâdih-i çeşm ü ruh u kâkül ü zülf-i hûbân
Vâsif-ı hâl-ı süveydâ-yı tebândur kalemüm

Nedür ol turfa hîrâm ile sarîr-i dil-keş
Nagme-i hûb-ı ney-i Mevleviyândur kalemüm

⁵³ Dk. Bu gazel Şeyhü'l-kasîde Nefî-i üstâde nazîredür.

Hâsılı kat‘-ı zebân olsa da durmaz söyler
İtme hem-râz Sa‘îdâ dü-zebândur kalemüm

117.

.--- / .--- / .--- / .---
Kazâdur kâr-ı zahm-ı sîne zâhir tîr nâ-ma‘lûm
Belâ nâzil mü’essir mutlak-ı tedbîr nâ-ma‘lûm

Olup ârâyış-ı ten gösterür esbâb-ı rahtlar
Huzûr-ı vakt-i murg u şîr-i merd-gîr nâ-ma‘lûm

Ziyâ-yı ‘adl gâ’ib zulmeti hayf âsumân-endûd
Figân-ı âh u ‘âlem der-meyân şeb-gîr nâ-ma‘lûm

Olup ahvâl-i ‘âlem ‘ukde-i vâ-best-i müşkil
Güşâyiş-kâr dest yek hakîm-i pîr nâ-ma‘lûm

Sa‘îdâ kâr-ı her-vâ-best-i hükm-i İlâhi iken
İder her şahs-ı câhil mebhâs-i takdîr nâ-ma‘lûm

118.

.-- / --- / .- / ..-
O âb u tâb-ı ruhuñ ben gül-âbdan bilürem
Tulû‘-ı mâh-ı nevi ‘aks-i âbdan bilürem

Ki katre-i ‘arak-ı ‘itr-ı rûy-ı hoş-bûyuñ
Meşâm-ı cânuma bûy-ı gül-âbdan bilürem

Hevâ-perest olan şeyh-i ehl-i dünyâyi
Güzeşte ‘ömür firâr olsa şâbdan bilürem

Elem-keşîde-i sûz-ı derûn-ı ehl-i dili
Harâret-i ciger-i ıztırâbdan bilürem

Sa‘îd bende-i âl-i ‘Abâ olan merdi
Muhibb-i hâk-i rehi bu turâbdan bilürem

119.

... / ... / ... / ..-
Oldı dil bir sanem-i kâfire âşufste-i Rûm
Duhter-i bâl-i ‘inebdürdür-i nâ-süfte-i Rûm

Şerha-i sîmimi dârendeliye döndürdi
Yevm-i bâzârı hisâb itmede dil hefte-i Rûm

Beyza-i surh gibi paskalyada ra‘nâlanarak
Âteş-i ‘aşk ile kıldı tenümi tefte-i Rûm

35b.

Tâk-ı mihrâb-ı kilîsâdur o ebrû-yı hilâl
İtdi hemyâze-i nezzâre beni hufte-i Rûm

Olıcak hâme bu vâdîde Sa‘îdâ gûyâ
Dimesünler mi saña şâ‘ir-i hoş-güfte-i Rûm

120.

-.- / -.- / -.- / -.-

Gamze-i dil-ber ki tîg-i cânsitânumdur benüm
Her müje tîr-i hilâl-i ebrugânumdur benüm

Rind tab‘um kîl ü kâl açmam dehân-ı yârdan
Hokka-i ser-bestê-i râz-ı nihânumdur benüm

Murg-i çîn- meşreb-i per-vâz-kâr-ı ‘âlemüm
Pîç pîç –i zülf-i ‘anber âşiyânumdur benüm

Bir kemend-endâz ‘ayyâr-ı cihândur gamzesi
Ben esîrem kâkül-i gerden keşânumdur benüm

Tûti-i mu‘ciz-kelâmam tâzelerdür âyinem
Şekker-i leb bâ‘is-i nutk-ı zebânumdur benüm

Nûş idüp câm-ı şarâbı yâr itdükce hirâm
Bûlbûlem ben ol nihâl erguvânumdur benüm

Sürme itsün şî‘rûmi ihvân-ı nâ-bînâ Sa‘îd
Sâ‘ib-i tab‘um ki gurbet Isfahânumdur benüm

121.

.--- / .--- / .--- / .---

Beni bî-vâye itdi âh kim bu Rûm-ı merzbûm
Tamâmet-i şu‘ûrum eyledi şû’Rûm-ı merzbûm

Olurduñ lahzada dîvâne-i zencîr-i der-gerden
Saña mesken olaydı ey Aristo Rûm-ı merzbûm

Cefâ-yı çarhdan bed-tab‘ olur çün merd-i tiryâkî
İder ehl-i dili şol deñlü bed-hû Rûm-ı merzbûm

Nice sultân-ı ‘âlî-şâna kendüsün yakalatmış
‘Aceb bir kocadur yüz şeb-i hôver Rûm-ı merzbûm

Sa‘îdâ kalmamış ‘ismet içün güncâyişe imkân
Olup gûyende vü çingâne memlû Rûm-ı merzbûm

122.

--. / --. / --. / --

Eyyâm-ı bahâr irse de mey-nûş idebilsem
Mey nûş idicek bahr gibi cûş idebilsem

Sahrâ-yı Hotanda bir olurdu ter ü tâze
Ol âhuyı der-halka-i âgûş idebilsem

Zencîr-i ser-i zülfine pâ-besté iderdüm
Pây-ı dil-füzûnuna beyûsiş idebilsem

Yûsuf-veş iderdüm suhanum zînet-i bâzâr
Matlûb-ı ‘azîzân ile hurûş idebilsem

Pey-revlük ider Nâbî-i hoş-gûya Sa‘îdâ
Ol mahzen-i sîr hâmeyi hâmûş idebilsem

36a.

123.

...-- / .-. / ..-

Men ki mey nûş-ı mest-i bî-‘ârem
‘Andelîb-i mugân-ı gülzârem

Çekerem her sabûh rıtl-ı girân
Ne kadar olsa bâr-ı hammârem

Bü’l-‘aceb zih-i pür-safâ tab‘um
Nîke nîk ü bede o bed-kârem

Gül-i yek-deste-i ahîbbâyem
Çeşm-i a‘dâya tûde-i hârem

Âh-ı şu’ûn-nümûd-i pür-hande
Hem-sabak-hân-ı bülbül-i zârem

Görmege rûy-ı maksûdi çü Sa‘îd
Çeşm-i pür-hâb baht-ı bî-dârem

Harfü’n-nûn

124.

--. / -. / -. / -. -

Kat‘-ı ta‘alluk ile bu çarh-ı elîmden
Miskin gerekse ravza-i dâr-ı na‘îmden

Hatt-ı siyehle safha-i rûyi nişân virür
Bir âl kâğız üzerine hat sakîmden

Almış meyânuñ ile sîrât isti‘âresin
Miftâh-ı ‘ilm kantara-i müstakîmden

Olduk remîde-dil hele hûbân-ı Rûmdan
Bir serv-i şûh bes idi hâk-i kadîmden

Yegdür ta'âm-ı havâri dü-nân olmadan
Yek nân-ı huşk süfre-i cûd u kerîmden

Bir gün 'arûs-ı kâm gele âgûş-ı hâhuñ
Kesme ümîdi hazret-i Rabb ü Rahîmden

Yegdür 'inâyetüñ baña bir zerre yâ İlah
Mahmûd Şâh himmet-i Hân Selîmden

Tab'uñ Sa'îd rûşen iderseñ çerâgını
Revgan-keş ol ma'âni-i şî'r-i Fehîmden

125.

-- / -- / .-- / --
'Âşık alînca kâmını ref-i nikâbdan
Dogdu murâdî gün gibi zîr-i hicâbdan

Birkaç piyâle nûş kılan zevk-yâb olur
Bir gül yañaglu sîm-beden mâh-tâbdan

Te'sîr-i feyz-i bâkî olur rûz-ı haşre dek
Her zerresi neşât ile kalkar türâbdan

Dolâb-ı çarh teşne-i 'aşk ile çevrilür
Mesmû' eyledük bunı biz şeyh ü şâbdan

Nâ-mahrem oldı duhter-i rez görmege bize
Nâzir olur derîce-i câm-ı habâbdan

Hâdi zelîl-i fulki nedâmetle geçmişüz
Her mevci mahz-ı âteş olan kişver-âbdan

Bu nev-şigüft-i safha-ı ma'nâya ey Sa'îd
Îste nazîr bir dâr-ı 'izzet-me'âbdan

36b.

126.

... / ... / ... / ..-
Bize bir şûh-ı levendâne-reviş yâr olsun
Cilvesi hûş rübâyende-i bâzâr olsun

Dişleri dürr-i 'Aden gözleri âhû-yı Hotan
Ruhı gül-berg-i semen gamzesi Tâtâr olsun

Olmasun ‘umde-şiken belki nihâl-i kaddi
Mîve-i mihr ü vefâ-şân ile pür-bâr olsun

Hased ol rind-i hümâyûn-fer-i sa‘d- ahtere kim
Böyle bir hûb ile halvet-zede her-bâr olsun

Mezheb-i ‘aşkda makbüldür ol ‘âşik kim
Sînesi külhen-i ‘aşk dîdesi hûn-bâr olsun

Geldi çün vakt-i bahâr gaflete düşme zînhâr
Bir civân şîşe be-dest âb-ı çemenzâr olsun

Böyle bir gam-şiken-i sohbet-i nâ-dîde için
Kendi bir rind-i cihân şâ‘ir-i sehhâr olsun
Olmasa bu gazelüñ lafzi tasannu‘la Sa‘id
Bâg-ı tab‘uñ gûlidür zîver-i destâr olsun

127.
--- / --- / --- / ---
Dil-i sûzân-ı huşkum oldu hasb-i dîde-i terden
Cihâna sûz-i bahrin dûn-terdür hâsılı berden

Olan ‘ibretle nâzir irtihâl-i ehl-i dünyâya
Hemân dir merd-i cân-bâzuñ güzârı heft-çenberden

Hakîkatle mecâzuñ câmi‘idür vâsil-i ma‘nâ
Ne mümkün kuvvet-i pervâz murg-ı cism-i yek-perden

Bulur ‘ayş-ı şenî şîr-i nefesi eyleyen maktûl
Görülmez mi olur nân-pâreye nâ’il geçen serden

Eyâ fazl ile sözdür câhi tahkîr eyledüm sanma
Gelür mi san‘at-ı âhen-gerân dest-i zer-gerden

Muhakkak ehl-i isti‘dâda lâzım hidmet-i üstâd
Meh-i nev iktibâs-ı nûr ider hurşîd-i enverden

Kelâm-ı hikmet-i ‘âleme girân-cân câhildür
Hemânâ seng-i saht âsiyâb itdi dürgerden

Olur nâ-yâfte-dil ma‘ni-i şî‘rüm iden tahkîk
Belürmesin bilür niyyet girân-ı pâk cevherden

Olam dirseñ cihânda şâ‘ir-i efrâddan ma‘dûd
Sa‘îdâ müstefîd ol şî‘r-i Nâbî-i suhan-verden

128.
--. / -. / .-- / --.

Âteş-zebân-ı pey-rev-i pîr olmak isterin⁵⁴
Esrâr-deh-i kilk-i debîr olmak isterin

Dil hâh-ı hîz-i pîse key-i şâ‘irâneden
Şehr-i tenhâ-yı hâme-sarîr olmak isterin

Bir mâh-rûya muktebis-i nûr-ı ‘aşk olup
Pertev-fezâ-yı mihr-i münîr olmak isterin

Dil beste halka halka-ı zülf-i siyâh ile
Âlûde-i gubâr-ı ‘abîr olmak isterin

Gâhîce zîr-i destümde muhkem idüp anı
(Mûlk-i) safâ-yı nâze emîr olmak isterin

(Bir)‘andelîb-i gonca-ı nâ-fem serây olup
Bir şûh-ı dil-rübâya esîr olmak isterin

Her satrı şerha-i sîne ser-tîz-i gamzeden
(Cây-ı) girişme içre habîr olmak isterin

Lehce-tırâz-ı ‘Örfî-i Şîrâz olup Sa‘îd
Âteş-zebân-ı pey-rev-i pîr olmak isterin

129.

-- / -- / -- / --
Her-gâh ki endîşe-i hûbân iderin ben
Ezhâr ile pür ‘ayş-ı gûlistân iderin ben

Sûziş-i dilüñe idemem güfte-i çâre
‘Aşk-ı dili hurşîd-i dirahşân iderin ben

Bir kerre senüñ cây-güzâruñda bulunsam
Çeşm dürini hâk ile yeksân iderin ben

37a.
Her demde girer beynine ‘uşşâk ile yârûñ
Âh-ı dili tesâ‘ud rakîbân iderin ben

Her gün bu kadar sîneme zahm urmaga bâ‘is
Meşk-i sitem-i kaşı kemânân iderin ben

Günden güne olmakda tenüm mûydan ez‘af
Tahyîl-i kad-i mûy-ı meyânân iderin ben

⁵⁴ Bu gazel derkenardadır. Parantez içindekiler tamir görmüştür.

Gitmiş bu zemîn üzre Sa‘îd Nef‘î-i üstâd
Nahl-ı kalemüm pey-rev-i Hassân iderin ben

130.

-.- / -.- / -.- / -.-
İsteyen leb-nemege kurbân-ı cânân olmasun
Rûz şeb virür şeker ‘aşk-ı civânân olmasun

‘Âşıka kalbi şefik olsun o serv-i ser-keşüñ
Devrden ‘arz-ı ruh ile mâh-ı tâbân olmasun

Zîr-i pâyinde turâb olsam kadem basmaz geçer
Kimsenüñ yâri aman mihr-i dırâhsân olmasun

Cismini mülk-i melâhatde mehüm olsun diyen
Nâzır-ı hûn-rîz-kâr-ı tîr-i müjgân olmasun

Humret-i çeşmi eser itmiş cemâl-i pâkine
Kimseler yâr-ı nez ü hem-bezm-i mestân olmasun

Bulmayan şöhret cihân içre meger ‘âşık degül
Mümteni‘ ‘âşık olup ‘âlemde destân olmasun

Sîneñi tasvîr-i hûbân itmeden dûr it Sa‘îd
Dil nazar-gâh-ı Hûdâdur kâfiristân olmasun

131.

.--- / .--- / .--- / .---
Ne tapsun lâle vü sünbüle gül serv-i semenlerden
Çü hâlî sahn-ı gülşen serv-kad gonca-dehenlerden

Dil-i şûhum hayâl-i tâze ister sîneye yohsa
Ne minnet vasla o nâ-zâr ile yâr-ı kühenerlerden

Bu ‘asruñ dil-beri hep yüzî yirde oldugindandur
Geçilmez ki ire la‘li kûyi vasl içre dillerden

Aşup bir nice yoldan kûha bellü râh irüp soñra
Girer bâg-ı visâle böyle yâdumda olanlardan

Sa‘îdâ mîr-ı kilke terbiyet üzere hâs oldum
Biraz nâ-refte vâdi pey-rev-i sâhib-suhanlardan

132.

..-- / ..-- / ..-- / ..-
Câme-i surh ile her dem ki hüveydâsın sen
Şafak içre görünür mâh-ı temennâsın sen

Nice mümkün ola tûbâya müşâbih kaddüñ
Cünbiş-i şîve-i reftâr ile a'lâsın sen

Ne var ol gerden-i kâfûr ile ol la'l-i lebüñ
Bir içim âb yâhud katre-i sahbâsin sen

Câme-i sebz ile virdükce hirâma ruhsat
Çemen içre salinur serv-i dil-ârâsin sen

37b.

Yine bu nazm-ı revâ-bahş ile el-hak ki Sa'îd
Reşk-endâz-ı dil-i sûz-ı nazîmâsin sen

133.

.--- / .--- / .--- / .---
Şarâb-ı teşne-i 'aşkuña kim mestâne döndüm ben
Dilümde âteş-i kûh-ı tecelliyyâne döndüm ben

Ne gam-perver sitem-i dür-i eşke ceyb ü dâmânum
Egerçi gavta-kâr-ı şûr ile 'ummâna döndüm ben

Yakup cism-i za'ifüm subh-gâh-ı şem'-i kudsîden
Olup gerdân u sûzân derd ile pervâne döndüm ben

Dil-i sâf u hayâl-i hâs ile dünyâ-yı dûn içre
Sadefe gûşe-gîr -i katre-i nîsâne döndüm ben

Bulinca vâdi-i tahkîk içre gevher-i ma'nâ
Çeküp endîşe târ-ı sübha-i mercâne döndüm ben

Bihamdüllah elde hâme-i gevher-nisâr-ı feyz
Sadef-tab'-i Selîmem bahr-i bî-pâyâna döndüm ben

Baña her mâye-i 'izzet Sa'îdâ besdür istimdâd
Dilüm bir genc-i mahfi hazret-i sultâna döndüm ben

Dimâg-ı 'âleme irdi gül-i eş'âr-ı hoş-bûyum
Bu sûz-ı 'aşk ile bir micmer-i sûzâna döndüm ben

134.

--. / --. / --. / --.
Geçdük senüñ ey çarh-ı cefâ-cû keremüñden
'Afv eyle bizi dagdagâ-hîz elemüñden

Oldı seheri gonca-dehenler gül-i handân
Ey bülbül-i şûrîde bu feyz oldı demüñden

Gülzâr olur dîde-güşâ-yı reh-i hasret
Bir kerre sabâ süriye hâk-i kademüñden

Olur dil-i ‘uşşâkda tâvûs-ı ma‘ânî
Ey kebg-i suhan cilve-ger oldukca femüñden

İhsânuña minkirdüm eger olmasa ey çarh
Her dâg-ı gam-ı sîne felekde deremüñden

Hurşîd tehî-câm nukl encüm ü meh nân
Pes rivâ sûreyyâ ki felek bezm-i Cemüñden

Her tâze-suhan-gûlara ‘aşk ile Sa‘îdâ
Bu gonca-i ebkârî lisân-ı kalemüñden

Cûş itdi yem-i reng-i gûlistân-ı fesâhat
Açılmada gûlhâ-yı ma‘âni rakamuñdan

135.

--. / --- / --. / ---
Nûş-ı mey-i ‘aşk itdüm ben câm-ı Elestîden
Sad-şûkr halâs oldum kayd-ı ten-i hestîden

Pervâne-i lâhûtem izhâre-i şem‘-i ‘aşk
Bâl ü perümi yakdum şeb şu‘le-perestîden

Çekdükce mey-i ‘aşkı her câm-ı muhabbetden
Âteş-i yem olur her sad- hâlet-i mestîden

38a.
Tomâr-ı şeb içre gerçi güherüm ammâ ki
Rûm içre yatur mugber dil pâye-i püştîden

Zann itme Sa‘îdâ sen zâr-ı dil ü mahzûnem
Ol şîse-i hâtirdur âzâr-ı şikestîden

136.

--- / --- / --- / ---
Şikeste şîse-i dil cevr-i saht-ı dil-rübâlardan
Tenüm pür-dâg-ı mihnedür levendâne edâlardan

Dilüm yagmâ idüp ol gamze-i Tâtâr mansûrı
Fakîr oldum meded ma‘dûd iken agniyâlardan

Kapukulu olurdum ol meh-i Tâtâr nice ger
Beni ‘add eyleyeydi âsitânında gedâlardan

Meyân sadak geçirse bir müje ebrûdan ok- vâzı
Kaçan rencide olsa ‘âşikân-ı bî-nevâlardan

Nöker kıldı diline bûse ‘atâsı Sa‘îdâyi
Nola olsa o tifl-i şûh-i şîrîn mîrzâlardan

137.

.--- / .--- / .--- / .---
Nesîm-i vuslat esmez olalı her verd-i ra‘nâdan
Açılmaz oldu kâm-i gonca gülzâr-i temennâdan

Hümâdur ol dü-zülf-i yâr kad-i dilsitân üzre
Mahaldür her ne deñlü itse ger pervâz bâlâdan

Leb-i la‘lüñ nigehüñ çesm-i ‘uşşâk eylemiş yâri
Çekîde vasl-hîz katre-i mey câm-i sahbâdan

Görince bülbül-i dil eşk-i çesmin âl-gûn itdi
O reng-i mevc mevc ruhları gül-penbe hârâdan

Sa‘îdâ ser-te-ser gûş oldu çün gül-meşreb-i bârân
Dökerken ‘andelîb-i hâme âlûd itdi ma‘nâdan

138.

.--- / .--- / .--- / .---
Meclise nîzeñ dem ursa negme-i mâhûrdan
Bir nefesdür mürde dil ihyâsı içün sûrdan

Telh-kâmem ben baña ta‘n-i ‘adû virmez ziyân
Mârdur bî-behre zahm-i merd-i efyûn-hûrdan

Sitem-i ‘âlî çe sevdâ mâ ki çarh-i bâ-şinâs⁵⁵
Cevherüm fark eylemez feryâd çesm-i kûrdan

Bulmaz âvâz-i safâyı dil-şikest-i ‘âşıkân
Kâse-i tanbûr olsa kelle-i fagfûrdan

Neyleyem câm-i safâ şîrîn-dimâgum ba‘d-ez-în
Ahz idüp âhengüm âvâz-i per-i zünbûrdan

Bezm-i meyde eylemezler fark-i çesm-i ‘âşıkân
Gerden-i berrâk olsa şem‘a-i kâfûrdan

‘Îşret-engîzân-i güftâr-i müsellem ey Sa‘îd
Nabz-i ‘ayşı fark iderler şetme-i tâbûrdan

38b.

⁵⁵ “Bana, alışık olduğum çarhtan bunca sitemler ne sevdâdır?”

139.

.--- / .--- / .--- / .---

Gören hû-deh nigâh-ı gamze-i ser-tîzi dilberden
Bilür sâde her âb u tâb-ı rû şemşiri cevherden

Niger dür-dâne gül-çîn olsa eyler bûseler ta'lîk
O bâg-ı hüsnde şeftâlu-yı rûyi müzdverden

Olinca pûr-girişme mest-i çeşm-i âhu-yı şûhi
Görünmez dâmen-i tîgi nigâhi müşg-i ezferden

Kanı bir kâm-yâb-ı şûh-meşreb ‘âşik-ı sayyâd
Ala rindâne mey teklîf-i bûs-ı her şeb-i gerden

Bu vâdîde Sa‘îdâ reh-nümâdur sâlik-i hoş-gû
Olinca hâme pey-rev tâze-gû sâhib-suhanlardan

Harfü'l-vâv

140.

.--- / .--- / .--- / .---

Görince çeşm-i yâri gamze-i dil-dûza hem-pehlû
Ele almış didüm gör hançer-i ser-tîz-i pûr-câdû

Şemîm-i câne râhat-bahş olmaz kâkül-i tâze
Dile mâye nigâr-ı zülf-i ‘anber-bârdandur bu

Bize her mâh u rûz endâmına ân olsa pîrâye
Dil ikbâl eylemez illâ ki dil-ber olsa da gül-rû

Bu şeb ol mâhı zîb-âgûş-ı vasl hâfice itdüm
Deve gördün mi didi böyle vahşi görmedüm âhû

Çekerdüm âh-ı serdî hân-kâh-ı sîne-i gamda
Isındurdı hele bir pâre ‘aşk-ı na‘ra-ı yâhû

Sen âdem hârı mı zann eyledün ey mâh-rû bendeñ
Niçün bizden kaçarsın ey perî-reftâr u merdüm-hû

Olup hem-câ seg-agyâr iderler teşne-hûnlıklar
Güzâr eyler Sa‘îdüñ ‘omri hem çü Fâtîha⁵⁶-gû gû

Harfü'l-hâ'

141.

--. / --. / --. / --.

İtme hakâret ile nazar kimse hâline

⁵⁶ Kur'an 1

Tâb-âver-i ‘azâb olamazsın vebâline

İtmez kabûl himmet-i şâhâ bî-rû ider
Kâni‘ olan ‘abâsı ile kûteh şâlinâ

Makbûl eyle hâhiş-ı merd-i garîbi kim
Mahşer gününde sâtir olur infî‘âline

Her gördüğün ‘azîz bilürseñ ‘azîzsin
Virme derûnî zann-ı bedüñ ihtimâline

İtdüm Sa‘îd pîr-i hordan bu pendi gûş
İtme hakâret ile nazar kimse hâline

142.

-.- / -.- / -.- / -.-
Hayl-ı hübân içre sensin tab‘a ancak kâfiye
‘Âşık-i kalb-i marîze la‘l-i nâbuñ şâfiye

39a.

Mümteni‘dür vuslat-ı âgûşa çekmek sen şemi
Nakş-i şûr-engîz tasvîrüñ göñülde vâfiye

Kîl ü kâlüm safha-i süfr-i cemâlüñde senüñ
Hüsn-i hat ile yazar hattât-ı kudret sâfiye

Tâk-ı hüsnüñde hilâlüñ seyri istib‘âddur
Tâlib-i vasla mü’ekkidli düyûn-ı nâfiye

Nûn-ı ‘âşıkdan şarâb-ı nâzı çekdükce saña
Fevc-i ervahdan gelür âvâz-ı “sîhhâ ‘âfiye”⁵⁷

Kilk-i hoş-gûyuñ zebânın eyle iskât ey Sa‘îd
Teng-terdür meşreb-i ehl-i hünerden kâfiye

143.

-- / -- / -- / --
‘Iydiyye buluşmaga giderken hâcesine
Bî-tâb sarıldum o mehûñ ben paçasına

Dün savdı bizi bir iki agyâr ile gördük
Mestâne-reviş gitdi hemân kaplıcasına

Bu çarh-ı denî rûy-keş olmuş bize şimdi
Mânend-i zenân küsgî iderler kocasına

⁵⁷ “Âfiyet olsun!”

Biz tûti- dilüz bâ‘is ola sevk-i kelâma
Biz şûh-ı levendâne gerek ki aça sîne

Bir bûse kabz itmege yetmedi Sa‘îdâ
Bâzâr-ı muhabbetde pâ-deş Kozlucasına

144.

-.- / -.- / -.- / -.-
Vesme vü surmeyle bildük tâb virdüñ kendiñe
Kâküli sünbul kokar gül-âb virdüñ kendiñe

Süzilüp mânen-i şâhîn-şikârı ol dü-çeşm
Nergisüñ mahmûr şarâb-ı tâb virdüñ kendiñe

Râh-ı kûyuñ kesret-i ‘uşşâkdan mesdûddur
İhtişâm-ı ferruh u deryâb virdüñ kendiñe

Yâd ayık girmiş didüñ bâg-ı cemâlüm içre dün
Nâ-pesendâne niçün sen hâb virdüñ kendiñe

Gûşe-gîr-i ravza-i hüsnuñ hayâlüm haylidén
İncinürsin ya niçün şâd-âb virdüñ kendiñe

Şöyle âmed-şod iderseñ kûy-ı yâre ey Sa‘îd
Gösteriş hâssiyet-i sîm-âb virdüñ kendiñe

145.

--. / --. / .--. / --.
Bizi kelâm-ı halk-ı füsûn u fesâneye
Gelmiş gibi o şûh gice kahve-hâneye

Oldı şebîh kesret-i ‘uşşâk ile derüñ
Hâcet mi kaldı halka sefer âsitâneye

Varduñ hezâr da‘vetüñi itmeyen yire
İtme kadem dirîg fakîr ile hâneye

Hûbân-ı ‘asr encüm ü hûrşîddür o meh
Oldı efendi Yûsuf-ı sâni zamâneye

39b.

Her demde ‘ayş u ‘işreti zânû-yı yârdur
‘Âlem hasedde zevk-i gînâ-yı kemâneye

Zâhid düşürdi vuslat-ı âğûşa şâhidi
Olduk vukûf şu‘bede-bâz-ı zebâneye

Ru‘yâda kendini görüp ol sîmîn-ten ile
Gûyâ emîn itdi bizi sîm-hâneye

Tarz-ı garîb vâdi-i tâze-edâ ile
Söz yok Sa‘îd bu gazel-i şâ‘irâneye

146.

-.- / -.- / -.- / -.-
Yalvaruñ ol şûh-ı dil-hân-hâra Allah ‘aşkına
Rahm kilsun bu dil-i bîmâra Allah ‘aşkına

Sûziş-i kalb-i devâm-ı ‘âşık-ı şeydâ içün
Görmedük hîc böyle âteş-pâre Allah ‘aşkına

Pertev-i ‘aksiyle dil Tûr-ı tecellîzâr olur
Sad-pesend olsun ruh-ı pür-nâra Allah ‘aşkına

Kendüyi ol rûy-ı âteş-tâba teşbîh itmesün
Söyleyin hurşîd-i zerrîn-târa Allah ‘aşkına

Vâdi-i kâmil-pesend içre helâk olmuş gider
Pây-bend ur kilk-i hoş-reftâra Allah ‘aşkına

Eskimiş bu nev-zemîn hayli tekâpûlar ile
Geç dönüp nevbet Sa‘îdâ- râha Allah ‘aşkına

147.

-.- / -.- / -.- / -.-
Âteş-i ‘aşk –ı dilüm tamuya beñzer beñzese
Bu ten-i zâr-ı za‘îf mûya beñzer beñzese

Sînede der-kâr olaldan gamze-i çeşm-i siyâh
Şerha-i sînem gül-i şeb-bûya beñzer beñzese

Nev-resîde hat-ı müşg-âmîzüñe olmaz nazîr
Gösteriş ol zülf-i ‘anber-bûya beñzer beñzese

Halka-i zülf-i mu‘anber içre ol hâl-i siyâh
Hâme-i verz-i ‘anber kendüye beñzer beñzese

Ola hurşîdüñ dü- kursı rûyuña teşbîh-i tâm
Meh hayâl olsa hilâl-ebrûya beñzer beñzese

Seyr idüp didüm o şûhi gûşe-i gehvârede
Ney-süvâr-ı tıfl-ı ser-keş-hûya beñzer beñzese

Mutribâ-yı kalem-i destüñde gûyâ ey Sa‘îd
Nagme-sâz-ı bülbül-i hoş-gûya beñzer beñzese

148.

.--- / .--- / .--- / .---

Nedür ol hatt-ı nev-pûş-ı siyeh ruhsâr-ı âl üzre
Hücum-ı ‘asker-i Efrenz zemîn-i portakâl üzre

Ya hod kim hatt-ı sebzüñ ol leb-i şekker-nevâl üzre
Nüzûl-i sebz-pûş Hızrdur âb-ı zülâl üzre

Degül mutallak-ı leşker-küş-ı ‘Abâsiyân hattuñ
Cemâl-i mülki teshîr eyledi âl itdi âl üzre

40a.

Meh-i nev ebruvân-ı dil-bere teşbîh-i nâkîsdur
İden vesm-i ma‘ânî-i hayâlîdür hilâl üzre

Çekilmiş turralar bir levh-i hüsn üzre dü-tugrâdur
Dü-sâhibdür nişâni mülket-i şâh-ı cihân üzre

İdüp la‘l-i lebüne hâl-i ‘anber-bûyumuñ sîrrin
Didüm gör hüsn-i hatı nokta-i yâkûtî Zâl üzre

İdüp rind-i dilümle mest-i seyr âyîne hâkünde
Koma bu cism-i zârum bir gümân ile vebâl üzre

Delîl oldı hirâm-ı kaddı ol bir serv-i ser-keşden
Anuñçün bitmedi hîç mîve-i vasl ol nihâl üzre

Olurđi feth-i vuslat ‘ukdesi zerrîn kemerinden
Mukaddemce saralum çözmege Keşmîri şâl üzre

Leb-i şîrîn-kelâmuñ fâtihi telh-i ‘itâbuñdur
Sûrûr-ı kalb-i hüzne ol bedeldür iştimâl üzre

Çün istimdâd-gîr-i feyz-i rûh-ı şeyh enîs oldum
Sa‘îdâ nola tercîh olsa şî‘rûm her kemâl üzre

149.

.--- / .--- / .--- / .---

Çeküp hûn-ı derûnuñ nûş iderseñ eyle demlerle
Ki biñ minnet-keş olmak câm-ı ‘îşretden elemlerle

Çemende ‘andelîb-i zâr âvâzını basdurmaz
Agız bir itsek ey gül her nefesde gonca-femlerle

Dehen ‘aynina almaz ‘îşret-i çarh-ı sitem-kâruñ
Lebüñ yâdına mey nûş eyleyenler câm-ı Cemlerle

Niçe bir hâne-i agyâra ey meh perteve-endâzî

Ki bir dem külbe-i ‘uşşâka gel şâhum keremlerle

Sirişk-i çeşmi mercân dâg-i sîneñ zînet-âlûd it
Giderseñ kûy-i cânâna dilâ git muhteşemlerle

Benân-ı dest-i yâri yâd idüp yazduñ Sa‘îdâ sen
Sevâd-ı şî‘r-i pâki sîmden kudret-kalemlerle

150.

... / ... / ... / ..-
Diyemem böylece etvârciguñ bilmem ne
Baña ey mug-peçe etvârciguñ bilmem ne

Râst geldükce geçersin dile yay ebrû
Bize torluk çeke etvârciguñ bilmem ne

Dile bes hançer-i gamzeñ nedür âh ol müjgân
Yapunursın niçe etvârciguñ bilmem ne

Eyledüñ va‘de-i vasluñla Sa‘îdi mesrûr
Yine geçdin gice etvârciguñ bilmem ne
40b.

151.

... / ... / ... / ..-
Odur ol zülf-i yâre ‘âşikân âheste âheste
Odur cân-bâze menzil-rîsmân âheste âheste

Bilür vâcib cân ile ‘âkilân teffîk-i a‘dâyi
Olur cem‘iyyet-i rişte gider âheste âheste

Koşar sâlik reh-i himmetde bâ-vâsıl olur Hakka
Bulur bahre vusûl âb-ı revân âheste âheste

Neden ‘aksine devr eyler ser-i erbâb-ı ‘îrfâne
Yıkılmış gösterür gör âsumân âheste âheste

152.

... / ... / ... / ..-
Ne süd itmiş bulur gül büyi ta‘n-ı hârdan soñra
Olur tiryâk -i misrî zehr-i zahm-ı mârdan soñra

İderse çarh bir kez ger nigedle dil-i sûzâna
İder ehl-i dile sad - hançer-i âzárdan soñra

Keser efgânın ‘âşik tâb-rûy-ı dil-rübâdan soñ
Olur hâmûş bûlbûl mevsim-i gülzârdan soñra

İder câm-ı muhabbet nûş iden bâtil-ı şûr-âgâz

Görüp Mansûrı Hak-gû merd iken ber-dârdan soñra

Güzeşte cûrm ü her-endîşe kâr-ı merd-i Tâ’ibdür
Oturur çü diyâr-ı fîkîr ider bî-dârdan soñra

Sa‘îdâ terk-i dünyâ oldılar ol ‘âkîbet nisyân
Makâmın yâd iderler çarh-ı pür-girdârdan soñra

153.

--- / --- / --- / ---

‘Âlemde şu kim kalur bir serv-i hoş-âzâde
Şâhen-şeh-i mülk-i ‘aşk olsa nola ma‘nâde

Açma varakı seher ey bülbül-i dil dem-keş
Esmân-ı vefâ umma her bir gül-i ra‘nâde

Bâd-ı seher-i gülşen oldukça güşâyış-kâr
Hakkâ ki çemen içre ezhâr-ı sabâ-zâde

Hazret diyü da‘vet itdüm o perî-rûyi
İsâra dil ü cânum nakdin idüp âmâde

Zahm-ı ten-i nâ-sûrem oldukça şerer-efşân
Bilmem ne ile sâlik itsem dili feryâde

Ma‘mûre-i fezâ-yı nâb ile Sa‘îdâ sen
Sûrdüñ feres-i tab‘uñ hoş-râm-ı suhan-dâde

154.

--- / --- / --- / ---

Görince ol leb-i la‘li şarâb renginde
O şûha dil meze itdi kebâb renginde

Dü-çeşm-i mest-i siyeh şâh-bâz-ı keyf -âlûd
Süzildi kebg-i dile mey-i hâb renginde

Gül-i ruhuñ olicak çü ‘arak olur bû-yâb
Meşâm-ı bülbül-i hâhiş gül-âb renginde

İdüp hilâf şeb-i va‘d ider o subh-ı tulû‘
Ki böyle mâh kanı âfitâb renginde

41a.

Sa‘îde itdi nefes şeyh Feyzi-i Kefevî
Bu şî‘r-i nâdire-zâyi cevâb renginde

155.

--- / --- / --- / ---

Düşer üftâde dil-ber üstine vuslat-pezîr olsa
Eger bâg içre adum ol nihâli mîve-gîr olsa

Ben ol âşufte-dil-hâh-ınevâ-yı bezm-i ‘irfânem
Gerekmez sâz –ı dîger nây-ı hâmemden sarîr olsa

Mey-i kâm ile mestân-ı hoş-âvâz hil’at-i zer-kâr
Pelâs-ı ‘ârifidür hurde-bînle ger harîr olsa

Ne mümkün târ-ı ‘aşkum eylemek her-nev-hata ta‘lîk
Olan dil-ber bize cevher-şinâs-ı kadr-i pîr olsa

Dil-i zârum eger matlab-res olursa bulur ârâm
Keser gûdek figânın mâder-i pistân-ı şîr olsa

Sa‘îdâ bu hayâl-i tâzeye şâyestedür hakkâ
Kırımıñ şâ‘ir-i hoş-gûlарından ger nazîr olsa

156.

--. / --. / .--. / --.
Rindâne hayli şevk gelür sûr-ı ‘iyd ile
Âhir ider musâfaha bir hûrşîd ile

Kaddûn bülend oldugunu çokdan añladuk
Ey mâh ölçelüm seni gel serv-i bîd ile

Beñzer rakîb sûret-i dîvâr-ı kelîme
Ülfet-keş olma mürde-i kâfir-kedîd ile

Eglence âh-ı âtesimüz eşk-i çeşmümüz
Kalduk mekân-ı ‘aşkda iki mu‘îd ile

Olsun ba‘îd-i meclisüñe ol şakî-i seg
Gel yâr-ı pür-vefâ olagör sen Sa‘îd ile

Harfü'l-yâ

157.

.--. / .--. / .--. / --.
Îdüp eflâk-i hakîkatde hilâl ile beni
Baña gösterme mecâz içre güzeller seveni

Nûr-ı tevhîdüñi nakş itmek için fass olsun
Katre-i hûn-ı ciger aña ‘atîk-i Yemenî

Rişt-e-i hûşuma dürr eyle kelâm-ı ‘ulemâ
Girmesün gûşuma lâf-ı har-ı her dûn u denî

Çün karîb oldu ‘adem bahrine keşti-i vücûd
Ten kenârında reh-i Hakka çevürdüm dûmını

Şâhid-i ‘aşk ile âşufte-dil it her şeb ü rûz
Göze göstermeyesin her sanem-i sîm-teni

Sürme it çeşmüme kîmyâ-yı kanâ‘at hâkin
Ehl-i dünyâ eşiginden beni sen eyle ganî

Dem ura hikmet-i hakîkate Sa‘îd şî‘ri
Gün gibi pertev idüp ‘aşk ile her bir suhanı

41b.

158.

--- / --- / ---
Çıvardum âsumâna dûd-ı âhi
Anuñ gök oldugu işte güvâhî

Hayâlin çeşme gelse yaş dökerin
Ne hoş şî‘r eylemek âb içre mâhî

Belâ tîrin atar çeşm-i kebûdî
Belâ-yı âsumânîdür nigâhî

‘Aceb hûn-rîzdür kıttâl-i gamzeñ
Müje pîşinde saf urmuş siyâhî

İderdi hüsni nazmuñ görse tahsîn
Sa‘îdâ mîr-i hüsrev mîr-i şâhî

159.

--- / --- / --- / ---
Sûz-ı ‘aşk ile Hûdâ kibrît-i ahmer it beni
Şeb-çerâg-ı şu‘le-i mihr-i münevver it beni

Nâr-ı ‘aşk icrâ-yı tende rûh-ı ‘Abdi şems idüp
Sûziş-i dilden izâfe kîmyâ-ger it beni

Tîg-i cevher-dâr-ı tevhîdüñle dilde tâb vir
Ceyş-i iblîs ü hevâya sen muzaffer it beni

Hânumân-ı kalbe nâr-ı ‘aşkuñ ile âtes ur
Eşk-i dâg-ı hasret-i sûzân ile zâr it beni

Cezbe-i her-gûneñi ben zâra eyle bâl ü per
Kat‘-ı ba‘d-ı nefş için tâvûs-peyker it beni

Ahker-i nâr-ı hakîkat eyleyüp bendeñ Sa‘îd
Germ-cây-ı ‘aşk ile hem-çü semender it beni

160.

.--- / .--- / .--- / .---
Bahâr oldu getür rindân içün şu câm-ı berrâkı
Zamân-ı def-i gamdur lutfuña vâ-bestedür sâkî

Açılmış allar ile tâzeler sahn-ı çemenzâre
Sadâ-yı nevha-ı ‘uşşâk pûr itdi bu nûh-tâkı

Kizardı çehre-i hûbân meyle pûr –kemâl oldu
Nola alsak birer şeftâlû-yı pûr-âb ü dürâkı

Geçüp terden ‘arak-rîz oldu rûy-ı dil-berân üzre
Olup nâzir hümâdan çarh urur pervîn âfâkı

Sa‘îdâ kıl tazarru‘ hazret-i Vehhâb-ı bî-çûne
Hemân dûr eyleye bu zevkden şeyhân-ı zerrâkı

161.

-.- / -.- / -.- / -.-
Servden meyyâl akar bir âba beñzetedüm seni
‘Aks-i hüsn-i yâr ile meh-tâba beñzetedüm seni

‘Aşk ile yandukca ben ey sîne âteş sendedür
Hak budur kim külhen-i pûr-nâra beñzetedüm seni

Göz yumup açıncadır ey bîve-i dünyâ-yı dûn
Müddet-i vasluñ hayâl-i hâba beñzetedüm seni

42a.

162.

-- / -- / -- / --
Hengâm-ı tarab kıldı Hûdâ tâze bahârı
Görsek nola câm-ı mey ile zevk-i hisârı

Nev-rûz irüp hâce-i Rûm olmada bülbül
Hânende-i şâh-ı gül olup kılmada zârı

Gâhice ‘Irâk ile segâh ile muhayyer
Zîr-efgen ider gâhice dem-bestе-nigârı

‘Uşşâk hümâyûn rehâ-yâfte-‘ameldür
Bir tâze ile seyr ü hîrâm eylese bâri

Yek-câm-ı keşîde olicak bûselik ister
Gerdâniyedür ‘âşıka şûkrümüze varı

Bir mâh o meh kim hâl-i ruhı bendir-sûret
Her gamze-i merdüm-keşî âhû-yı Tatârî

Geh bâd-ı seherle olup ârâyış-i gülşen
Geh seyr-i çemenzârda ol âb ile cârî

Bir hâlini Lâhûr ile Keşmîre degişmem
Gül-çehre-i Rûm olsa baña Tunca kenârı

Gül-geşt-i musallâ ile Şîrâzî niderdi
Bir böyle deme düşmiş Sa‘îdün ser ü kârı

163.

--. / .--. / .--. / .--
Zülfüñ dil-i sad-pâremüze şâne gelür mi
Murg-ı hevese hâl- ruhuñ dâne gelür mi

Hep böyle mi gavgâ-yı ‘adû örtine perde
Merdân-ı muhabbetle ya meydâna gelür mi

Pervâzda havâhiş-geri câdû-yı gamze
Ol gonca-dehen hûn-ı dile kanagelür mi

Ol peri olur mı ‘acabâ beste-i teshîr
Efsûn-geri-i sübha-i mercâne gelür mi

Haşâ ki Sa‘îd bûs-ı bahâ-yı leb-i rengîn
Zî-kıymet-i sad-la‘l-i Bedehşâna gelür mi

164.

.-- / .-- / .-- / ..-
Safâ-yı ‘işret-i dilde felek be-kâm gibi
Elinde pür mey olan reng-i lâle-câm gibi

Olur remîde hat-ı tâze rûy-ı dil-berde
Kim itdi pertev-i hûrşîdi vakt-i şâm gibi

Meger ki Rûm ilide renc-i fakrsârîden
Yapışdı âh girîbânuma huddâm gibi

‘Aceb mi olsa safâ-yâb râh-ı pâ-ber-dûş
Olan o mâh ile pîçîde elif lâm gibi

Resîde mîve-i vaslında âb u tâb ammâ
O şûh göstere ‘uşşâka nîm-hâm gibi

Sa‘îd tûti-i killküñ ‘aceb letâ’if-kâr
Suhanda Sâbit-i dil-şâd hoş- kelâm gibi
42b.

165.

... / ... / ... / ...
Görse ‘âşık kapılıp tâb-ı ruh-ı dil-dârı
Cezb ider mihr-i felek zerre-i bî-mikdârı

Salin ey mâh gülistâne olup pür-şîve
Serv görsün nic’olur kâ’ide-i reftârı

Nazaruñ var senüñ ol gamze-i fettâne meger
Kullanursın dili yagmâ içün ol Tâtârı

Bî-direm ‘âşika hûbân olamaz dil-besté
Eger olursa buz üstinde olur bâzârı

Hûn-ı dil kalmadı katre dil-i bî-kânimda
Gözüñ itdi gibi mey-hâre-yi hûn-hâri

Hasret-i halka-i çeşmüm siyehüñden salmış
Kumri-ı bâg-ı safâ gerdenine zünnârı

Âh bir kez serüme konsa hümâ-yı devlet
Bir gedâyem nola şâh eylese lutf-ı Bâri

Hânedân-ı şeref ikbâl-i sa‘âdet ne gezer
İbn-i vakt-i ser-i hûrân ile devlet-kârı

Bezm-i ‘irfânda Sa‘îdâya gazel-gûyî bes
Neylesün tarz-ı kasîdeyle idüp cerrârı

166.

--. / --. / --. / --.
Hatt-ı sehâb mihr-i ruh-ı yâri sakladı
Hayfâ metâ‘-ı kıymet-i câni ayakladı

Tâtâr zan mı itdi rakîbi o mâh-Türk
İt gibi dûr- bâşı suhanla padakladı

Çarh itdi dâg-ı sad-gamuñ ile tenümde zîb
Gûyâ Kalender itdi beni tumturakladı

Üftâde oldı bülbül –i dil-haste gâlibâ
Şeb subh olınca bir gül-i âla sabâkladı

İdüp ‘inâyet-i dest savup şeyh-i huşkı rind
Hidmet yanaşdurup evhara hoş yarakladı

Ta‘lîm idince kâfiye-i teng-i ‘arsada
Elde kümeyt-i kalem Sa‘îd çapaklıdı

-.-- / .-. / .-

*Men ki rind-i mey-perestem yelleli
Mey-hâr-ı bezm-i elestem yelleli*

*Ân-cihân ân-mey dilem te'sîr kerd
Tâ-ber-în eyyâm-i mestem yelleli*

*'Aşk ile mânen-d-i tîr-i ber-hevâ
Ez-be-hem-sân çarh cüstem yelleli*

*Nûş kerdem çün şarâb-ı 'aşk-râ
Defter-i nâmûs şüstem yelleli⁵⁸*

*'Aşk ile oldum zer-i hâlis gibi
Tîre-hâkem gerçi mestem yelleli*

*Saht-gâh-ı 'aşkda sultân olup
Zulmet-i gamdan çü Rüstêm yelleli*

43a.

Himmetüm bâzı bülend-pervâzdur
Gerçi çeşmüm halka-bestem yelleli

Gussa-i âtes-feşân-ı âh ile
Şîşe-i gerdûn-şikestem yelleli

*Pey-rev-i Sâ 'ib şodem men ey Sa'îd
În-gazel-râ nakş-bendem yelleli⁵⁹*

TARİHLER

1.

**Târîh-i Hâne-i Münakkaş Der-Çâgırgan -ı Halîm Giray
Hân Binâ Kerdest**

-.-- / .-. / .-

Halîmü't-tab' o sultân-ı zamâne
Îdince himmet-i 'âlî şahâne

Çagırgânda kılup hûb-bünyâd
Serây-ı devlet-güşâ nâzükâne

⁵⁸ “1.Benmeye tapan rindim; Bezm-i elestin mey içeniyim, yellelli.2.O cihan, o meyden gönlümün etkilendiği günlerden beri, sarhoşum, yellelli. 3.Aşk lie havaya atılmış ok gibi, çarh boyunca sıçrarım, yellelli. 4. Aşk şarabından içtiğim için, nâmus defterini yıkadım, yellelli.”

⁵⁹ “Ey Saîd, ben Saîb'in yolundan gidenim. Bu gazeli nakş gibi işledim, yellelli.”

Meyânında sarâyuñ kıldı tedbîr
İdeler bir musanna‘ hûb-hâne

Gelüp nakşına bir nakkâş-ı kâmil
Urup el mûy-ı kilke Mâniyâne

O deñlü kıldı ezhâr ile tezyîn
Giren düsdüm sanur bâg-ı cinâne

Urur her bir gül-i sad-bergi âtes
Derûn-ı bülbûlân-ı ‘âşikâne

Sunar mihr ü mehi âyne-i reşk
O nakş-ı pîç pîç-i Rûmiyâne

İderdi bergli gülhâlarından
Yiterdi zîb-i desti ‘ârifâne

O altın şîseler şemse müşâbih
Tavân-ı lâceverdi âsumâne

İdüp menkûle harf ile Sa‘îdâ
Beyân eyyâm-ı vaktin şâ‘irâne

Pesendâne didüm târîhin ben
Zihî musanna‘ hem menkûş-ı hâne / 1168

2.

Târîh-i Çeşme vü Kasr Der-Çagırgan

--- / --- / --- / ---
Sa‘âdet Hân-zâde ol Halîm Sultân-ı ‘Âli-şân
Kılup bir ‘âli devlet-hâne içün himmet-i vâlâ

Çagırganda görüp matbû‘ı üzre ihtiyâr itdi
Zemîn-i dil-keş-i hürrem hevâyı âb-ı rûh-efzâ

Ki ferzend-i Sa‘âdet-mendi içün eyledi niyyet
Binâ ider müferrih bir sarây-ı meymenet-serâ

İdince resm esâsın şöyle mergûb itdi üstâdı
Binâsı hûb ra‘nâ düşdi sakfi fark-dân- fersâ

Gören dir ol müzeyyen sakfi dîvâr-ı kec-endûdî
Giyinmiş bir nigâr-hâne-i çîn-i melek-sîmâ

43b.

Sa‘âdet-dâr olmuş ehlini zîr-i cenâhına
Hümâ tâ bâl ü per açmış hümâdur uçmaga gûyâ

Ne dil-cûdur öñinde gör ki işbu kasr-ı şîrînün
Akup üç lûle-âbı çeşmesinden cûy-ı şîr-âsâ

Behişt içün ölenler münkirân-ı kûr-ı bî-idrâk
Bu eyvânı aña bî-şübhe dirdi görse *âmennâ*

Görüp bu kasr ile bu çeşme-i şîrînün itmâmın
Hemân elümde oldu kilk-i şûhum tûti-i gûyâ

Sa‘îdâ tarh idüp bir yeñi vâdide didüm târîh
‘Aceb mevzûn binâdur çeşmesi hem selsebîl-âsâ

3.

Târîh-i Vefât-ı ‘Abdülaçîz Çelebi Bin Şeyh ‘Osmân
-.- / -.- / -.- / -.-
Hayf ol ‘Abdülaçîz ibn-i Şeyh ‘Osmâna kim
Göç idüp mülk-i bekâ içre ‘azîmet eyledi

Bahr-i dünyâ-yı belâ-emvâcı kîlmagçün güzâr
Keşti-i tâbûta bindi ‘azm-i rahmet eyledi

Şehr-i nûreddîn içinde cânını idüp nisâr
İmtisâl-i da‘vet-i fermân-ı hazret eyledi

Firkatıyla gerçi kim oldu ol ahbâbını hûn
Hakka şûkr mâh-ı siyâm ile ziyâfet eyledi

Eyleyüp ısgâ “acibu”⁶⁰ emrini mesrûr olup
Cânını kurbân idüp emre icâbet eyledi

Kıymetin bildükde ‘âlem dest-i ber-bâlâ-yı dest
Tahte-i tâbûtunu ber-dûş-ı ‘izzet eyledi

Var olup bâg-ı cihân cân-ı ‘azîzine hemân
İhtiyâr-ı gülsitâne şehr-i cennet eyledi

Çâr-yâr-ı bâ-safâdan ‘ayn-ı feyz irüp dile
Bir suhan-gû mevtine ol dem işâret eyledi

Dâl olup târîhinün itmâmına didüm hemân
Âh kim Monla ‘Azîz ‘ukbâya rihlet eyledi

⁶⁰ “Şaşılacak şey.” Kur’ân 11/ 72.

4.

Târîh-i Vilâdet-i Ahmed Girây Bin Nûreddîn Sultân

--- / --- / --- / ---

Bihamdillah olup mesrûr tab‘-ı ârzûmendân
Virüp hep hâhiş-i feyyâz Hak çarh-ı le’im içre

Olup kân-ı felekde kâm-ı dil sûret-pezîrânı
Murâd oldu meger takdîr-i Hallâk-ı ‘alîm içre

Ki ya‘ni togdî bir şeh-zâde mîr kim görse ruhsârin
Muhibb-i müstakîmi oldu dünyâ-yı sakîm içre

Aña Ahmed Giray nâm oldu gûyâ çarh idüp eyyâm
Gören Mahmûd olur gevher-edâ âgûş-ı sîm içre

Nola bî-mâverâdan işbu tîfl –ı gonca-i ‘izzet
Bahâ-sengîn olur her kıymet ü dürr-i yetîm içre

44a.

İlâhi ‘ömrin efzûn eyleyüp bahtin gûşâd eyle
‘Azîz ü muhterem it hem selâtîn-i kadîm içre

İdüp bir nâkîs-ı ehl-i suhanı târîhi irâd
Dinilüp gül açıldı gûlşen-i mâl-i Selîm içre

RÜBAİLER

1

Vâdi-i rübâ‘îde olnca gûyâ
Îrdi dile yek katre câm-ı sahbâ
Ol katre dilümde söyle cûş kim
Hayyâm-sifat ‘aşkla oldum rûsvâ

2

Zînet-ger olan tenümde her mûyi baña
Tevhîdiñe kudret vir eyâ bâr-ı Hûdâ
Her şükriñe ez‘âf-ı muzâ‘afa olsun
Bir dil yirine biñ dil ile kıl gûyâ

3.

Ey şâh resul şefî‘-i mahbûb-ı Hûdâ
Îhsân-ı şefâ‘at it bize rûz-ı ferdâ
Nâ-kerde cehl-i rûy-ı siyeh görme revâ
Rûsvâyî kîlma hezâr ferdâ ferdâ

4.

Geh nîm-nigâh-ı mest gâhice ‘itâb
Geh düşmen-i cân gamzesi gâhi ahbâb

Ümmîd-i visâl-i mâ’ile bu dil-i gûyâ
Bir cânibi âteş oldı bir cânibi âb

5.

Alçak göñül ol alınca meyl ile cevâb
Şebnem gibi bâlâya sakın itme şitâb
Ragbet seni hurşîd ile ber-â-ber itse
İdbâr ile eyle has u hârı sîr-âb

6.

Gonca -dehen gül-ruh u gülbin-kâmet
Meh-i perteve- rû nâmîye hurşîd-sîfat
Verz-i şükri sûz-ı dil –i pür-nâlem
Feryâd eyledir ‘âleme âfet âfet

7

Sultân-ı resûl şeffî‘-i ‘âsî ümmet
Şânuñda senüñ risâlet-i hatemiyyet

44b.

Hakkâ ki Sa‘îd –i ‘âsî gerden-reviş
Hasretiñle o nûr-ı mihr-i kudret

8

Târîkî kalbümde dil âşufte vü ac
Söz diñlemiyor gayri kabûl olmaz ilâc
Ey şûh-ı mevâkibî içün lutf eyle
Gel gamzeyle sîneye bir pencere aç

9.

Bezm içre girîbânın idüp istiftâh
Sîne-i sîmîni çün itdi ïzâh
İdüp o mehe derd-i derûn ile nigâh
Sad-şevk safâ ile didüm yâ Fettâh

10.

Aldum elüme câm-ı şarâbı küstâh
‘Aşk ile çeküp o telh-âbı küstâh
Şûrîde olup bahr gibi cûş itdüm
Terk eyledüm eş‘âr-ı kitâbı küstâh

11.

Feryâd senüñ elüñden ey çarh feryâd
Nâ-şâd dilüm eylemedüñ bir kez şâd
Cânuñ mı çıkardı kafes-i gurbetden
Bu tûti-i mecûsi kîlayduñ âzâd

12.

‘Aşkuñla dilüm zâr u vücûdum it zerd
Erbâb-ı sa‘âdetle beni kıl hem-derd
Yandurma firâk âteşi içre yâ Rab
Dîdâriñi ihsâne baña çâre meded

13.

Günden güne dünyâ baña gelmekde lezîz
Mihrin felek itdi dile gûyâ ta‘vîz

İdüp baña it defter-i lutfuñ der-kâr
Kıl nâmum ile kazâ-yı ‘aşkı tenfîz

14.

Bülbül ki kulakdan güle bir ‘âşık-ı zâr
Gülşende yatur gül ise hem-pehlû-yı hâr
Çâk oldı diyü dâmen-i nâz-ı ‘ismet
Feryâdı arturmada her günde hezâr

45a.

15.

Üstâd-ı cihân olsa eger Câlinûs
‘Îlme dili birden idebilmez me’nûs
Dâmâde ne deñlü dili pür-şevk olsa
Dâmen-keş olur görüşüp evvelde ‘arûs

16.

Besdür baña yek-câm gerekmez âteş
Her neş’ e-i câmî baña virmez âteş
Ger sayf u ger şitâda nûş eyle Sa’îd
Mey germ-i dil eyler beni itmez âteş

17.

*Der-geşten-i mâ gamze-i dil-ber –mahsûs
Ber-çeng-i ‘ûd tîg-i gazanfer-mahsûs
Per-hîz Sa’îdâ kerd Hüdâ-çîzî-râ
Ez-be-her visâl-i kâ ‘ide-i zer-mahsûs⁶¹*

18.

Tebhâle o la‘l-i lebe olmuş ‘âriz
Teb ‘âriz olaldan aña solmuş ‘âriz
Rengîn görünürken gül-i âl üzre Sa’îd
Âhum eseri irdi mi nolmuş ‘âriz

19.

Günden güne bulmakda ‘aceb kuvvet hat
Îdelden o mâh-rûy ile ülfet hat
Zabt itdi meded riyâz rûy-ı yâri
Yazdı varak-ı hüsnine hemân hüccet hat

20.

Gör şâ‘ir-i ‘asrı hep perîşân-ı elfâz
Mahsûl-i meâl-i şî‘ri bî-cân-ı elgâz
Oldukca hemân berü nefesden sâdir
Bî-şübhe gören dir aña yahdan elfâz

21.

⁶¹ “Bana tesir etmek, sevgilinin bakışlarına mahsus; udun teli, gazanferin okuna mahsus; Ey Saîd, Hüdâ’nın cansız varlıklarına karşı perhiz tut; her bir visâlin kâidesi, altına mahsus.”

Ben bülbülem itdüm yine gülzârı ferâg
Sad-nevha-i şîvengehi-i zârı ferâg
Olmaz nigeħ bilmem bu dil-i meyyâli
Yohsa ider idüm reh-i eş'ârı ferâg

22.

Ey kâfir-i Bulgar-neseb it insâf
Kıldıñ dilümi esîr bî-lâf u güzâf
Yek-pâre senüñ ile ne var cem‘ olsak
Ruhsat-deh-i vuslat olalum nâf-be-nâf
45b.

23.

Tolsa güneħüm ile zemîn ü eflâk
Lutf ider ise Hazret-i Hak baña çe bâk
Ger bahr ola cărm baña gam mî Sa‘îd
Eylerse şefâ‘at baña şâh-i *Levlâk*

24.

Revnak-fügen ey şûh saña berberlik
Âyine-i hüsnüñde ne bu enverlik
Var hâlet-i dîger o gümüş sîneñde
Bakdukca gelür dîdeme rûşen-gerlik

25.

Men tûti-i ân-dehân-i şekker-hâyem
Men bülbül-i ân-rûy-i gül-i mîr-zâyem
Ân-gamze-i Tâtâr dilem yagmâ kerd
Dervîş şodem çe sûd ki evvel-bâyem⁶²

26.

Sîm sadef ü bahr-i dürer-endişem
Gavvâs-i yemem dürr-i yemem abdâl-i pîşem⁶³
İtdüm bu kadar cevheri ‘âlemde nisâr
Bir şâ‘ir-i hoş-lehce-i hâtem-i kîşem

27.

Bir dil-ber-i Bulgârı-i şûh-ı fettân
Bir dil-ber-i kâfir-neseb-i bî-îmân
Çekdi dil-i dîvânemüzi zencîre
Sac bagını döşünden idüp âvîzân

28.

Yek şâ‘ir-i hoş-lehce-i nâ-kâmem men
Ez-cevr-i felek-puhe velî hâmem men
Der-dâr-i cihân şodem Sa ‘idâ meşhûr

⁶² “Ben, o şeker yiyen ağızın tûtisiyim; ben, o mirzanın gül yüzünün bülbülüyüm; o Tatar bakışlar, gönülmü yağmaladı; dervîş oldum, ne fayda, önceleri zengindim.”

⁶³ “Fikrim, gümüş, sedef ve denizlerin incisidir; denizin dalgıcı, denizin incisi olan abdalım.”

Pey-rev-şode-i vâdi-i Hayyâmem men⁶⁴

29.

Sahhâf gibi dolâb-ı felekde zühre
Göstermede evrâk-i sîmâyı şehre
Kirtâs-ı zer-efşân ile hem ‘arz eyler
Mihri varak-ı zer diyü mâhi mihre

30.

Minnet idemem Sa‘îd her bir dûne
Sad-şükr-i sipâs Hazret-i bî-çûne

46a.

Men gerçi hakîr-i zerreyem ‘âlemde
Siyt-ı suhanum irmededür gerdûne

31.

İrmedi baña çarh-ı felekden behre
Nitdüm bilemem hâsılı şahs u mihre
Girmedi dahi vuslat-ı âğuşuma hîç
Bir dil-ber-i Çerkes-neseb gül-çehre

32.

‘Îbretle bak ey dîde gör ol nâ-pâki
Câdû yapulu konculoz-ı bî-idrâki
Pîçîde olur mâr-sîfat zehr ile
‘Âlemde ‘aceb masharadur tiryâki

33.

Her-bâr-keş-i zamâne cemmâzeleri
İrgürdi safâyi uça âvâzeleri
Hayfâ ki Sa‘îd her har bâtildur
Mestâne şeb âgûşa çeken tâzeleri

⁶⁴ “Ben, güzel sözlü ve kötü bahtlı bir şâirim. Hamîm fakat, feleğin çevrinden pişmişim. Ey Said, dünyâ mülkünde ben Hayyam’ın takipçisi olmakla meşhurum.”